

ORE I MEXÜ GA LUCA ÜMATÜXÜ

Norü ügü i ore ga Ngechuchuchiga

¹⁻² Pa Mecü Pa Teóquirux, nayexma ga tacü ga totanüwa ngupetüxü. Rü muxüma ga duüxügü rü marü nanaxümatügü ga yemachiga, yexgumarüü ga tomaã nüxü na yaxugüexürüü ga yema duüxügü ga noxriarü ügügumama Ngechuchuxü daugüxü rü nüxü rüngüxëëgüxü ga norü orearü uchigawa.

³⁻⁴ Rü ngëmacèx, Pa Teóquirux, rü choma rü ta meãma naxcèx íchaca ga nachiga ga guxüma ga yema Ngechuchu üxü. Rü ñuxma rü chauxcèx rü name na meãma cuxcèx chanaxümatüxü i ngëma na meãma nüxü cucuáxücèx na aixcüma yïixü ga yema ore ga marüchirëx cuxü nangüxëëgüxü ga togü.

Tupanaãrü orearü ngeruü ga daxüçüãx nanaxunagü ga Cuáü ga baiüxëëruüãrü buxchiga

⁵ Rü yexguma Erode ãëxgacü ixïxgu ga Yudéaanewa, rü yéma nayexma ga wüxi ga Yudíugüarü pai ga Zacaríagu ãëgacü. Rü pai ga Arãütaa ga Abíatanüxü nixï ga nümax. Rü namëxéga rü Erichabé nixï. Rü tüma rü ta pai ga Arãütanüxü tixï.

⁶ Rü nüma ga Zacaría rü namèx ga Erichabé rü meãma Tupanapëxewa, namaxë rü aixcüma naga naxïnüë ga norü mugü. Rü yemaãcü taxucürüwa texé chixri nachiga tidexagü.

⁷ Natürü nangexacügü yerü namèx rü ingexacü. Rū ñuxüchi ga nūmagü rü marü yaguãxgü nixīgü.

⁸ Rū wüxi ga ngunexügu rü yema paigütücumü ga Zacaría natanüwa üxügu nangu na tupauca ga taxünewa Tupanaärü puracü naxügüxüçèx.

⁹ Rū yema paigü rü nacüma nixĩ ga nüxü na naxunetagüxü ga wüxi ga natanüxü na tupaucaarü aixepegu naxücuxüçèx rü yéma Tupanacèx na yaguãxüçèx ga pumara ga yixixü. Rū yema ngunexügu rü Zacariagu nangu na tupaucaarü aixepegu naxücuxüçèx na yéma yaguãxüçèx ga pumara.

¹⁰ Rū yema pumara íyaguyane rü guxüma ga duüxügü ga düxétüwa yexmagüxü rü inayumüxègü.

¹¹ Rū ngürüächi Zacariacèx nangox ga wüxi ga Tupanaärü orearü ngeruü ga daxüçüãx. Rū yema nachica ga pumara nawa yagugüüxüärü tügünecüwagu nachí.

¹² Rū yexguma Zacaría nüxü dèuxgu ga yema Tupanaärü orearü ngeruü ga daxüçüãx, rü poraäcü nabaixächiaë, rü poraäcü namuü.

¹³ Natürü yema daxüçüãx ga Tupanaärü orearü ngeruü rü ñanagürü nüxü: —Pa Zacariax, ¡täxü i cumuüxü! Erü Tupana rü marü nüxü naxĩnü i curü yumüxë. Rū cuxmèx i Erichabé rü cuxü tá ixãacü, rü Cuáügu tá cunaxüéga.

¹⁴ —Rü cuma rü tá poraäcü cutaãèxüchi i ngëxguma nabuxgu. Rū muxüma i togü i duüxügü rü tá ta nataãègüxüchi.

¹⁵ —Erü yima cune rü Tupanapëxewa rü tá wüxi ya mexèchicü nixĩ. Rū täütáma binu nayaxaxü, rü taxuüma to i tacü rü ngüchixáxü tá nixaxü. Rū

tauta nabuyane rü Tupanaãe i Üünexü rü tá nüxna nangu.

¹⁶ –Rü nüma tá muxüma i Yudiügüxü narüngüxëe na norü Cori ya Tupanacëx nawoeguxüçex.

¹⁷ –Rü nüma ya Cuáü rü tá Cori ya Cristupëxegu nixü. Rü nuxcümaücü ga Tupanaärü orearü uruü ga Eríarüü tá nixí erü tá nüxü nangëxma i Tupanaãe i poraxü. Rü ngëmaäcü tá nüxü narüngüxëe i papágü na naxácügüxü nangechaüxü, rü ngëma tama Tupanaga ñnüechaüxü rü na aixcüma inaxñnüëxüçex. Rü ngëmaäcü tá duüxügüxü ínamexëe naxcëx ya Cori ya Cristu –ñanagürü ga yema daxüçüãx.

¹⁸ Rü Zacaríá rü yema daxüçüãxna naca, rü ñanagürü: –¿Ñuxäcü tá nixí i ngëma na naxãxäcüxü i choxmëx? Erü marü chayaxüchi i chomax rü ngíma rü ta marü iya –ñanagürü.

¹⁹ Rü Zacaríaxü nangäxü ga yema daxüçüãx, rü ñanagürü: –Choma nixí i Gabi i Tupanaärü puracü chaxüxü. Rü nüma núma choxü namu na cumaã nüxü na chixuxüçex i ñaã ore i mexü.

²⁰ –Natürü ñuxma i cuma rü tama choxü cuyaxõ i ngëma ore i cumaã nüxü chixuxü. Rü ngëmacëx i ñuxma rü tá cungega ñuxmatáta nabu i ngëma cune. Natürü ngëma cumaã nüxü chixuxü, rü aixcüma tá ningu nagu i ngëma ngunexü i Tupana ixunetaxü –ñanagürü.

²¹ Rü yoxni ga duüxügü rü tupaucaarü düxétüwa Zacaríaxü nananguxëëgü. Rü nügüna nacagüe ga ñacüçex na tama paxa yéma ínaxüxüxü.

²² Rü yexguma Zacaríá tupaucawa íxüüxgu, rü taxucürüwa duüxügümaã nidexa, yerü nangega.

Rü nümagü ga duñxügü rü nüxü nicuèxãchitanü ga ñacüxü na nadauxü ga Zacaríá ga tupaucaarü aixepena. Rü Zacaríá rü naxmëxmaã duñxügüxü nüxü nacuèxëë ga ñacü nüxü na üpetüxü, yerü nangea.

²³ Rü yexguma Zacaríá naguxëëgu ga na naxüãxü ga Tupanaärü puracü ga tupauca ga taxünewa, rü wenaxärü napatacèx nataegu.

²⁴ Rü yemawena rü Zacaríá namëx ga Erichabé rü ixãxãcü. Rü ngípatagu irüxãüëcha, rü wüximëxpüx ga tauemacü taguma düxétüwa ixü.

²⁵ Rü ngíxícatama ngígürügü: —Cori ya Tupana rü poraãcü choxü narüngüxëë. Rü ñuxma rü marü tãütáma chixri chauchiga nidexagü i duñxügü naxcèx na changexacüxü —ngígürügü.

Wüxi ga Tupanaärü orearü ngeruñ ga daxüçüãx nüxü nixu ga Ngechuchuarü buxchiga

²⁶ Rü 6 ga tauemacü marü ngíxü mexgu ga Erichabé ga yema na naxãxãcüxü, rü Gariréaanewa yexmane ga ñãne ga Nacharétuwa Tupana nanamu ga norü orearü ngeruñ ga Gabi.

²⁷ Rü ngíxütawa naxü ga wüxi ga pacü ga taguma yatü ngímaã maüxcü. Rü Maríá nixí ga ngíega. Rü ngíma rü ixãtechañ namaã ga wüxi ga yatü ga Yúchegu äegacü. Rü nüma ga Yúche rü nuxcümaücü ga äëxgacü ga Dabítanüxü nixí.

²⁸ Rü yema nachica ga Maríá nawa yexmaxügu naxücu ga Gabi, rü ñanagürü ngíxü: —Nuxmaë Pa Maríax. Tupana rü poraãcü cumaã nataãë. Rü Cori ya Tupana rü cuxütawa nangëxma, rü guxü i ngexügüarü yexera marü cuxü narüngüxëë —ñanagürü.

29 Natürü yexguma María nüxü dèuxgu ga yema daxüçüãx ga Tupanaärü orearü ngeruü, rü namaã ibaixãchiãe ga yema norü ore ga ngĩmaã nüxü yaxuxü. Rü ngĩgüãewa nagu irüxĩnú ga tüxcüü yemaãcü ngĩxü na namoxëxü.

30 Rü yexguma ga Gabi rü ñanagürü ngĩxü: –Pa Maríax, tama name na cumuüxü, erü Tupana rü poraãcü cumaã nataãe.

31 –Rü ñuxma rü tá tauemacü cuxü inayarütaxu, rü tá cuxããcü, rü tá nayatü i cuxacü. Rü Ngechuchugu tá cunaxüéga.

32 –Rü nüma rü wüxi ya ãëxgacü ya taxüchicü tá nixĩ. Rü Tupana ya Taxüchicü Nane tá nixĩ i naega. Rü Cori ya Tupana rü tá nuxcümaücü ga ãëxgacü ga Dabírüü ãëxgacüxü nayaxĩxëe.

33 –Rü nüma rü guxügutáma Yudíugüarü ãëxgacü nixĩ. Rü tagutáma Ínanguxuchi na ãëxgacü na yüxü –ñanagürü.

34 Rü yexguma ga María rü Gabina ica, rü ngĩgürügü: –¿Ñuxãcü tá nixĩ i ngëma na chaxããcüxü, erü tauta chaxãte? –ngĩgürügü.

35 Rü nüma ga Gabi rü ngĩxü nangãxü, rü ñanagürü: –Tupanaãe i Üünexü tá cuxna nangu. Rü Tupana ya Tacüarü pora rü wüxi i caixanexürüü tá cugu nayangaixema. Rü ngëmacèx ngëma õxhana i namaã cuxããcüxü rü Tupanapëxewa mecüxüchi tá nixĩ, rü Tupana Nanemaã tá nanaxugü i duüxügü.

36 –Rü cutanüxü i Erichabé rü marü ixããcü woo marü yaguãxchirëx na yüxü. Rü woo ga duüxügü rü:

“Tagutáma ixããcü” ñanagürügü ngĩxü, natürü i

ñuxma rü marü 6 ya tauemacü ngixũ name na marü naxãxãcüxũ.

³⁷ –Erü Tupanaãxũ rü taxuũma naguxcha –ñanagürü.

³⁸ Rü yexguma ga María rü ngĩgürügü: –Chorü Cori ya Tupanaãrü duũxũ chixĩ i chomax. Rü marü name i chomaã nanaxü i ngẽma chomaã nüxũ quixuxũãcüma –ngĩgürügü. Rü yexguma ngixna ínixũ ga yema Tupanaãrü orearü ngeruũ ga daxũcüãx ga Gabi.

María rü Erichabéxütagu inaxũãne

³⁹ Rü yexgumaũcüü ga María rü paxama nawa ixũ ga guma ñãne ga Zacariapata nawa yexmane ga Yudeaaneãrü dauxchitawa.

⁴⁰ Rü Zacariapatawa ingu, rü iyaxücu, rü Erichabéxũ irümoxẽ.

⁴¹ Rü yexguma Erichabé nüxũ ñnügu ga Maríaarü moxẽ, rü ngĩrũ õxchana ga ngĩñnüwa yexmaxũ rü nixĩãxcüü. Rü Tupanaãẽ ga Üünexũ rü Erichabéna nangu.

⁴² Rü yexguma ga Erichabé rü tagaãcü Maríaaxũ ngĩgürügü: –Guxũ i ngexũgüarü yexera Tupana cuxũ narüngũxẽẽ. Rü ngẽxgumarüũ ta cunexũ narüngũxẽẽ.

⁴³ –¿Tãcüwa chame na nuã chauxütagu cunaxũãnexũ? Pa Chorü Cori Naẽx.

⁴⁴ –Erü ngẽxguma nüxũ chaxĩnügu i curü moxẽ, rü chauxacü i chauanüwa ngẽxmaxũ rü norü taãemaã nixĩãxcüü.

⁴⁵ –Cuma rü cutaãẽ erü nüxũ cuyaxõ i norü ore ya Tupana. Rü ngẽmacèx Tupana tá nayanguxẽẽ i ngẽma ore i cumaã nüxũ yaxuxũ –ngĩgürügü ga Erichabé.

46 Rū yexguma ga María rü ngĩgürügü: —Choma rü chauãẽwa poraacü Tupanaxũ chicuèxüü.

47 —Rü chorü Cori ya chorü Maxẽeruũmaã chataãèxüchi.

48 —Rü woo wüxi i Tupanaãrü duũxü i ngearü dĩeruãxê chixĩ, natürü Tupana chaugu narüxĩnũ. Rū ñuxmaücüü i duũxügü rü taãèxcümaã guxügutáma choxü naxugüe.

49 —Erü Tupana ya Poracü rü taxü i mexü chauxcèx naxü. Rü naxüüne i naega ya Tupana.

50 —Rü nüma ya Tupana rü guxügutáma nüxü tangechaütümüügü ya guxãma ya yixema aixcüma nüxü muüèxẽ.

51 —Rü guxü ga norü poramaã tüxü narüyexera ga guxema tügütama icuèxüügüxe.

52 —Rü marü ínanawoxü ga yema aëxgacügü ga nügü icuèxüügüxü. Natürü guxema duũxëgü ga tama tügü icuèxüügüxe, rü poraacü tüxü narüngüxẽ.

53 —Rü guxema tüxü nataxúxe, rü muxüma tüxna naxã. Natürü guxema muãrü dĩeruãxgüxe rü taxuũma tüxna naxããcüma tüxü ínimugü.

54 —Rü poraacü nüxü narüngüxẽ ga norü duũxügü ga Yudíugü. Rü tama nüxü inarüngüma na nüxü ingechaütümüügüxü, yexgumarüü ga nuxcümaügüxü ga tatanüxümaã na inaxunetaxü.

55 —Yerü yemaãcü inaxuneta namaã ga tórü õxi ga Abráü rü namaã ga tatanüxügü na guxügutáma tüxü nangüxẽxü —ngĩgürügü ga María.

56 Rū tomaèxpüx ga tauemacü Erichabéxütagu irüxãüx ga María. Rū ñuxüchi ngĩpatacèx itaegu.

Cuãü ga baiüxẽẽruũrü buxchiga

57 Rū nawa nangu ga ngunexũ ga na naxíraxacũxũ ga Erichabé. Rū nayatũ ga ngĩxãcü.

58 Rū yexguma nüxũ nacuèxgũgu na ñuxãcü Tupana ngĩmaã mecũmaxũ, rü ngĩrũ ngaicamagu pegũxũ ga duũxũgũ rü ngĩtanũxũgũ rü ngĩxũ ínayadaugũ, rü ngĩxũ narũmoxẽgũ rü ngĩxũ nayataãẽgũxẽẽ.

59 Rū 8 ga ngunexũguwena rü ínayawiechèxmüpẽxechiraũgũ ga guma ngĩne. Rū nanatũ ga Zacaríagu nanaxüéagũchaũ ga duũxũgũ.

60 Natürü naẽ ga Erichabé rü tama inaxwèxe. Rū ngĩgürügũ: —Narũmemaẽ nixĩ i Cuáũgu tanaxüéga —ngĩgürügũ.

61 Rū duũxũgũ rü ñanagürügũ ngĩxũ: —¿Tũxcüũ cunaxwèxe i ngẽma naega? Erü cutanũxũtanüwa rü tataxuma ya texé ya ngẽmagu ãegaxe —ñanagürügũ.

62 Rū yexguma ga duũxũgũ rü naxmẽxwa nanatũ ga Zacaríana nacagüe ga tacü rü naegagu tá na naxüégaãxũ.

63 Rū yexguma ga Zacarí rü poperaxũ naxuneta na yexma na naxümatüãxũcèx ga naega. Rū yexma nanaxümatü, rü ñanagürü:

“Cuáũ tá nixĩ i naega”, ñanagürü ga namatü. Rū guxũma ga duũxũgũ rü nabaixãchiãẽgũ ga yexguma yema naegaxũ nadaugũgu.

64 Rū yexgumatama wenaxãrũ nidexa ga Zacarí. Rū inanaxügũ ga Tupanaxũ na yacuèxũxũ.

65 Rū yemacèx guxũma ga yema duũxũgũ ga norü ngaicamagu ãpatagũxũ rü poraãcü

nabaixãchiãëgü. Rü guxũwama ga yema naãnewa ga Yudeaanewa rü duũxũgü nüxũ nixuchigagü ga yema ngupetũxũ.

⁶⁶ Rü guxũma ga nüxũ cuáchigagũxũ ga yema ngupetũxũ, rü nügũãxẽwa nagu narũxĩnũẽẽcha, rü ñanagürügü: —¿Tacü tá nixĩ i ngẽma buxũ? Erü Tupana rü aixcũma naxũtawa nangẽxma — ñanagürügü.

Zacaría rü Tupanaxũ nicuèxũũ

⁶⁷ Rü nanatü ga Zacaríana nangu ga Tupanaãë i Üünexũ. Rü nüxũ nixu ga yema ore ga Tupana namaã nüxũ ixuxũ.

⁶⁸ Rü ñanagürü: —Name nixĩ i nüxũ ticuèxũũgü ya tórü Cori ga nuxcũmaũcü ga tórü oxi ga Iraéarü Tupana. Erü núma tatanüwa nangu na tũxũ yamaxẽxẽẽxũcèx i yixema i norü duũxũgü na ixĩgũxũ.

⁶⁹ —Rü ngẽmacèx tũxna nanamu ya wüxi ya poracü ya tórü maxẽxẽẽruũ ga nuxcũmaũcü ga norü duũxũ ga Dabítanũxũwa ne ücü.

⁷⁰ —Rü yemaãcü Tupana tamaã inaxuneta nawa ga yema nuxcũmaũgũxũ ga norü orearü uruũgü ga üünegũxũ.

⁷¹ —Rü yema orearü uruũgüwa nüxũ nixu rü tá tũxũ ínanguxũxẽë naxmẽxwa i tórü uwanügü rü guxũma i ngema duũxũgü i taxchi aixxũ.

⁷² —Rü nuxcũmaũgũxe ga tórü oxigũmaã nüxũ nixu na nüxũ tangechaũtũmũũgũxũ rü tagutáma nüxũ iyanangũmaxũ ga yema tũmamaã inaxunetaxũ.

⁷³⁻⁷⁵ —Rü yemaãcü ga Tupana rü nuxcũmaũcü ga tórü oxi ga Abráũmaã inaxuneta. Rü namaã nüxũ

nixu rü tá tüxü ínanguxüxëẽ nüxna i tórü uwanügü na tama imuñëãcüma naxüxücèx i Tupanaârü puracü rü aixcüma mecü na ixīgüxü napéxewa i guxü i tórü maxüwa i wüxichigü i ngunexügu —ñanagürü ga Zacaríá.

⁷⁶ Rü ñanagürü ta: —Cumax, Pa Chaunex, rü Tupana ya Taxüchicüarü orearü uruñmaã tá cuxü naxugü. Erü cuma rü tá Corixüpa yoxni duñxügümaã nüxü quixu i nachiga ya Cori.

⁷⁷ —Cuma rü Coriarü duñxügüxü tá nüxü cucuèxëẽ na Tupana tá nüxü nüxü ngechaüxü i norü pecadugü na ngëmaãcü nayauxgüãxücèx i maxü i taguma gúxü.

⁷⁸⁻⁷⁹ —Erü nüxü tangechaütümüügü ya Tupana ya poraãcü tüxü ngechaücü. Rü ngëmacèx daxügüxü i nañnewa taxcèx ne nanamu i ñoma i nañneârü ngóonexëẽruñ i ngexwacaxüxü na nangóonetanüxëãxücèx i ngëma duñxügü ga noxri guxüguma norü chixexügagu ãücümaxüwa yexmagüxü. Rü nüma tá tüxü narüngüxëẽ na Tupanamaã rüngüxmüèxücèx —ñanagürü ga Zacaríá.

⁸⁰ Rü yema buxü rü niyachigü rü wüxichigü ga ngunexügu yexeraãcü Tupanaxü nicuáchigü. Rü dauxchita ga ngextá taxúema íxãpataxüwa nayexma ñuxmata yema ngunexüwa nangu ga na Yudíngüxü nügü nacuèxëẽxü.

2

Ngechuchuarü buxchiga
(Mt 1.18-25)

¹ Rū yexguma Agutu ãëxgacü ga tacü ixĩxgu ga Dumawa, rü nanaxunagü ga na yaxugüãxũ ga guxũma ga duũxügü ga guxũ ga naãnewa.

² Rū yema nüxĩraũxũ ga duũxügüarü ugüchiga, rü nanaxü ga yexguma Quirinu ãëxgacü ixĩxgu ga Chĩriaarü naãnewa.

³ Rū guxũma ga duũxügü rü wüxichigü norü ããne ga nagu nabuxũnewa nixũchigü ga yéma na yaxugüãxũcèx.

⁴ Rū yemacèx ga Yúche rü Gariréaanewa yexmane ga ããne ga Nacharétuwa ínaxũxũ, rü Yudéaarü naãnewa yexmane ga ããne ga Beréũwa naxũ. Rū guma nixĩ ga ããne ga nuxcümaũcü ga ãëxgacü ga Dabí nagu buxũne. Rū yemacèx nixĩ ga Yúche ga yéma naxũxũ, yerü Dabítanũxũ nixĩ ga nümax.

⁵ Rū Beréũwa naxũ ga Yúche na yaxugüxũcèx wüxigu ngĩmaã ga María ga ngĩmaã naxãmèxchaũcü. Natürü ga María rü itacharaũ ga na naxãxãcüxũ.

⁶ Rū yexguma Beréũwa nayexmagüyane, ngĩxna nangu ga ngĩrü ngunexũ ga na naxíraxacüxũ ga María.

⁷ Rū yexma nabu ga nüxĩraũcü ga ngĩne. Rū naxchápenüũmaã inanunque. Rū wüxi ga wocaarü chibüchicagumare inacanagüxëë, yerü marü guxũma nixããcu ga ucapu nawa ga guma pegüpataũ.

Tupanaãrü orearü ngeruũ ga daxüçüãx rü carnerugüarü dauruũcèx nangox

⁸ Rū Beréũãrü ngaicamana nayexmagü ga ñuxre ga carnerugüarü dauruũgü ga chütacü nachitaũwa norü carnerugüna ídaugüxũ.

9 Rū ngürüãchi yema carnerugüarü dauruügücèx nangox ga wüxi ga orearü ngeruü ga daxüçüãx. Rū Cori ya Tupanaârü üüne rü nawa nayexma rü yemacèx poraâcü nangóone. Rū yema carnerugüarü dauruxügü rü poraâcü namuüê.

10 Natürü yema orearü ngeruü ga daxüçüãx, rü ñanagürü nüxü: —¡Tãxü i pemuüëxü! erü pexcèx nuã chanange i wüxi i ore i mexèchixü i guxü i duüxügüarü taãxëëruü tá ixixü.

11 —Erü ñuxma rü Beréügu nabu ya perü maxëxëëruü. Rū nüma rü Cori ya Cristu nixi.

12 —Rū ñaã tá nixi i perü cuèxruü. Rū tá nüxü ipeyangau i wüxi i õxhana i naxchápenüümaã nuquexü rü wocaarü chibüchicagu caxü — ñanagürü.

13 Rū yexgumatama ngürüãchi yema daxüçüãx ga orearü ngeruüxütawa nangox ga muxüma ga togü ga daxüçüãx ga orearü ngeruügü. Rū Tupanaxü nicuèxüügü, rü ñanagürügü:

14 —Rū ñuxma rü Tupanaxü ínicuèxüügü rü ínataãëgü i daxüguxü i naãnewa. Rū pema i ñoma i naãnecüãx i Tupana pemaã taãëgüe, rü name nixi i pegümaã perüngüxmüê —ñanagürügü.

15 Rū yexguma daxüwa naxixguwena ga yema orearü ngeruügü rü yema carnerugüarü dauruügü rü nügümaã ñanagürügü: —¡Ngixã Ítayadau i Beréüwa i ngëma ngupetüxü i Cori ya Tupana tamaã nüxü ixuxü nawa i norü orearü ngeruügü! —ñanagürügü.

16 Rū paxa inaxiãchi, rü yéma naxi. Rū yexma inayangaugü ga Yúche rü María rü guma bucü ga wocaarü chibüchicagu cacü.

17 Rū yexguma yema bucūxū nadaugūgu ga yema carnerugūarū dauruūgū, rū duūxūgūmaã nūxū nixugūe ga yema ore ga Tupanaārū orearū ngeruū ga daxūcūāx namaã nūxū ixuxū ga guma bucūchiga.

18 Rū guxūma ga duūxūgū ga nūxū ĩnūēxū ga yema carnerugūarū dauruūgūarū ore rū namaã nabaixāchiāēgū.

19 Natūrū ga María rū inayaxu ga guxūma ga yema ngupetūxū rū ngĩāēgu namaã inguxū rū nagu irūxĩnūēcha.

20 Rū nawoegu ga yema carnerugūarū dauruūgū. Rū taāēācūma Tupanaxū nicuēxūūgū naxcēx ga guxūma ga yema nūxū naxĩnūēxū rū nūxū nadaugūxū yerū aixcūma yema orearū ngeruū ga daxūcūāx namaã nūxū ixuxūācūma nangupetū.

Bucū ga Ngechuchu rū tupauca ga taxūnewa nanagagū

21 Rū yexguma 8 ga ngunexū nūxū yexmagu ga na nabuxū ga ōxchana, rū ĩnanawiechēxmūpēxechiraūgū. Rū Ngechuchugu nanaxūégagū. Rū yematama nixĩ ga naega ga daxūcūāx ga Tupanaārū orearū ngeruū Maríamaã nūxū ixuxū ga tauta namaã naxāxācūgu.

22 Rū yexguma marū yanguxgu ga yema ngunexū na tupauca ga taxūnewa Tupanapēxewa na nūgū yamexēēgūxū rū yéma naxĩ na yemaācū Tupanapēxewa yanguxēēgūāxūcēx ga yema Moīchēarū mugū nūxū ixuxūrūū. Rū Yerucharéūwa ga tupauca ga taxūnewa nanagagū ga guma bucū na Tupanana namugūāxūcēx.

23 Rū yemaãcü nanaxügü yerü Tupanaârü mugüwa naxümatü, rü ñanagürü:

“Ngëxguma wüxi i nge rü nayatügu i nüxĩraũxü i ngĩxãcü, rü name i Cori ya Tupanana inamu”,

ñanagürü.

24 Rū yéma naxĩ rü yéma nanagagü ga taxre ga muxtucugü ga yexwacèx yaexü, na Tupanacèx nadaiãxüçèx ga paigü ga tupaucawa, yerü yema ñanagürü ga Tupanaârü mugüwa.

25-26 Rū yexgumaücüü Yerucharéügu naxãchiü ga wüxi ga yatü ga Chimeügu ãegacü. Rū wüxi ga yatü ga mecümacü nixĩ ga nümax, rü aixcüma Tupanaxü ngechaücü nixĩ. Rū nüma rü guxüguma Ínananguxëë na ñuxguacü tá Ínanguxü ya Yudíugüarü nguxüxëëruü ya Cristu. Rū Tupanaãë i Üünexü rü Chimeüxütawa nayexma, rü nüxü nüxü nacüxëë na tãütáma nayuxü ega tama nüxü nadauxiragu ya Cristu ya Cori ya Tupana núma namucü.

27 Rū yema ngunexügu rü tupauca ga taxünewa Chimeüxü naxüxëë ga Tupanaãë i Üünexü. Rū yéma nayexma ga Chimeü ga yexguma Yúche rü María tupaucawa nagagügu ga guma bucü ga Ngechuchu na Tupanana namugüãxüçèx na yemaãcü yanguxëëgüãxüçèx ga Moĩchëarü mu.

28 Rū Ngechuchuxü naganagü ga Chimeü. Rū Tupanaxü nicüxüü, rü ñanagürü:

29 —Pa Corix, ñuxma rü marü name na chayuxü, erü marü cuyanguxëë ga yema chomaã icuxunetaxü.

30-31 —Rü chauxetümaãxüchi nüxü chadau ya daa Maxëxëëruü ya guxü i duüxügüçèx núma cunamucü.

32 –Rü nüma nixĩ i ngóonexëëruũ naxcèx i guxũma i duũxũgü i tama Yudíugü ixĩgũxũ. Rü ñaã õxchanagagu rü togü i duũxũgü tá nüxũ nicuèxüũgü i curü duũxũgü i Yudíugü –ñanagürü.

33 Rü Yúche rü María rü nabaixãchiãëgü namaã ga Chimeũrũ ore ga ñuxãcü guma õxchanachigamaã na yadexaxũ.

34 Rü yexguma ga Chimeũ rü Tupanana naca na meã nüxũ nangupetügüxüçèx ga Yúche rü María rü guma õxchana. Rü ñanagürü ngĩxũ ga María ga Ngechuchu naë: –Düçèx, daa õxchana rü tá nanamaxëxëë i muxũma i Yudíugü, natürü ngẽma tama nüxũ yaxõgüchaũxũ rü tá inayarütauxe. Rü nüma rü wüxi i cuèxruũ tá nixĩ i duũxũgüçèx, rü muxũma tá nüxũ naxoe.

35 –Rü ngẽmaãcü tá nanangoxëëãma i guxũma i naãëwa nagu naxĩnüëxũ i muxũma i duũxũgü. Rü guxũma i ngẽma tá ñaã õxchanaxũ ngupetüxũ rü ñoma wüxi i cüxchi i curü maxũnewa yarüwáxũrüũ tá cuxũ nangux, Pa Maríax –ñanagürü.

36 Rü yéma ta iyexma ga wüxi ga ngecü ga Tupanaãrũ orexũ ixucü. Rü Ana nixĩ ga ngĩëga. Rü Panuëxãcü iyixĩ, rü Ácherutanüxũ iyixĩ. Rü marü yaguãxũchi iyixĩ. Rü yexguma napaxüchigutama ixãte. Natürü 7 ga taunecü- guxicatama ngĩtemaã iyarüxũüxũ, yerü nayu ga ngĩte.

37 Rü yemaãcü wüxi ga yutecü ga yaguãxũchi iyixĩ, yerü 84 nixĩ ga ngĩrü taunecü. Rü taguma tupauca ga taxũnewa íixũxũ. Rü guxũguma ngunecü rü chütacü rü naxaureãcüma iyumüxëëcha. Rü yemaãcü Tupanaxũ iyacuèxüũ rü inataxëë.

38 Rü yexgumatama Chimeũ íidexayane, rü yéma

ingu ga Ana. Rū Tupanana moxē ixā. Rū iinaxūgū ga õxchana ga Ngechuchuchiga na yadexaxū napéxewa ga guxūma ga yema Yudíugū ga Yerucharéũãx ga Cristuxū ínanguxēẽgūxū na norū nguxuchixēẽruū yĩxūcèx.

Ĩãne ga Nacharéucèx nawoegu

³⁹ Rū yexguma marū yanguxēẽgūãguwena ga guxūma ga yema Tupanaãrū mugū nūxū ixuxū, rū Yúche rū María rū naxcèx nawoegu ga norū ĩãne ga Nacharéu ga Gariréaanewa yexmane.

⁴⁰ Rū guma bucū rū niyachigū, rū yexeraãcū niporachigū, rū yexeraãcū nūxū nicuáchigū. Rū Tupana rū poraãcū nūxū narüngūxēẽ.

Bucū ga Ngechuchu rū tupauca ga taxūnewa naxo

⁴¹ Nanatū rū naē rū gucū ga taunecūgu Yerucharéũwa taxĩxū naxcèx ga Üpetüchigaarū peta.

⁴² Rū yexguma Ngechuchu 12 ga taunecū nūxū yexmagu, rū Yerucharéũwa taxĩ namaã ga nanatū rū naē, yerū yema nixĩ ga Yudíugücūma naxcèx ga Üpetüchigaarū peta.

⁴³ Rū yexguma yagúechigagu ga Üpetüchigaarū peta, rū tūmachiũcèx tawoegu ga nanatū rū naē. Natürü ga Ngechuchu rū tūmaēchita tūxna Yerucharéũgu narüxãũx.

⁴⁴ Rū tūma nūxū tacuèxgūgu rū yema muxū ga duũxūgū ga tūmaweama ixĩxūtanüxūtanūgu naxã ga Ngechuchu. Rū yemaãcū marū itaxĩ ga wūxi ga ngunexū. Natürü yexguma naxcèx tadaugūgu tūmatanüxūtanūgu rū yema tūxū cuèxgūxūtanūgu rū tama nūxū itayangaugū.

45 Rū yemacèx wenaxârū Yerucharéŭcèx tawoegu na yexma naxcèx tayadaugŭxŭcèx.

46 Rū tomaēxpŭx ga ngunexŭguwena Ngechuchuxŭ itayangaugŭ ga tupauca ga taxŭnegu. Rū yéma narŭto natanŭwa ga yema ngŭexēēruŭgŭ ga Tupanaârū mugŭwa ngŭxēētaegŭxŭ, rŭ inarŭxŭnŭ ga norŭ ngŭxēētae, rŭ nŭxna nicachigŭ.

47 Rū guxŭma ga yema duŭxŭgŭ ga Ngechuchuxŭ ĩnŭēxŭ, rŭ nabaixāchiāēgŭ na ñuxācŭ nŭxŭ nacuèxŭchixŭ rŭ meāma nangāxŭāxŭ.

48 Rū yexguma nanatŭ rŭ naē nŭxŭ daugŭgu rŭ taḃaixāchiāēgŭ. Rū naē rŭ ñatarŭgŭ nŭxŭ: — Pa Chaunex, ¿tŭxcŭŭ tomaā ngexŭ cuwagŭ? Cunatŭ rŭ choma rŭ poraācŭ cuxcèx taxoegaāēācŭma cuxcèx tadaugŭecha —ñatarŭgŭ.

49 Rū yexguma ga Ngechuchu rŭ ñanagŭrŭ: —¿Tŭxcŭŭ chauxcèx pedaugŭ? ¿Tama ēxna nŭxŭ pecuèx na woetama Chaunatŭchiŭwa tá changēxmaxŭ? —ñanagŭrŭ.

50 Natŭrŭ ga tŭmagŭ rŭ tama nŭxŭ tacuèxgŭéga ga yema tŭmamaā nŭxŭ yaxuxŭ.

51 Rū yexguma ga Ngechuchu rŭ tŭmawe nataegu ga Nacharétuwa. Rū guxŭguma meā tŭmaga naxŭnŭēcha. Rū naē ga María rŭ ngŭāēwa nagu irŭxŭnŭēcha ga guxŭma ga yema ngupetŭxŭ.

52 Rū niyachigŭ ga Ngechuchu, rŭ yexeraācŭ nŭxŭ nicuāchigŭ. Rŭ Tupana rŭ namaā nataāē, rŭ guxŭma ga duŭxŭgŭ rŭ ta namaā nataāēgŭ.

*Cuáü ga baiüxëëruü nüxü nixu ga Tupanaarü ore
ga dauxchitawa ga ngextá taxúema íxãpataxüwa
(Mt 3.1-12; Mr 1.1-8; Cu 1.19-28)*

¹ Rü yexguma Tibériu 15 ga taunecü Dumaarü ãëxgacü yixĩxgu, rü yexguma nixĩ ga Põüchiu Piratu rü Yudéaaneärü ãëxgacü yĩxü, rü Erode rü Gariréaaneärü ãëxgacü yĩxü, rü naëneë ga Piripi rü Itúreaane rü Traconíteaneärü ãëxgacü yĩxü, rü Lichániã rü Abiríniããneärü ãëxgacü yĩxü.

² Rü yexguma ga Aná rü Caipá rü paigüeru nixĩgü. Rü yexguma nixĩ ga Zacaría nane ga Cuáümaã yadexaxü ga Tupana ga dauxchitawa ga ngextá taxúema íxãpataxüwa.

³ Rü guxüma ga yema nachicagü ga Yudáücutüarü ngaicamana yexmagüxügu nixügüchigü ga Cuáü. Rü duüxügümaã nüxü nixuchigü na nüxü naxoexücèx ga nacümagü ga chixexü rü ínabaiüxücèx na yemaãcü Tupana nüxü nüxü rüngümaxücèx ga norü pepadugü.

⁴ Rü guma nuxcümaücü ga Ichaxía ga Tupanaarü orearü uruü naxümatüxürüü nixĩ ga nangupetüxü. Yerü duüxügüarü maxüärü mexëëchigaxü nixu ga yexguma ñaxgu:

“Ngëma nachica i ngextá taxúema íxãpataxüwa rü tá nangëxma i wüxi i duüxü i ngëma tagaãcüma ñaxü: ‘¡Pegü pemexëë naxcèx ya Cori! ¡Rü naxcèx ipeyanawëxãchixëë i perü maxü!’

⁵ Rü guxãärü maxü rü tá inayarüwëxãchi ñoma wüxi i ngatexü rügütaxürüü na iyawéxücèx i nama. Rü guxãma ya yixema togüétüwa tügü ngëxmaxëëgüxe rü tá ítarüxĩ ñoma wüxi ya mèxpüne rü wüxi i ngüchitaeru idoxochixëëxürüü. Rü

guxŭma i nacŭma i wŭxŭ rŭ t inayarŭwĕxchigŭ.
Rŭ ngĕma duŭxŭgŭarŭ maxŭwa tama mexŭ rŭ t
nayamexĕĕgŭ.

6 Rŭ guxŭma i duŭxŭgŭ rŭ t nŭxŭ nadaugŭ ya
yima Maxĕxĕĕruŭ ya Tupana nŭma namucŭ”,
ñanagŭrŭ ga Ichaxa ũmatŭxŭ ga ore.

7 Rŭ yexguma Cuxŭtawa naxĭxgu ga duŭxŭgŭ
na nabaiŭxĕĕxŭcĕx, rŭ nŭma ga Cuŭ rŭ
ñanagŭrŭama nŭxŭ: —Pa xtapearŭ Duŭxŭgŭx
¿Rŭ ñuxcŭ nagu perŭxĭnŭe na naxchaxwa
pibuxmŭxŭ i ngema poxcu i marŭ ingaicamaxŭ
ega tama nŭxŭ perŭxoegu i pecŭma i chixexŭ?

8 —¡Rŭ me pemaxĕ na ngĕmacŭ guxŭma i
duŭxŭgŭ nŭxŭ daugŭxŭcĕx na aixcŭma marŭ
nŭxŭ perŭxoexŭ i pecŭma i chixexŭ! Rŭ tama name
i ñaperŭgŭgŭ:

“Tttma Tupana toxŭ napoxcue, erŭ
Abrtanŭxŭ tixĭgŭ” ñaperŭgŭgŭ. Erŭ tama
ngĕmacĕx nixĭ ya Tupana i duŭxŭgŭxŭ nayaxuxŭ.
Rŭ pema nŭxŭ chixu rŭ ngĕxguma Tupana
naxwĕxegu rŭ tama nŭxŭ naguxcha na daa
nutawa Abrtanŭxŭ nanguxŭxĕĕxŭ.

9 —Tupanarŭ yuema rŭ marŭ memare na
yadaxŭxŭcĕx i ngĕma nanetŭgŭ i tama mexŭ. Rŭ
guxŭma i nanetŭgŭ i chixearŭ oĕxŭ rŭ t nadaxŭ,
rŭ ñuxŭchi ũxŭwa t nagu —ñanagŭrŭ ga Cuŭ.

10 Rŭ yexguma ga duŭxŭgŭ rŭ Cutna nacagŭ,
rŭ ñanagŭrŭgŭ: —¿Tcŭ ĕxna nixĭ i mexŭ na
tanaxŭxŭ? —ñanagŭrŭgŭ.

11 Rŭ Cuŭ rŭ nanangxŭ rŭ ñanagŭrŭ: —Texĕ
ya taxrearŭ guxŭchiruxĕ rŭ name nixĭ i texĕ
ya tŭxŭ nataxŭxena tanax. Rŭ texĕ ya oñaxĕ rŭ

name nixĩ i texé ya ngearü ònaãxēmaã tangau i tūmaãrū òna —ñanagürü.

12 Rū Cuáũxütawa naxĩ ta ga ñuxre ga yatügü ga Dumaãrū ãëxgacücèx dīeru ngĩxũ ideetanũxũ. Rū nanaxwèxegü ga Cuáũ na ínabaiũxēẽxũ. Rū Cuáũna nacagü, rü ñanagürügü: —Pa Ngúexēẽruũx, ¿Tacü nixĩ i mexũ na tanaxũxũ i tomax? —ñanagürügü.

13 Rū Cuáũ rü ñanagürü nüxũ: —Tama name i ãëxgacü pemaã nüxũ ixuxũãrū yexera penayauxgü i dīeru i duũxũgũxütawa —ñanagürü.

14 Rū ñuxre ga churaragü rü ta Cuáũna nacagüe, rü ñanagürügü: —¿Toma rü tacü nixĩ i mexũ na tanaxũxũ? —ñanagürügü. Rū nanangãxũ ga Cuáũ rü ñanagürü: —Tama name i texéxũ pexãxũneãcūma tūmaãrū ngẽmaxũgü pepuxũ. Rū tama name i tacü rü doraxũ tūmachigaxũ pixu na ngẽmaãcü tūmaãrū ngẽmaxũgü pepuxũxũcèx. Rū name nixĩ i ngẽma dīeru i ãëxgacü pexũ ngĩmaã naxütanücūmaãtama petaãëgü rü tama yexeracücèx ípeca —ñanagürü.

15 Rū yexguma ga duũxũgü rü poraãcü ínanguxēëgü na paxa ínanguxũ ga Tupana Nane ga Cristu. Rū nagu narüxĩnüë ga na bexmana Cuáũ rü Cristu yĩxũ.

16 Natürü ga Cuáũ rü guxãxũ ñanagürü: —Aixcūma i choma rü dexáwamare pexũ íchabaiũxēẽ, natürü tá ínangu i to i Tupanaãrū orearü uruũ, rü nüma tá pexna nananguxēẽ i Tupanaãë i Üünexũ wüxi i üxüemarũ. Erü nüma rü poraãcü choxũ narüyexera na ãëxgacü yĩxũ. Rū choma rü napëxewa rü taxuwama chame rü bai i norü

chapatucunüârü wëgüwa chame.

17 –Rü nüma rü marü ínamemare na ñoma i nañnewa yadexechiãxücèx i norü duüxügü ñoma wüxi ya yatü trigu naätüna idexechixürüü. Rü ngëmaâcü tá nayadexechi i ngëma noxrü ixīgüxü na naxü- tawa nangëxmagüxücèx, natürü ngëma tama noxrü ixīgüxü, rü tá ínanagu nawa ya yima üxü ya taguma ixoxüne –ñanagürü.

18 Rü yema oremaã rü muxüma ga to ga ucuxëgümaã, rü Cuáü duüxügümaã nüxü nixu ga ore ga mexü ga Ngechuchuchiga.

19 Rü Cuáü rü âëxgacü ga Erodexü nanga, yerü ngïmaã naxâmèx ga Erodía ga naëneë ga Piripi namèx. Rü nananga ta naxcèx ga yema togü ga chixexü ga naxüxü.

20 Natürü ga Erode rü tama Cuáüga naxïnü. Rü yexeraxü ga chixexü naxü, yerü poxcupataüwa Cuáüxü namu.

Ngechucharü baiechiga
(Mt 3.13-17; Mr 1.9-11)

21 Rü yexguma taxüta napoxcugu ga Cuáü, rü guxü ga duüxügüxü ínbaiüxëëxyane, rü yexguma ta nixi ga Ngechuchuxü ínbaieüxëëxü. Rü yexguma Ngechuchu íyumüxëyane rü ningena ga daxüguxü ga naäne.

22 Rü Tupanaãe i Üünexü rü wüxi ga muxtucurüü inanago rü Ngechuchuna nangu. Rü daxüwa inanaxü ga wüxi ga naga ga ñaxü: –Cuma nixi, Pa Chaunex, i cuxü changechaüxüchixü rü cumaã chataãëxü –ñaxü.

*Ngechuchu ya Cristu natanüwa ngóxũ ga
duũxũgüchiga*

(Mt 1.1-17)

23 Ngechuchu rü 30 ga taunecü nüxũ
nayexma ga yexguma ínaxüğüãgu na guxũwama
duũxũgümaã nüxũ yaxuxũ ga Tupanaarü Ore. Rü
duũxũgü nagu narüxĩnüẽ rü Yúche nane nixĩ ga
nümax.

Rü Yúche rü Erí nane nixĩ.

24 Rü Erí rü Matáx nane nixĩ.

Rü Matáx rü Lebí nane nixĩ.

Rü Lebí rü Merequí nane nixĩ.

Rü Merequí rü Yana nane nixĩ.

Rü Yana rü Yúche nane nixĩ.

25 Rü Yúche rü Matatía nane nixĩ.

Rü Matatía rü Amó nane nixĩ.

Rü Amó rü Naũũ nane nixĩ.

Rü Naũũ rü Echi nane nixĩ.

Rü Echi rü Nagaí nane nixĩ.

26 Rü Nagaí rü Maãx nane nixĩ.

Rü Maãx rü Matatía nane nixĩ.

Rü Matatía rü Chemeĩ nane nixĩ.

Rü Chemeĩ rü Yuchéx nane nixĩ.

Rü Yuchéx rü Yudá nane nixĩ.

27 Rü Yudá rü Yuanáũ nane nixĩ.

Rü Yuanáũ rü Récha nane nixĩ.

Rü Récha rü Chorobabé nane nixĩ.

Rü Chorobabé rü Charatía nane nixĩ.

Rü Charatía rü Nerí nane nixĩ.

28 Rü Nerí rü Merequí nane nixĩ.

Rü Merequí rü Adí nane nixĩ.

Rü Adí rü Cocháũ nane nixĩ.

Rü Cocháũ rü Elmadáũ nane nixĩ.

Rü Elmadáũ rü Erú nane nixĩ.

29 Rü Erú rü Yochué nane nixĩ.

Rü Yochué rü Erieché nane nixĩ.

Rü Erieché rü Yoríũ nane nixĩ.

- Rü Yoríũ rü Matáx nane nixĩ.
 Rü Matáx rü Lebí nane nixĩ.
 30 Rü Lebí rü Chimeũũ nane nixĩ.
 Rü Chimeũũ rü Yudá nane nixĩ.
 Rü Yudá rü Yúche nane nixĩ.
 Rü Yúche rü Yonáũ nane nixĩ.
 Rü Yonáũ rü Eriaquíũ nane nixĩ.
 31 Rü Eriaquíũ rü Meréa nane nixĩ.
 Rü Meréa rü Ména nane nixĩ.
 Rü Ména rü Matáta nane nixĩ.
 Rü Matáta rü Natáũ nane nixĩ.
 Rü Natáũ rü Dabí nane nixĩ.
 32 Rü Dabí rü Ichaxí nane nixĩ.
 Rü Ichaxí rü Obé nane nixĩ.
 Rü Obé rü Boó nane nixĩ.
 Rü Boó rü Cháru nane nixĩ.
 Rü Cháru rü Nachóũ nane nixĩ.
 33 Rü Nachóũ rü Aminadá nane nixĩ.
 Rü Aminadá rü Admíũ nane nixĩ.
 Rü Admíũ rü Arni nane nixĩ.
 Rü Arni rü Esróũ nane nixĩ.
 Rü Esróũ rü Fare nane nixĩ.
 Rü Fare rü Yudá nane nixĩ.
 34 Rü Yudá rü Acóbu nane nixĩ.
 Rü Acóbu rü Ichaá nane nixĩ.
 Rü Ichaá rü Abráũ nane nixĩ.
 Rü Abráũ rü Taré nane nixĩ.
 Rü Taré rü Nacúx nane nixĩ.
 35 Rü Nacúx rü Cherúx nane nixĩ.
 Rü Cherúx rü Ragáu nane nixĩ.
 Rü Ragáu rü Peréx nane nixĩ.
 Rü Peréx rü Ebéx nane nixĩ.
 Rü Ebéx rü Cháru nane nixĩ.
 36 Rü Cháru rü Caináũ nane nixĩ.
 Rü Caináũ rü Arpacháx nane nixĩ.
 Rü Arpachá rü Chéũ nane nixĩ.
 Rü Chéũ rü Noe nane nixĩ.
 Noe rü Laméx nane nixĩ.

- 37 Rũ Laméx rũ Matucharéũ nane nixĩ.
 Rũ Matucharéũ rũ Enóx nane nixĩ.
 Rũ Enóx rũ Yaréx nane nixĩ.
 Rũ Yaréx rũ Maararéx nane nixĩ.
 Rũ Maararéx rũ Caináũ nane nixĩ.
- 38 Rũ Caináũ rũ Enóx nane nixĩ.
 Rũ Enóx rũ Chex nane nixĩ.
 Rũ Chex rũ Adáũ nane nixĩ.
 Rũ Adáũ rũ Tupana nane nixĩ.

4

Ngechuchuxũ naxü ga Chataná (Mt 4.1-11; Mr 1.12-13)

¹ Ngechuchuxütawa nayexma ga Tupanaãe i Üünexũ. Rũ yexguma Yudáũchiüwa ínaxũãchigu ga Ngechuchu, rũ Tupanaãe i Üünexũ rũ dauxchitawa ga ngextá taxüema íxãpataxüwa nanaga.

² Rũ yéma nayexma ga 40 ga ngunexũ. Rũ ngoxo ga Chataná rũ nüxũ naxü. Rũ yexguma yéma nayexmagu rũ taguma nachibü. Natürü ga yixcama rũ nataiya.

³ Rũ yexguma ga ngoxo ga Chataná rũ ñanagürü nüxũ: —Ega aixcüma Tupana Nane quixĩgu, rũ ;daa nutamaã nüxũ ixu na pãũxũ nanguxuchixüçè! — ñanagürü ga Chataná.

⁴ Rũ Ngechuchu nanangãxũ rũ ñanagürü: —Tupanaãrü ore i ümatüxüwa rũ ñanagürü: “Tãütama õnamaãxĩca namaxẽ i duũxügü, natürü guxüma i ore i Tupana nüxũ ixuxũ tá nixĩ i duũxügüxũ maxẽxẽxũ”, ñanagürü.

⁵ Rũ yexguma ga ngoxo ga Chataná rũ wüxi ga mèxpünechitaerüwa nanaga. Rũ yéma paxaãchi

nüxü nüxü nadauxëẽ ga guxüma ga nachiuãnegü ga ñoma ga naãnecüãx.

⁶ Rü Chataná rü ñanagürü nüxü: —Guxü i ñaã nachiuãnegü i mexü rü norü ngëmaxügü rü chi cuxna chanaxã. Erü choxrü nixĩ i guxüma i ñaãgü, rü tüxna chanaxã ya texé ya choma chorü me ixixë na tüxna na chanaxãxü.

⁷ —Rü ngëxguma chi chopëxegu cucaxãpüxügu rü choxü quicuëxüügu rü cuxrü chi nixĩ i guxüma i ñaã cuxü chawéxü —ñanagürü.

⁸ Natürü ga Ngechuchu rü nanangãxü, rü ñanagürü: —¡Choxna ixügachi! Pa Chata- náx. Erü Tupanaärü ore i ümatüxüwa rü ñanagürü:

“¡Nüxü icuëxüü ya Cori ya curü Tupana, rü yimaãxüxĩcatama napuracü!”

ñanagürü.

⁹ Rü yexguma ga ngoxo ga Chataná rü Yerucharëü ga ñãnewa nanaga. Rü tupauca ga taxünetapëxegu nanamunagü. Rü ñanagürü nüxü: —Ega aixcüma Tupana Nane quixĩgu, rü ¡nuã cugü rütæ!

¹⁰ —Erü Tupanaärü ore i ümatüxüwa rü ñanagürü: “Tupana tá nanamu i norü orearü ngeruügü i daxücüãx na cuxna nadaugüxüçèx.

¹¹ Rü naxmëxmaã tá cuxü niyauxgü na tama tacü rü nutagu cunguxüçèx”, ñanagürü.

¹² Rü Ngechuchu nanangãxü rü ñanagürü: —Tupanaärü ore i ümatüxüwa rü ñanagürü ta:

“¡Tama name i nüxü na cuxüxü ya Cori ya curü Tupana!”,

ñanagürü.

¹³ Rü yexguma marü taxucürüwama Ngechuchuxü naxüxgu, rü nüma ga Chataná rü nüxna niña

ñuxmata nuxũ iyangau na ñuxãcü wena nuxũ na naxuxũ.

Ngechuchu rü Gariréaanewa inanaxügü ga norü puracü

(Mt 4.12-17; Mr 1.14-15)

¹⁴ RÜ Ngechuchu rü Gariréaanecèx nataegu. RÜ Tupanaãe i Üünexũ rü naxütawa nayexma rü po-raãcü nanaporaxëe. RÜ ga duũxügü rü nachiga nidexagü ga guxũ ga yema naãnewa.

¹⁵ RÜ wüxichigü ga ñãneãrũ ngutaquëxepataügüwa rü nanguxëëtae. RÜ guxüma ga duũxügü rü nuxũ nicuëxüügü.

Nacharétuwa nayexma ga Ngechuchu

(Mt 13.53-58; Mr 6.1-6)

¹⁶ RÜ Nacharétuwa naxũ ga Ngechuchu. RÜ guma nixĩ ga ñãne ga nanatügü nawa nayaxëëgüne. RÜ ngüxchigaarü ngunexügu rü ngutaquëxepataügu naxücu, yerü yema nixĩ ga nacüma ga guxũ ga ngüxchigaarü ngunexügu. RÜ yéma inachi rü duũxügücèx nuxũ nadaumatü ga Tupanaãrü ore ga ümatüxũ.

¹⁷ RÜ nuxna nanaxãgü ga popera ga Tupanaãrü orearü uruũ ga Ichaxía ümatüxũ. RÜ yexguma yangenaãtüãgu, rü nuxũ inayangau ga ngextá ínaxümatüxüwa ga ore ga ñaxũ:

¹⁸ “Cori ya Tupanaãe rü chauxütawa nangëxma. RÜ nüma rü choxũ naxuneta na nuxũ chixuxüçèx i ore i mexũ namaã i ngëma duũxügü i ngearü ngëmaxüãxgüxũ. RÜ choxũ namu na ngëma duũxügü i pecadutüüwa ngëxmagüxümaã nuxũ na chixuxüçèx

rü tá na ínanguxũxũ. Rü choxũ namu na chayadauchixetũxẽẽgũxũcèx i ngẽma ingexetũgũxũ rü na íchananguxũxẽẽxũcèx i ngẽma duũxũgũ i togũmẽxẽwa ngẽxmagũxũ.

19 Rü núma choxũ namu na duũxũgũmaã nüxũ chixuxũcèx na Tupana nüxũ rüngũxẽẽchaũxũ i ngẽma nüxũ yaxõgũxũ”, ñanagürü ga yema ore.

20 Rü yexguma ga Ngechuchu rü nügũna nananuxãchiátü ga popera. Rü ngutaquẽxepataũãrũ dauruña nanaxã rü ñuxũchi ínarũto. Natürü guxũma ga yema ngutaquẽxepataũwa yexmagũxũ ga duũxũgũ rü nüxũ narũdaunũẽcha.

21 Rü yexguma ga Ngechuchu rü inanaxũgũ ga na yadexaxũ, rü ñanagürü: —Ñuxmatama nixĩ i pepẽxewa Tupana yanguxẽẽxũ i ñaã ore ga Ichaxía ümatũxũ —ñanagürü.

22 Rü guxũma ga duũxũgũ rü meã Ngechuchuchiga nidexagũ. Rü nabaixãchiãẽgũ namaã ga yema ore ga mexũ ga namaã nüxũ yaxuxũ. Natürü tama aixcũma nayaxõgũchaũ. Rü yemacèx nügũna nacagũ rü ñanagürügũ: —¿Taux èxna daa yĩixũ ya Yúche nane? —ñanagürügũ.

23 Rü Ngechuchu rü ñanagürü nüxũ: —Choma nüxũ chachuèx rü tá chomaã penaxuxuchi i ngẽma ore i ñaxũ:

“Pa Duturux ¡Cugütama rü mexẽẽ!” ñaxũ. Rü èxna tá choxũ ñaperügügũ:

“Yema mexũ ga taxũ ga nüxũ taxĩnũẽxũ ga Tupanaãrũ poramaã cuxũxũ ga Capernáũwa, rü tanaxwèxe i nuã curü ñãnewa rü ta na cunaxũxũ”, ñaperügügũ tá.

24 Rū nayadaxēē ga Ngechuchu na yadexaũ rū ñanagürü: —Aixcūma pemaã nüxũ chixu rū guxūma i Tupanaãrū orearü uruũ, rū norü ñānewatama i duũxũgü rū tama meã nanayauxgü.

25 —Rū aixcūma pemaã nüxũ chixu rū Iraéanewa rū nayexma ga muxũchixūma ga ngexũgü ga iyutegũxũ ga yexguma Ería maũxgu. Rū yexguma nixĩ ga tomaēxpũx ga taunecuarü ngãxũ rū taguma napuxũ, rū poraãcü nangúxũ ga taiya ga guxũ ga ñaa nachixũanewa.

26 —Natürü ga Tupana rū tama wüxi ga Iraéanecũãx ga yutecũxütawa Eríaxũ namu. Natürü ngĩxütawa nanamu ga yema yutecü ga Charépacũãx ga Chidãũãrū ñāneãrū ngaicamagu āchiũcü.

27 —Rū yexguma namaũxgu ga Erichéu, rū Iraéanewa nayexmagü ta ga muxūma ga duũxũgü ga chaxünemaã idaaweexũ. Natürü taxuūma ga yema idaaweexũ ga Iraéanewa yexmagũxũ rū naxcèx nitaaneē. Rū Namáũ ga Chíríaanecũãxĩcatama nixĩ ga guma naxcèx yataanecü —ñanagürü ga Ngechuchu.

28 Rū yexguma yema orexũ naxĩnüēgu, rū guxūma ga yema duũxũgü ga guma ngutaquēxepataũwa yexmagũxũ rū poraãcü naxcèx nanuē.

29 Rū inachigü ga duũxũgü rū Ngechuchuxũ ínátèxüchigü ga guma ñānewa. Rū guma mèxpúne ga guma ñāne nawa yexmanechitaeruwa nanagagü na yéma yanataegũãxũcèx.

30 Natürü ga Ngechuchu rū norü ngãxütanüwa ínaxũxũãma, rū ínixũ.

*Wüxi ga yatü ga ngoxo nawa yexmaxüchiga
(Mr 1.21-28)*

³¹ Rû yexguma ga Ngechuchu rû Gariréaaneärü ãne ga Capernáüwa naxü. Rû ngüxchigaarü ngunexügu yéma duüxügüxü nangúexêê.

³² Rû duüxügü rû nabaixächiãëgü namaã ga norü nguxêêtae, yerü Tupanaärü poramaã nidexa.

³³ Rû guma ngutaquëxepataüwa nayexma ga wüxi ga yatü ga ngoxo nawa yexmaxü. Rû aita yéma naxü, rû ñanagürü:

³⁴ —¡Toxna ixügachi! ¿Tüxcüü totanüwa cuxü, Pa Ngechuchux, Pa Nacharétucüãx? ¿Nuã cuxü na toxü cudèixücèx? Choma cuxü chacuèx na Tupana Nane ya Üüncü na quiixü —ñanagürü.

³⁵ Rû Ngechuchu nananga ga yema ngoxo rû ñanagürü: —¡Iyarüngeèx rû ínaxüxü nawa ya yima yatü! —ñanagürü. Rû yexguma ga yema ngoxo rû duüxügüpëxegu nayanguxêê ga guma yatü, rû nawa ínaxüxü. Natürü tama nanapixêê.

³⁶ Rû guxüma ga duüxügü rû nabaixächiãëgü. Rû nügümücügümaãchigü nachiga nidexagü, rû ñanagürügü: —¿Tacü rû ore nixí i ngëma? Erü ñaã yatü rû aixcüma ngëma ngoxogümaã inacuèx rû poraãcü nanamu. Rû nümagü rû naga naxínüê, rû ínachoü —ñanagürügü.

³⁷ Rû guxüwama ga yema naãnewa rû Ngechuchuchigaxü nixugüe ga duüxügü.

*Ngechuchu rû Chimáü ga Pedru nèxècèx nay-
ataanaxêê
(Mt 8.14-15; Mr 1.29-31)*

³⁸ Rû guma ngutaquëxepataüwa ínaxüxü ga Ngechuchu rû Chimáüpatawa naxü. Rû Chimáü

nèxê rü poraãcü iyaxaxüne. Rü Ngechuchuna nacagüe ga ngĩxcèx na yataanexêẽãxücèx.

³⁹ Rü nūma rü ngĩxũtagu nayachi rü narümèxãchi rü nananga ga yema axüne. Rü yexgumatama igèuxãchi ga na yaxaxünexũ. Rü yexgumatama írũda, rü naxcèx inamexêẽ ga õna.

Ngechuchu rü muxūma ga idaaweexüçèx nayataanexêẽ

(Mt 8.16-17; Mr 1.32-34)

⁴⁰ Rü yexguma marü yanaxüçuchaũgu ga üèxcü, rü Ngechuchuxũtawa nanagagü ga guxūma ga duũxũgü ga nagúxũraũxũ ga ðaaweanemaã idaaweexũ. Rü ga Ngechuchu rü wüxichigü ga yema duũxũgüxũ ningögü, rü yemaãcü naxcèx nayataanexêẽchigü.

⁴¹ Rü nanameẽxêẽ ga muxūma ga duũxũgü ga idaaweexũ ga ngoxo nawa yexmagüxũ. Rü yema ngoxogü rü aita naxüe, rü ñanagürügü: —Cuma nixĩ i Tupana Nane quiĩxũ —ñanagürügü. Natürü ga Ngechuchu rü nayangagü ga yema ngoxogü. Rü nüxna nanachuxu ga na yadexagüxũ, yerü yema ngoxogü rü nüxũ nacuèxgü na Cristu yĩxũ.

Ngechuchu rü nanaxunagü ga ore ga mexũ ga ngutaquẽxepataĩwachigü

(Mr 1.35-39)

⁴² Rü yexguma noxri yangóonegu rü yema ñãnewa ínaxũxũ ga Ngechuchu. Rü wüxi ga nachica ga taxúema íxãpataxũwa naxũ. Natürü ga duũxũgü rü naxcèx nadaugü rü düxwa naxũtawa nangugü. Rü nüxũ nacèèxũgü ga tama na ínaxũxũxücèx ga yema norü naãnewa.

⁴³ Natürü ga Ngechuchu rü ñanagürü nüxü: —Taxucürüwama petanügu charüxãũêcha erü chanaxwèxe na náigü ya ñãnegüwa ngëxmagüxü i duüxügümaã rü ta nüxü chixuxü na ñuxãcü ãëxgacü yïixü ya Tupana. Erü woetama ngëmacèx núma choxü namu —ñanagürü.

⁴⁴ Rü yemaãcü Ngechuchu nüxü nixuchigü ga ore ga ngutaquëxepataügüwachigü ga guxüma ga Gariréaanewa.

5

Muxüma ga choxni na ínayauxüxüchiga (Mt 4.18-22; Mr 1.16-20)

¹ Rü wüxicana ga yexguma naxtaxa ga Yenecharétuanacüwa nayexmagu ga Ngechuchu, rü muxüma ga duüxügü rü naxütawa nangugü. Rü düxwa yéma nayaxãütügü, yerü nüxü naxïnüêchaü ga Tupanaãrü ore.

² Rü Ngechuchu yéma nüxü nadau ga taxre ga ngue ga ingeãcune. Rü guma nguegü rü naxnecüpechinüwa nanadagü, yerü ga püchaetanüxü rü nüxna yéma ínachoü, yerü norü pücha niyauxgü.

³ Rü wüxi ga guma nguegu nixüe ga Ngechuchu. Rü guma ngue rü Chimáũãrü nixĩ. Rü Chimáũna naca ga naxnecüpechinüãrü ngãxütüwaxüra na nangeaxüçèx. Rü guma nguewa narüto ga Ngechuchu. Rü yéma inanaxügü ga duüxügüxü na nangüexëëxü.

⁴ Rü yexguma yagúegagu ga Ngechuchu ga na yadexaxü, rü Chimáũxü ñanagürü: —jyéa ínámátamaxüwa namaã naxã ya daa ngue.

Rü ngema penatáe i perü pücha na choxnita piyauuxgüxcèx! –ñanagürü.

⁵ Rü Chimáũ nanangãxũ, rü ñanagürü nüxũ: – Pa Ngúexêëruũx, ngewèx rü guxũ i chütaxũ rü tapüchae, natürü taxuũma i choxni tiyaxu. Natürü ñuxma na choxũ cumuxũ rü wena táxaru íchanatáe i chorü pücha –ñanagürü.

⁶ Rü yexguma ínatáegüãgu ga norü pücha, rü muxũma ga choxni ínayauxũ. Rü düxwa narügáuxchaũ ga norü pücha yerü namuxũchi ga choxni.

⁷ Rü naxmëxmaã náí ga nguewa yexmagüxũ ga natanüxügücèx nacagü na nüxũ yanangüxêëgüxcèx. Rü yéma naxí ga yema natanüxügü ga naxcèx nacagüxũ. Rü nanaxüãcugü ga guma taxre ga ngue rü wixgutaèx inangutaũgü yerü namuxũchi ga choxni.

⁸ Rü yexguma yemaxũ nadèuxgu ga Chimáũ ga Pedru, rü Ngechuchupëxegu nayacaxãpüxü, rü ñanagürü nüxũ: –¡Choxna ixügachi! Pa Corix. Erü choma rü wüxi i duũxũ i pecaduãxũ chixí – ñanagürü.

⁹ Rü yema ñanagürü ga Chimáũ yerü nüma rü guxũma ga natanüxügü rü namaã nabaixãchiãëgü ga yema muxũma ga choxni na ínayauxũxũ.

¹⁰ Rü nabaixãchiãëgü ta ga Chimáũmücügü ga Chaũtiágu rü Cuáũ ga Zebedéu nanegü. Natürü Ngechuchu rü Chimáũxũ ñanagürü: –¡Tãxũ i cumuũxũ! Erü ñuxmacürüwa rü tá choxũ cupuracü na chauxütawa cunagagüxcèx i duũxügü – ñanagürü.

¹¹ Rü yexguma naxãnacüwa namaã nangugügu ga naweügü, rü yéma nanawogü ga norü guxũma

rü Ngechuchuwe narüxĩ.

*Ngechuchu rü wüxi ga rüchaxünexüçèx
nayatanaanexẽ*

(Mt 8.1-4; Mr 1.40-45)

¹² Rü yexguma wüxi ga yéma yexmagüne ga ãñewa nayexmagu ga Ngechuchu, rü yéma naxütawa nangu ga wüxi ga yatü ga chaxünemaã ìðaawexü. Rü yexguma Ngechuchuxü nadèuxgu rü napèxegu nayacaxãpüxü rü yexma nanangücuchi. Rü Ngechuchuxü nacèèxü, rü ñanagürü: —Pa Corix, ngëxguma cuma cunaxwèxegu, rü cuxü natauxcha na choxü curümexèèxü nawa i chorü ðaawe —ñanagürü.

¹³ Rü yexguma ga Ngechuchu rü nüxü ningögü, rü ñanagürü nüxü: —Ngü, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga yema yatü ga chaxüneãxü.

¹⁴ Rü Ngechuchu nanaxucuxè rü ñanagürü nüxü: —¡Dücèx, taxúemaãtáma nüxü quixu, natürü paixü cugü yadauxèè na curümexü rü yanguxèè i ngëma Tupana Moïchéwa nüxü ixuxü na duüxügü nüxü cuáxüçèx na marü curümexü nawa i curü ðaawe! —ñanagürü.

¹⁵ Natürü ga Ngechuchuchiga rü guxüwama ninguchigüama. Rü muxüma ga duüxügü rü naxcèx naxítaquèxegü na norü orexü naxĩnüèxüçèx, rü naxcèx na yataaneèèèãxüçèx ga norü ðaawegüwa.

¹⁶ Natürü Ngechuchu rü ñuxguacü rü ngextá taxúema íxãpataxüwa naxüüxü. Rü yéma nayayumüxèèxü.

*Ngechuchu rü wüxi ga yatü ga nawãixãchicücèx
nayataanexẽ*

(Mt 9.1-8; Mr 2.1-12)

17 Rû wüxi ga ngunexũ Ngechuchu ínguxẽẽtaeyane, rü yéma narütogü ga ñuxre ga Parichéugü rü ñuxre ga ngúexẽẽruüğü ga Moíchéarü mugümaã nguxẽẽtaegüxũ ga guxũ ga Gariréaaneârü íânexãcügüwa ne íxũ, rü Yudéaanewa ne íxũ, rü Yerucharéüwa ne íxũ. Rû Tupana rü poraãcü Ngechuchuwa inanawëx ga norü pora rü muxüma ga idaaweexũ narümeẽxẽ.

18 Rû Ngechuchuxütawa nangugü ga ñuxre ga yatüğü, rü naxcèx yéma nanangetaüğü ga wüxi ga yatü ga nawãixãchicü. Rû Ípatagu nanangecuchitaüğüchaũ na Ngechuchupëxegu yaxütaüğüãxücèx.

19 Natürü taxuacüma yexma nanangecuchitaüğüéga, yerü namuxüchi ga duüxüğü. Rû yemacèx íácèxwëxgu naxígü. Rû meãma Ngechuchu íyexmaxüetüwa ínanapogüãxüğü ga guma ípata. Rû yéma duüxüğütanüwa Ngechuchupëxewa ínanachüxüetaüğü ga guma nawãixãchicü.

20 Rû yexguma Ngechuchu nüxũ dèuxgu ga na nüxũ yaxögüãxũ ga yema yatüğü, rü ñanagürü guma nawãixãchicüxũ: —Pa Chaunex, marü cuxũ nüxũ changechaũ i curü pecadugü —ñanagürü.

21 Natürü yema ngúexẽẽruüğü ga Moíchéarü mugüarü nguxẽẽtaeruüğü rü Parichéugü, rü nagu narüxínüë, rü nügüãéwa ñanagürüğü: —¿Tacü nixĩ i ñaã yatü ecèx Tupanamaã chixexũ yaxugüxũ? Erü taxúema pora tüxũ nangëxma na duüxüğüaxũ pecaduxũ tangechaũxũ. Rû Tupanaxĩcatama nixĩ

ya nüxũ nangẽxmacü i ngẽma pora –ñanagürügü naãẽwa.

²² Natürü ga Ngechuchu rü nüxũ nacuèx ga tacügu na ínaxĩnüèxũ. Rü yemacèx ñanagürü nüxũ: –¿Tũxcüũ ngẽ-magu perũxĩnüè i pemax?

²³ –¿Tacü nixĩ irũtauxchamaèxũ na namaã nüxũ ixuxũ ya daa yatü ya nawãixãchicü:

“Curü pecadugü rü marü cuxũ nüxũ changechaũ”, rü èxna:

“¡Inachi rü íxũ!” ñágũxũ nüxũ?

²⁴ –Natürü ñuxma rü tá pexũ nüxũ chadauxẽ na Chaunatü núma choxũ muxũ na duũxũgüaxũ nüxũ changechaũxúcèx i norü pecadugü –ñanagürü. Rü yexguma yema ñaxguwena rü guma nawãixãchicüxũ ñanagürü: –Cumaã nüxũ chixu rü jinachi, rü nayaxu i curü caruũ, rü cupatawa naxũ! –ñanagürü.

²⁵ Rü yexgumatama guxũ ga duũxũgüpèxewa inachi ga guma nawãixãchicü. Rü nanayaxu ga norü caruũ ga nagu nacaxũ. Rü Tupanaxũ yacuèxüũchigüãcüma napatawa naxũ.

²⁶ Rü guxũma ga duũxũgü rü nañaixãchiãègü. Rü Tupanaxũ nicuèxüũgü. Rü poraacü namuũèãcüma ñanagürügü: –Ñuxma rü nüxũ tadaugü i ñuxre i Tupanaãrü puracügü i aixcüma mexèchixũgü –ñanagürügü.

Lebícèx naca ga Ngechuchu

(Mt 9.9-13; Mr 2.13-17)

²⁷ Rü yemawena ga Ngechuchu rü ínaxũxũ ga guma ìwa. Rü wüxi ga yatü ga Dumaãrü ãèxgacücèx dẽeru ngĩxũ ideetanũxũxütawa naxüpetü. Rü guma yatü rü Lebí nixĩ ga naega. Rü

yéma dīēru ngīxū īnadexūwa narūto. Rū Ngechuchu rū ñanagürü nüxū: —¡Chowe ruxū! —ñanagürü.

²⁸ Rū inachi ga Lebí, rū yéma nanatèx ga norü guxūma, rū Ngechuchuwe narūxū.

²⁹ Rū yixcama ga Lebí rū Ngechuchucèx napatawa wūxi ga taxū ga òna naxū. Rū muxūma ga yatügü ga Lebírū dīēruarü degüwa puracüexū, rū muxūma ga togü ga duūxügü rū ta yéma mechawa narütogü.

³⁰ Natürü ga yema Parichéugü rū ngúexēēruūgü ga Moīchéarü mugüarü nguxēētaeruūgü, rū inanaxügüe na Ngechuchuarü ngúexügüchigagu chixri yadexagüxū. Rū ñanagürügü: —¿Tūxcūwü wüxiwa pechibüe rū namaã pexaxegü i ngēma yatügü i Dumaärü ãēxgacücèx dīēru ngīxū dexū rū ngēma pecaduãxgüxū? —ñanagürügü.

³¹ Rū Ngechuchu nanangāxū, rū ñanagürü nüxū: —Ngēma poraexū rū taxucèxma duturu nanaxwèxegü, natürü ngēma idaaweexū nixī i duturu naxwèxegüxū.

³² —Choma rū tama mexügüna na chaxuxücèx nixī i núma chaxūxū, natürü pecaduãxgüxūna na chaxuxücèx nixī i núma chaxūxū na ngēmaãcü nüxū naxoexücèx i nacümagü i chixexügü rū Tupanawe naxīxū —ñanagürü.

*Ngechuchuna nacagüe ga aurechiga
(Mt 9.14-17; Mr 2.18-22)*

³³ Rū yexguma Ngechuchuna nacagüe ga duūxügü, rū ñanagürügü: —Cuáwü ya baiūxēēruūārü ngúexügü rū Parichéugüarü ngúexügü rū nayumüxēgüecha, rū muēxpüxcüna rū naxauree rū tama nachibüe erü Tupanagu

narüxĩnüê. Natürü i curü ngüexügü, rü guxüguma nachibüe rü naxaxegümare —ñanagürügü.

34 Natürü ga Ngechuchu rü nanangãxũ, rü wüxi ga ore ga nügüchigaxütama namaã nixu, rü ñanagürü: —ǂÉxna wüxi i ngĩgüarü petawa rü pexcèx namexũ na penaxaureexẽxũ i ngẽma nüxna naxugüxũ ega natanüwa nangẽxmagu i ngẽma yatü i ngexwacèx ãmaxũ? Rü tama nixĩ.

35 —Natürü wüxi i ngunexũ rü ngẽma yatü i ngexwacèx ãmaxũ, rü tá namücügüna nixügachi. Rü ngẽma ngunexügu tá nixĩ i aixcüma naxaureexũ i namücügü —ñanagürü.

36 Rü yexguma ga Ngechuchu rü namaã nüxũ nixu ga wüxi ga ore ga yema duũxügücüma ga nuxcümaũxüchiga rü noxrütama nguxẽetae i ngexwacaxüxüchiga. Rü ñanagürü: —Taxúema wüxi i ngexwacaxüxü i naxchiruta tiyo na namaã tanapaitaxücèx i wüxi i naxchiru i marü ngauxũ. Erü ngẽxguma ngẽmaãcü tanaxüxgu rü tanachixexẽe i ngẽma naxchiru i ngexwacaxüxũ. Rü ñuxüchi ngẽma natüchi i ngexwacaxüxũ rü tama nüxũ nayatãũxũ i ngẽma naxchiru i marü ngauxũ.

37 —Rü ngẽxgumarüũ ta rü taxúema ngexwacaxücü ya binu rü nagu tayabacuchi i wüxi i naxchiũ i marü ngauxũ i naxchèxmünaxcèx. Erü ngẽxguma ngẽmaãcü naxüxgu rü yima binu ya ngexwacaxücü rü tá narüngu, rü tá nayawãixẽe i ngẽma naxchiũ i ngauxũ i naxchèxmünaxcèx. Rü ngẽxma tá nayarütaxu ya binu rü ngẽma naxchiũ rü ta.

38 —Rü ngẽmacèx tanaxwèxe na yima ngexwa-

caxücü ya binu rü ngexwacaxüxü i naxchiügu yabacuchixü. Rü ngẽmaãcü rü taxuütáma inayarütaxu.

³⁹ —Rü taxúema ya texé ya tümamaã yaxúxe na ngúchiacü ya binu tayaxaxüxü rü tüxü nangúchañ na tayaxaxüxü ya binu ya ngexwacaxücü ya maicuracü. Rü ngẽxgumarüñ ta nixĩ i ngẽma duüxügü i marü namaã yaxüxü i nuxcümaüxü i nacüma i chixexü rü tama nanayauxgüchañ i ngẽma mexü i nguxẽẽtae i ngexwacaxüxü —ñanagürü ga Ngechuchu.

6

Ngechucharü ngúexügü rü trigu nicãüetanü ga ngüxchigaarü ngunexügu
(Mt 12.1-8; Mr 2.23-28)

¹ Rü wüxi ga ngüxchigaarü ngunexügu rü Ngechuchu rü norü ngúexügümaã trigunecüwa nachopetü. Rü norü ngúexügü rü inaxiãcüma yoxocüne trigu nicãüetanü. Rü naxmẽxmaã nanadaxi ga trigu rü nayangõëtanü.

² Rü ñuxre ga Parichéugü rü yema ngúexügüna nacagü, rü ñanagürügü: —¿Tüxcüñ ngüxchigaarü ngunexügu penabuxu i trigu? Erü ngüxchigaarü ngunexügu rü nachuxu na texé puracüxü —ñanagürügü.

³ Rü Ngechuchu nanangãxü, rü ñanagürü: —¿Taguma êxna poperawa nüxü pedau ga tacü na naxüxü ga nuxcümaücü ga ãẽxgacü ga Dabí ga yexguma nataiyagu ga nüma rü natanüxügü?

⁴ —Rü Tupanapatagu naxücu rü nüxü nadau ga yema pãü ga üünexü ga yexma nuxü. Rü yema

pãũ rü nachuxu ga ngexerüxemare na nangõxũ, rü paigücèxicatama nixĩ. Natürü Dabí nanayaxu ga yema pãũ rü nanangõx, rü natanüxũmaã rü ta nangau –ñanagürü.

⁵ Rü ñanagürü ta ga Ngechuchu: –Tupana Nane ya duüxüxũ ixĩcü rü namaã inacuèx i ngüxchigaarü ngunexü –ñanagürü.

*Wüxi ga yatü ga yumécüchiga
(Mt 12.9-14; Mr 3.1-6)*

⁶ Rü to ga ngüxchigaarü ngunexügu rü Ngechuchu rü ngutaquèxepataügu naxücu. Rü inanaxügü ga na nanguxëètaexü. Rü yéma nayexma ga wüxi ga yatü ga norü tügünewa yumécü.

⁷ Rü yema ngúexëèruügu ga Moïchearü mugüwa nguxëètaegüxü rü Parichéugü, rü Ngechuchuxü nangugügü ngoxita ngüxchigaarü ngunexügu guma yumécüxü namexëè, yerü naxcèx nadaugü ga ñuxãcü norü ãëxgacügüxütawa na ínaxuaxüguãxü.

⁸ Natürü nüma ga Ngechuchu rü nüxü nacuèx ga yema naãëwa nagu naxĩnüëxü ga yema yatügü. Rü yemacèx guma yumécüxü ñanagürü: –¡Íruda rü nuxã ngãxütanügu yachi! –ñanagürü. Rü guma yumécü rü inachi rü norü ngãxütanügu nayachi.

⁹ Rü yexguma ga Ngechuchu rü nüxna naca ga yema Parichéugü rü yema mugüwa nguxëètaegüxü, rü ñanagürü nüxü: –¿tacü nixĩ i ngema mexü ixüxü i ngüxchigaarü ngunexügu? ¿Rü ngema mexü rü ëxna chixexü? ¿Rü namexü i na namaxëèxü rü ëxna yamáxü? –ñanagürü.

¹⁰ Rū yexguma Ngechuchu nūxū nidaugüächi ga yema duñxügü ga yéma yexmagüxū. Rū guma yumécüxū ñanagürü: —¡yanawéxächixēē ya cuxmēx! —ñanagürü. Rū guma yatü rü nügü inayarüwéxächimēxēxēē, rü narümemēx.

¹¹ Natürü yema Parichéugü rü ngúexēēruügü ga Moïchéarü mugüwa nguxēētaegüxū, rü poraäcü nanuē. Rū nügü nixucüxēgü na ñuxäcü tá Ngechuchuxū na yamēxgüxū.

*Ngechuchu nanade ga 12 ga norü ngúexügü na tóxnamana namugüäxücèx
(Mt 10.1-4; Mr 3.13-19)*

¹² Rū yexguma ga Ngechuchu rü dauxchitawa, wüxi ga mèxpúnewa naxū na yéma yayumüxēxücèx. Rū guxū ga yema chütaxügu rü yéma nayumüxē.

¹³ Rū yexguma yangóonegu, rü Ngechuchu norü ngúexügücèx naca. Rū natanüwa nayadexechi ga 12. Rū yema nixī ga yatügü ga Ngechuchu nūxū unetagüxū na tóxnamana nangegüäxücèx ga norü ore.

¹⁴ Rū yema yatügü ga nadexū rü Chimáü ga Pedrugu nanaxüéga nixī ga wüxi. Rū to nixī ga Aüdré ga Chimáü naēneē, rü Chaütiágu rü Cuáü, rü Piripi, rü Baturumé,

¹⁵ rü Mateu, rü Tumachi, rü Chaütiágu ga Arupéu nane rü Chimáü ga iporaäcücücü,

¹⁶ rü Yuda ga Chaütiágueneē, rü Yuda Icariúte ga yixcama Ngechuchuxū íxuañxū naēchita.

*Ngechuchu rü muxüma ga duñxügüxū nangúexēē
(Mt 4.23-25)*

17 Rũ Ngechuchu rũ yema yatũgũ ga nadexũmaã inarũxĩgũ nawa ga guma mẽxpũne. Rũ wũxi ga nachica ga inametachinũãnexũwa nayachaxãchitanũ. Rũ yẽma nayexmagũ ga muxũma ga duũxũgũ ga guxũ ga Yudẽaanewa ne ãxũ, rũ Yerucharẽũwa ne ãxũ, rũ taxtũ ga taxũãnacũwa ga Chidãũwa rũ Tiruwa ne ãxũ. Rũ yẽma naxĩ yerũ Ngechuchuxũ naxĩnũẽchaũ, rũ nanaxwẽxegũ ga Ngechuchu na nameẽxẽxũ ga norũ daawegũwa.

18 Rũ yema duũxũgũ ga chixexũ ga naãẽ nawa yexmagũxũ rũ ta naxcẽx nitaanegũ.

19 Rũ guxũma ga duũxũgũ rũ Ngechuchuxũ ningõgũgũchaũ, yerũ norũ poramaã nanameẽxẽẽ.

Duũxũgũ i taãẽgũxũchiga rũ duũxũgũ i ngechaũgũxũchiga

(Mt 5.1-12)

20 Rũ yexguma Ngechuchu rũ norũ ngũexũgũxũ nadawenũ, rũ ñanagũrũ nũxũ: —¡Petaãẽgũ i pema ya ingearũ ngẽmaxũãxgũxe! Rũ Tupana aẽxgacũ ãxũxũwa rũ pema rũ tá ta pexãchica.

21 —¡Rũ petaãẽgũ i pema i ñũxma taiyaexe! ¡Rũ tá meãma pingãxcharaũgũ! ¡Rũ petaãẽgũ i pema i ñũxma auxexe! Rũ yixcama rũ tá pecugũe.

22 —¡Rũ petaãẽgũ i pema i ngẽxguma duũxũgũ pexchi aiegu, rũ pexũ inawoũxgu, rũ tacũ pemaã yaxugũegu, rũ chaugagu chixri pexhiga yadex-agũgu!

23 —Rũ ngẽxguma ngẽma pexũ ũpetũgu, rũ ¡petaãẽgũama rũ tama pexoegaãẽgũ! Erũ daxũgũxũ i naãnewa rũ tá penayauxgũ i wũxi i perũ ãmare i mexẽchixũ. Rũ dũcax, ñaã duũxũgũ i ñũxma

pepxhi aiexũãrũ oxigũ rũ yexgumarũũ ta nixĩ ga naxchi na naxaixũ ga nuxcũmaũgũxũ ga Tupanaãrũ orearũ uruũgũ.

24 –Natürũ wüxi i ngechaũ tá nixĩ i pexcèx i pema ya muãrũ ngẽmaxũãxgũxe erũ núma ñoma i naãnewa rũ marũ petaãẽgũ.

25 –Rũ wüxi i ngechaũ tá nixĩ i pexcèx i pema ya marũ ingaxcharaũgũxe erũ tá petaiyae. Rũ wüxi i ngechaũ tá nixĩ i pexcèx i pema i ñuxma marũ cugũexe, erũ yixcama rũ perũ ngechaũmaã tá pexauxe.

26 –Rũ wüxi i ngechaũ tá nixĩ i pexcèx i ngẽxguma guxũma i duũxũgũ pexũ icuèxũũgũgu. Erũ ngẽma duũxũgũ i ñuxma pexũ icuèxũũgũxũãrũ oxigũ rũ yexgumarũũ nüxũ nicuèxũũgũ ga nuxcũmaũgũxũ ga orearũ uruũgũneta.

Name nixĩ i nüxũ tangechaũ i ngẽma tamaã rüxuwanũgũxũ

(Mt 5.38-48, 7.12)

27 –Natürũ pema i ñuxma na choxũ pexĩnüèxũ rũ pemaã nüxũ chixu rũ: –¡Nüxũ pengechaũ i ngema pemaã rüxuwanũgũxũ! ¡Rũ meã nüxũ perũngũxẽèx i ngẽma pepxhi aiexũ!

28 –¡Rũ meã nachiga pidexagũ rũ naxcèx ípeca i Tupanaãrũ ngũxẽẽ naxcèx i ngẽma pemaã guxchigagũxũ! ¡Rũ naxcèx peyumũxègũ i ngẽma chixri pechigamaã idexagũxũ!

29 –Rũ ngẽxguma texé cumaã nuxgu rũ cuxũ tapechiwegu rũ name nixĩ i tama cuxũtanũ ega woo curũ tochiwewa rũ ta cuxũ tapechiwegu. Rũ ngẽxguma texé cuxũ napuarũ gáuxũchiruãxgu, rũ

name nixĩ i tüxũ cungechaũãma ega woo curũ daxũ rü ta cuxna tanapuxgu.

30 —jRü tüxna naxã ya texé ya curũ ngẽmaxũcèx ícaxe! Rü ngẽxguma texé curũ ngẽmaxũ cuxna napuxgu, rü tama name i naxcèx cungema.

31 —Rü ngẽma mexũ i pema penaxwèxexũ na togü pemaã naxũxũ, rü name nixĩ i pema rü ta ngẽmaãcü mexũ namaã pexü.

32 —Rü ngẽxguma pema rü ngẽma duũxũgü i pexũ ngechaũxũxũĩcatama pengechaũgu, rü ¿tacüwa namexũ i ngẽma? Erü ngẽma duũxũgü i tama yaxõgũxũ rü ngẽmaãcü nanaxũgü.

33 —Rü ngẽxguma ngẽma duũxũgü i cuxũ rüngũxèèxũxũĩcatama curüngũxèègu, rü ¿tacüwa namexũ i ngẽma? Erü ngẽma duũxũgü i tama yaxõgũxũ rü ngẽmaãcü nanaxũgü.

34 —Rü ngẽxguma ngẽma duũxũgü i ixããrũ dĩèruãxũnaxĩcatama cunaxãxgu i curũ dĩèru, rü ¿tacüwa namexũ i ngẽma? Erü ngẽma duũxũgü i tama yaxõgũxũ rü ngẽmaãcü nanaxũgü, erü nüxũ nacuèxgü rü tá nüxũ nanataeguxèè i ngẽma dĩèru.

35 —Naturü pema rü name nixĩ i nüxũ pengechaũ i ngema pemaã rüxuanügũxũ, rü nüxũ perüngũxèè. Rü ngẽxguma tacücèx pexna nacaxgu, rü name nixĩ i tama pexoegaãèãcüma nüxna penaxã ega woo nagu perüxĩnũègu na ngürüãchi tãütãma pexũ nataeguxèèãxũ. Erü ngẽxguma ngẽmaãcü penaxũxgu, rü Tupana rü ngẽmaãrũ yexera tá poraãcü pexũ nanataeguxèè, rü naxãcügü tá pixĩgü ya yima Tupana ya Poraxüchicü ya nüxũ rüngũxèècü ta i ngẽma taguma moxè nüxna ãgũxũ rü ngẽma chixecümagũxũ.

36 –Rü pema rü name nixĩ i pengechaũwaxegü, ngẽma Penatü ya Tupana na ngechaũwaxexürü.

Tama name i chixexügu namaã perüxñü i togü (Mt 7.1-5)

37 –¡Rü taxü i togüxü pixuxü! Rü ngëxguma ya Tupana rü täxütáma pexü nixu na pechixexü. ¡Rü taxü i poxcu namaã pexueguxü i togü! Rü ngëxguma ya Tupana rü täxütáma poxcu pemaã naxuegu. ¡Rü nüxü nüxü perüngümae i norü chixexü i togü! Rü ngëxguma ya Tupana rü tá pexü nüxü narüngüma i perü chixexü.

38 –¡Rü togümaã pengau i perü ngemaxügu! Rü ngexguma ya Tupana rü tá pexna nanaxã. Rü ñoma wüxi i choca i meãma napaxürü rü meama ípoõcuxürü tá Tupana pexna nanaxã. Erü ngema nguruxü i namaã cumücüna cuxãxü i curü ngemaxü rü ngematama nguruxümaã tá Tupana cuxna nanaxã –ñanagürü.

39 Rü Ngechuchu rü ñaã cuèxruü norü ngúexügümaã nixu, rü ñanagürü: –¿Ñuxãcü i wüxi i ngexetüxü rü to i ngexetüxüxü namaxü nacuèxëxü? Erü ngẽma taxre i ngexetüxü rü wüxi i äxmaxügu tá nügümaã nayayicu.

40 –Rü taxuüma i ngúexü rü norü ngúexëëruüxü narüyexera. Natürü ngexguma meã nanguxgu rü tá naxruxü nixĩ ya norü ngúexëëruü.

41 –¿Rü tüxcüü nachiga quidexa i cumücü naxcèx i ngẽma íraxü i chixexü i naxüxü natürü tama cugütama cungugü naxcèx i ngẽma chixexü i taxü i cuxüxü?

42 –Rü ngëxguma tama nüxna cucuèxãchigu i ngẽma chixexü i taxü i cumatama cuxüxü, rü

¿ñuxĩcürüwa i nagu curüxĩnũxũ na cunamexẽẽxũ i ngẽma cumücüarü chixexũ i íraxũ? Pa Duũxũ i Meã Maxnetaxũx, name nixĩ i cuxira nüxũ curüxo i ngẽma chixexũ i taxũ i cumatama cuxũxũ, rü ngẽxguma tá cume na nüxũ curüngũxẽẽxũcèx i cumücü na nüxũ naxoxũcèx i ngẽma chixexũ i íraxũ i naxũxũ.

*Wüxi i nanetü rü norü owa nixĩ i nüxũ icuáxũ
(Mt 7.17-20, 12.34-35)*

⁴³ —Nataxuma i nanetü i mexũ i chixearü oóxũ. Rü nataxuma i nanetü i chixexũ i meãrü oóxũ.

⁴⁴ —Rü wüxichigü i nanetü rü norü owa nixĩ i nüxũ icuáxũ. Rü wüxi i torawa rü taxucürüwama wüxi i orix i imüxũ tayaxu. Rü wüxi i chuxchuxũwa rü taxucürüwa uba tayaxu.

⁴⁵ —Rü wüxi ya mecü ya yatü rü mexũ i orexũ nixu, erü naãewa rü aixcüma mexũgu narüxĩnü. Natürü wüxi i yatü i chixecümaxũ rü chixexũ i orexũ nixu, erü chixexũgu narüxĩnü. Rü ngẽma naãewa ngexmaxũ i chixexũ nixĩ i nüxũ yaxuxũ.

*Ípataya nutaétügu üxũne rü ípataya naxnücüétügu
üxũnechiga
(Mt 7.24-27)*

⁴⁶ —¿Tüxcüũ i pema rü: “Pa Torü Corix” ñaperügü choxũ, natürü tama penaxü i ngẽma pemaã nüxũ chixuxũ?

⁴⁷ —Rü ñuxma tá pemaã nüxũ chixu na ñuxãcü tĩxũ ya yixema chowe rüxũxẽ rü choxũ ñnũxẽ rü naxũxe i ngẽma tümamaã nüxũ chixuxũ.

⁴⁸ —Rü tüma rü wüxi ga yatü ga üpatacü rü yamèxmaücü ga norü caxta ñuxmata nutawa nangücürüũ tixĩ. Rü yexguma namèxgu ga taxtü

rü yabaixügu ga napata, rü woo ga na naporaüchiüxü, rü tama niwèxtaü, yerü meãma inapugüarü caxtaãx ga guma ã.

⁴⁹ —Natürü yíxema nüxü ãnümarexe i chorü ore natürü tama naxúxe i ngẽma tümamaã nüxü chixuxü, rü wüxi ga yatü ga naxnücüétügumare üpatacürüü tixí. Rü yexguma namèxgu ga taxtü, rü nibaixü ga napata, rü naporaüchiü. Rü niwèxtaü ga napata, rü yexma nayarüxo ga guma ã.

7

*Ngechuchu rü Dumacüãx ga churaragüarü
ãëxgacüarü duüxüxü narümexëë
(Mt 8.5-13)*

¹ Rü yexguma nüxü nachauxgu ga duüxügümaã na yadexaxü ga Ngechuchu, rü Capernáüwa naxü.

² Rü yéma nayexma ga wüxi ga churaragüarü capitáü ga Dumacüãx. Rü guma capitáü rü nüxü nayexma ga wüxi ga norü duüxü ga poraãcü nüxü nangechaüxü. Rü yema norü duüxü rü niðaawe, rü naturaxüchi.

³ Rü yexguma Ngechuchuxü naxĩnüchigagu ga guma capitáü, rü Ngechuchuxütawa nanamugü ga ñuxre ga Yudíugüarü ãëxgacügüerugü. Rü ñanagürü nüxü: —¡Ngema Ngechuchuxütawa pexí na nüxü pecèèxügüxücèx rü núma naxü na chorü duüxücèx yanataanexëëãxücèx! —ñanagürü.

⁴ Rü Ngechuchuxütawa naxĩ, rü poraãcü nüxü nacèèxügü, rü ñanagürügü: —Name nixí i nüxü curüngüxëë ya torü capitáü.

⁵ —Erü nüma rü guxü i Yudíugüxü nangechaü. Rü nümatama nanaxütanü na naxügüãxücèx ga torü ngutaquëxepataü —ñanagürügü.

6 Rū yexguma ga Ngechuchu rü nawe narüxü. Natürü yexguma marü capitáũpataxü yangaicagu, rü nüma ga capitáũ rü Ngechuchucèx yéma nanamu ga ñuxre ga namücügü na namaã nüxü yanaxugüxcèx ga norü ore ga ñaxü: —Pa Corix, tama cuxü chachixewechaü na chopatawa cinguxü erü choma rü taxuwama chame na chopatagu na cuxücuxü.

7 —Rü ngēmacèx nixī i tama chomatama cuxcèx chayaçaxü. Rū chanaxwèxe i curü orewaxicatama nüxü quixu na naxcèx yataanexü tá i chorü duüxü.

8 —Erü choma rü ta chorü ãëxgacümëxëwa changëxma, rü choxmëxwa nangëxmagü ta i ñuxre i churaragü. Rū ngëxguma chanamuxgu i wüxi na ngextá naxüxcèx, rü ngema naxü. Rū ngëxguma chaugüxtawa naxcèx changemagu i to, rü chauxütawa nangu. Rū ngëxguma chorü duüxüxü chamuxgu na tacü na naxüxcèx, rü choxü nanaxü —ñanagürü.

9 Rū nüma ga Ngechuchu rü yexguma nüxü naxīnügu ga yema capitáũärü ore rü nabaixãchiãë. Rū yema duüxügü ga nawe rüxixüxü nadawenü, rü ñanagürü: —Aixcüma pemaã nüxü chixu rü taxuüma i Yudíugütanüwa nüxü ichayangau i wüxi i duüxü i ngëma yatürüü aixcüma yaxõxü —ñanagürü.

10 Rū yexguma nawoegugu ga yema capitáümcügü ga Ngechuchuxütawa namugüxü, rü nüxü inayangaugü ga marü naxcèx na yataanexü ga yema capitáũärü duüxü.

Ngechuchu ínanadaxëë ga wüxi ga yutecü ngñe

11 Rŭ yemawena ga Ngechuchu rŭ wŭxi ga ãne ga Naïgu ãeganewa naxŭ. Rŭ nawe narŭxĩ ga norŭ ngúexŭgŭ, rŭ muxŭma ga togŭ ga duŭxŭgŭ.

12 Rŭ yexguma guma ãneärŭ ngaicamana nangxgu, rŭ tŭxŭ nadau ga wŭxi ga yueta ga tèxgŭwa tŭxŭ nangegŭxe. Rŭ guxema yuetaarŭ mamá rŭ tayute rŭ guma yucŭ rŭ guxicatama nixĩ ga tŭmane ixĩcŭ. Rŭ muxŭma ga duŭxŭgŭ ga guma ãnecŭãx rŭ tŭxŭ ínixŭmŭcŭgŭ.

13 Rŭ yexguma Cori ga Ngechuchu guma yucŭarŭ mamaxŭ dèuxgu, rŭ nŭxŭ ingechaŭtŭmŭŭ. Rŭ ñanagŭrŭ ngĩxŭ: —¡Tãxŭ i cuxaxuxŭ! —ñanagŭrŭ.

14 Rŭ yexguma ga Ngechuchu rŭ yuetacèx nixŭ, rŭ nŭxŭ ningŭgŭ ga tŭmachiŭ. Rŭ yema tŭxŭ ingetaŭgŭxŭ rŭ tŭmamaã inayachiãchitanŭ. Rŭ ñanagŭrŭ ga Ngechuchu tŭxŭ ga guxema yueta: — Pa Ngextŭxŭcŭx, ¡írŭda! —ñanagŭrŭ.

15 Rŭ yexguma ga guxema yuchiréxe rŭ ítarŭto, rŭ itanaxŭgŭ ga na tidexaxŭ. Rŭ Ngechuchu rŭ tŭmaëna tŭxŭ namu.

16 Rŭ yexguma yemaxŭ nadaugŭgu ga duŭxŭgŭ, rŭ guxŭma namuë. Rŭ inanaxŭgŭe ga Tupanaxŭ na yacuèxŭŭgŭxŭ. Rŭ ñanagŭrŭgŭ: —Wŭxi i Tupanaärŭ orearŭ uruŭ i poraxŭ tatanŭwa nangox. Rŭ ñanagŭrŭgŭ ta: —Tupana nuã naxŭ na norŭ duŭxŭgŭxŭ yanangŭxèexŭcèx —ñanagŭrŭgŭ.

17 Rŭ guxŭma ga Yudéaanewa rŭ norŭ ngaicamana, rŭ duŭxŭgŭ nŭxŭ nacuáchigagŭ ga yema Ngechuchu ŭxŭ.

Cuáŭ ga baiŭxèëruŭ rŭ Ngechuchuxŭtawa nana-

mugü ga taxre ga norü duüxügü
(Mt 11.2-19)

18 Rû Cuáŭ ga baiüxêêruŭ rû nüxü nacuáchiga ga guxüma ga yema Ngechuchu üxü, yerü norü ngúexügü ga Cuáŭ rû namaã nüxü nixugü. Rû yemacèx ga Cuáŭ rû taxre ga norü ngúexügücèx naca.

19 Rû Ngechuchuxütawa nanamugü. Rû Cuáŭ rû ñanagürü nüxü: —¡Ngema pexí rû Ngechuchuna peca rû ñapegügü nüxü: “¿Cuma yíixü i Cristu i cuxü ítananguxêêxü, rû êxna to tá yixí i Cristu?” ñapegügü nüxü!

20 Rû yema yatügü ga Cuáŭ Ngechuchuxütawa mugüxü, rû Ngechuchucèx naxí. Rû ñanagürügü nüxü: —Cuáŭ ya baiüxêêruŭ núma cuxütawa toxü namugü na cuxna tayacagüxücèx rû ¿aixcüma cuma quiixü i Cristu ya núma nguxchaücü, rû êxna to tá yixí i Cristu? —ñanagürügü.

21 Rû yexgumatama Ngechuchuxütawa nangugügu ga Cuáŭârü ngúexügü, rû Ngechuchu nanameêxêê ga muxüma ga duüxügü ga nagúxüraüxü ga daawemaã idaaweexü rû yema ingoxoãxü. Rû nayadauchigüxêê ga muxüma ga ingexetüxü.

22 Rû yemacèx Ngechuchu nanangãxü rû ñanagürü: —¡Pewoegu rû Cuáŭmaã nüxü peyarüxu i ngêma pematama nüxü pedauxü rû nüxü pexinüêxü! ¡Rû namaã nüxü pixu i ñuxãcü i ngêma ingexetüxü rû marü nidauchigü, rû ngêma ichixeparaxü rû marü inachigü, rû ngêma chaxüneãxgüxü rû marü naxcèx nitaanegü, rû ngêma ngauchixêgüxü rû marü ningoxnamachixêgü, rû ngêma yuexü

rü wenaxãrũ namaxẽ, rü ngẽma ingearũ ngẽmaxũãxũmaã rü marũ nüxũ tixu i Tupanaãrũ ore i mexũ!

²³ –Rü tataãẽ ya yíxema texé ya tama choxũ rüxoxe –ñanagürũ ga Ngechuchu.

²⁴ Rü yexguma nawoeguxgu ga yema duũxügũ ga Cuáũ yéma mugũxũ, rü Ngechuchu inanaxügũ ga guma Cuáũchiga na yadexaxũ. Rü duũxügũmaã nüxũ nixu, rü ñanagürũ: –¿Tacü nixĩ ga pema ípeyadaugũxũ ga dauxchitawa ga taxúema íxãpataxũwa? ¿Éxna wüxi ga yatü ga turaxũ ga ñoma dexne ga buanecü yaxĩãxtanücüüxẽecürũ íxĩxũ nixĩ ga ípeyadaugũxũ?

²⁵ –Rü éxna tama guma ípeyadaugũgu, ¿rü tacü nixĩ ga ípeyadaugũxũ? ¿Éxna wüxi ga yatü ga poraãcü nügü ngèxãécü ípeyadaugũ? Pema nüxũ pecuèx i ngẽma poraãcü nügü ngèxãëgũxũ rü ãëxgacügũ ya tacügũpatawa nangëxmagü, rü taxucèxma dauxchitawa nangëxmagü.

²⁶ –¿Tacü éxna nixĩ ga ípeyadaugũxũ? ¿Éxna wüxi ga Tupanaãrũ orearũ uruũ? Ngẽmáãcü aixcüma yema nixĩ ga ípeyadaugũxũ. Rü pemaã nüxũ chixu rü Cuáũ ya baiũxëëruũ rü tama wüxi i ngëxũrüüxũ i Tupanaãrũ orearũ uruũ nixĩ.

²⁷ –Rü Cuáũchiga nixĩ ga naxümatũxũ ga yema Tupanaãrũ ore ga ñaxũ:

“Cupëxegu chayamu i chorü orearũ ngeruũ na cuxcèx namexëããxücèx i duũxügüarũ maxũ”,

ñaxũ.

²⁸ –Rü pemaã nüxũ chixu rü guxũ i duũxügütanüwa rü nataxuma i Tupanaãrũ orearũ

uruũ i Cuáũ ya baiũxêẽruũãrũ yexera. Natürũ yíxema Tupana ãẽxgacũ íxĩxũwa wixwexüchi üxe, rü Cuáũãrũ yexera tixĩ —ñanagürũ.

²⁹ Rü guxũma ga duũxũgũ rü woo yema yatügũ ga Dumaãrũ ãẽxgacücèx dīẽru ngĩxũ ideetanũxũ, rü nüxũ naxĩnüẽ ga yema Ngechuchuarũ ore rü ñuxũchi Tupanaxũ nicuèxüũgũ yerü nüxũ nicuèxãchitanũ na aixcũma mecũ yĩixũ ga Tupana. Rü yema nixĩ ga duũxũgũ ga ũpaacũ Cuáũ íbaiũxêẽxũ.

³⁰ Natürũ yema Parichéugũ rü yema ngüexêẽruũgũ ga Moĩchearũ mugüwa nguxêẽtaegũxũ rü tama nanaxwèxegũ ga Cuáũ na ínabaiũxêẽxũ. Rü yemaãcũ nüxũ naxoe ga yema mexũ ga Tupana naxcèx üxchaũxũ.

³¹ Rü nüma ga Cori ga Ngechuchu rü ñanagürũ: —¿Tãcũgu tá chanangu i ñomaũcũü maxèxũ i duũxũgũ? ¿Rü nanatacũraũgũ?

³² —Rü ñaã duũxũgũ rü taxuxũmaãma nataãegũ ngẽxgumarũ i ngema buxũgũ i ñãxtũwa rütogũxũ, rü íxĩnücèxwèxegũxũ, rü tagaãcũ namücũgũxũ ñagũxũ:

“Marũ wowerumaã pexcèx tapaxetagũ natürũ tama ípixũãchitanũxũ. Rü marũ ngechaũxũ i wiyaegu pexcèx tawiyaegũ natürũ tama pexauxe”, ñagũxũ. Rü ngẽma buxũgürũ taxuxũmaãma nataãegũ i ñomaũcũü i duũxũgũ.

³³ —Yerü ga Cuáũ ga baiũxêẽruũ rü núma naxũ, rü tama pãũ nangõx rü tama binu nayaxaxũ. Rü yexguma ga pema rü: “Nangoxoãx” ñaperügũ nüxũ.

³⁴ —Rü ñuxũchi núma chaxũ i choma ya Tupana Nane na duũxũxũ chiĩxũ, rü õna changõx rü binu

chayaxaxü. Rü ngëxguma i pema rü ñaperügügü choxü:

“Choma rü chataanüxüchi rü changãxwèxe, rü pecaduã x-güxü i duüxügümaã chaxãmücü, rü yatügü i Dumaãrü ãëxgacücèx dïeru ngïxü idee-tanüxümaã chaxãmücü”, ñaperügügü choxü.

³⁵ –Natürü Tupanaãrü cuèx rü meãma nangox tümawa ya yíxema aixcüma nawe rüxixë –ñanagürü ga Ngechuchu.

Ngechuchu rü Chimáú ga Parichéupatawa nayexma

³⁶ Rü wüxi ga Parichéu rü Ngechuchuna naxu na napatawa nachibüxücèx. Rü yéma naxü ga Ngechuchu rü yema Parichéuarü mechawa nayarüto.

³⁷ Rü wüxi ga ngecü ga chixri maüxcü ga guma ñanecüãx, rü yexguma nüxü nacuáchigagu na Parichéupatawa tá na nachibüxü ga Ngechuchu, rü yéma ixü. Rü yéma inange ga wüxi ga pumara ga yixixü ga wüxi ga butiya ga nutanaxcèxmaã äxchiüxü.

³⁸ Rü naxauxãcüma Ngechuchucutüxütawa iyarütoxöchi. Rü ngïxgüxüxëtümaã iyawaicutüxëë. Rü ngïyaemaã ínapicutü, rü inachuxcutü. Rü ñüxüchi yema pumaramaã inachacutü.

³⁹ Rü yexguma yemaxü nadèuxgu ga yema Parichéu ga Ngechuchuna uxü, rü naãëwa nagu narüxïnü rü nügümaãtama ñanagürü: –Ngëxguma chi ñaã Ngechuchu rü aixcüma wüxi i Tupanaãrü orearü uruü yixïgu, rü nüxü chi nacuèx na tacü yïxü i ñaã ngexü i nüxü ingögüxü rü ñüxücü na namaxüxü rü poraãcü na napecaduãxü –ñanagürü ga naãëwa.

40 Rū yexguma ga Ngechuchu rü nüxũ nacuèxama rü Parichéuxũ ñanagürü: —Pa Chimáũx, choxũ nangëxma i wüxi i ore i cumaã nüxũ chixuxchaũxũ —ñanagürü. Rū nüma ga Parichéu rü Ngechuchuxũ nangãxũ, rü ñanagürü: —¡Ëcü, chomaã nüxũ ixu, Pa Ngúexëëruũ! —ñanagürü.

41 Rū ñanagürü ga Ngechuchu: —Taxre ga yatügü rü wüxi ga corixütawa nanangetanü. Rū wüxi nanangetanü ga 500 tachinü ga dīëru rü to nanangetanü ga 50 tachinü.

42 —Natürü yema taxre rü taxuacü nanaxütanü ga norü ngetanü. Rū yemacèx düxwa yema norü cori rü nüxũ nüxũ narüngüma ga yema nüxũ na nangetanügüãxũ. Rū ñuxmax, Pa Chimáũx, rü ¡chomaã nüxũ ixu! rü ¿ngëxürüüxũ ga yema taxre ga yatügü rü yexeraãcü norü corixũ nangechaũ? —ñanagürü.

43 Rū Ngechuchuxũ nangãxũ ga Chimáũ, rü ñanagürü: —Chauxcèx ga yema yexeraãcü nüxũ nangetanüxũ nixĩ ga yexeraãcü norü corixũ ngechaũxũ —ñanagürü. Rū Ngechuchu rü ñanagürü nüxũ: —Ngëmäãcü aixcüma nüma nixĩ —ñanagürü.

44 Rū yexguma ga Ngechuchu rü ngĩxũ nadawenü ga yema ngecü, rü ñanagürü Chimáũxũ: —¿Ngĩxũ cudauxũ i ñaã ngecü? Rū cupatagu chaxücu i chomax, Pa Chimáũx, natürü tama dexá choxnata cuxã chorü yauxcutüruũ. Natürü ñaã ngecü rü ngĩxgüxüxetümaã choxũ iyawaicutüxëë, rü ngĩaemaã choxũ ípicutü.

45 —Cuma rü tama choxũ cuchuxu i noxri choxũ curümoxëgu, natürü ngĩma i ñaã ngecü rü noxri núma changuxgumama rü choxũ iyachux-

cutüchigü.

⁴⁶ –Cuma rü tama pumaramaã choxü cuchaeruxüra, natürü ngĩma i ñaã ngecü rü chaucutügu inaba i pumara.

⁴⁷ –Rü ngẽmacèx woo namu i ngĩrü pecadugü natürü Tupana ngĩxü nüxü nangechaü i guxüma, erü ngĩma rü aixcüma choxü ingechaü. Natürü yixema tama aixcüma ngechaücèx íyaçaxe, rü tama poraãcü Tupanaxü tangechaü –ñanagürü.

⁴⁸ Rü yexguma ga Ngechuchu rü yema ngecüxü ñanagürü: –Curü pecadugü rü marü cuxü nüxü changechaü –ñanagürü.

⁴⁹ Rü yema togü ga nüxna naxugüxü ga yéma Ngechuchumaã mechawa yexmagüxü, rü inanaxügü ga nügümücügümaächigü na yadexagüxü. Rü ñanagürügü: –¿Tacı nixi i ñaã yatü, ecèx ngẽmaãcü duüxügüaxü pecaduxü nangechaüxü? –ñanagürügü.

⁵⁰ Natürü Ngechuchu rü ñanagürü ngĩxü ga yema ngecü: –Marü cuxü nangẽxma i maxü i taguma gúxü, erü choxü cuyaxõ. ¡Ñuxma rü taãècüma cuchiüwa naxü! –ñanagürü.

8

Ngexügü ga Ngechuchuxü rüngüxèëgüxü

¹ Rü yemawena ga Ngechuchu rü Gariréaaneärü ñãnegügu nixüãgüchigü. Rü duüxügümaã nüxü nixüchigü ga Tupanaärü ore na ñuxäcü ãëxgacü yixü ya Tupana. Rü ínayaxümücügü ga yema 12 ga ngüexügü ga marü nadexü.

² Rü yexgumarüü ta íyaxümücügü ga ñuxre ga ngecügü ga üpaacü ngoxogü ngĩwa ínawoxücü

rü ngĩrũ daaweewa ngĩxũ nameẽxẽẽcü. Rü yematanũwa iyexma ga María ga Magadácũãxmaã ngĩxũ naxugücũ ga ũpaacũ Ngechuchu 7 ga ngoxo ngĩwa ínawoxũcü.

³ Rü yéma iyexma ta ga Cuána ga Cuchu naxmèx. Rü Cuchu nixĩ ga wüxi ga ãẽxgacũ ga Erodeaxũ puracũxũ. Rü yéma nayexmagũ ta ga Chuchana rü mucũma ga náigũ ga ngecũgũ ga ngĩrũ dīerumaã Ngechuchuxũ rüngũxẽẽgücũ.

*Ore ga toecũgu ixuxũ
(Mt 13.1-9; Mr 4.1-9)*

⁴ Rü muxũma ga yema ããnegücũãx ga duũxũgũ, rü Ngechuchuxũtawa ínayadaugũ. Rü yexguma yéma nangutaquẽxegũga ga muxũma ga duũxũgũ, rü Ngechuchu namaã nüxũ nixu ga wüxi ga ore ga cuèxruũ, rü ñanagürũ nüxũ:

⁵ —Wüxi ga yatũ ga toecũ rü trigumaã nanagũane. Rü yexguma trigumaã nagũaneãgu rü ñuxre ga trigu, rü namagu nayi. Rü duũxũgũ nawa nangagũxũ, rü werigũ rü nanawecu.

⁶ —Rü náigũ ga trigu rü nutatanũgu nayi. Rü yexguma naxũgũga ga guma trigu, rü nipagũ rü nayuemare, yerũ nataxuma ga norũ waianexũ.

⁷ —Rü náigũ ga trigu rü tuxunecũgu nayi. Natürũ yexguma nayaegu ga tuxugũ rü guma triguxũ ínawocu rü nanadai.

⁸ —Natürũ náigũ ga trigu rü mexũ ga waixũmũgu nayi. Rü yemacèx ga yexguma nayaegu rü muxũma ga trigu nawa ínanguxuchi. Rü wüxipũxũ ga triguwa ínanguxuchi ga 100 pũxũ ga trigu —ñanagürũ. Rü yemawena rü Ngechuchu tagaãcü ñanagürũ nüxũ ga duũxũgũ: —Rü yíxema

ãchixëgüxe, rü ꞑnaga taxĩnüë i ngëma ore! — ñanagürü.

Tacüchiga nixĩ ga yema ore ga cuèxruügügu ixuxũ
(Mt 13.10-17; Mr 4.10-12)

⁹ Rũ yexguma ga norũ ngüexügü rü nüxna nacagüe na tacüchiga yĩxũ ga yema ore ga yatü ga toecügu ixuxũ.

¹⁰ Rũ Ngechuchu ñanagürü nüxũ: —Tupana rü pexũ nüxũ nacuèxëë i ngëma ëxüguxũ i taxuũma i togü nüxũ cuáxũ i ñuxãcü aëxgacü na yĩxũ i nümax. Natürü togücèx rü cuèxruügu chayaxúãcüma namaã nüxũ chixu i ore. Rũ ngexguma woo nüxũ nadaugügu rü ñoma tama nüxũ nadaugüxürüü nixĩgü, rü woo nüxũ naxĩnüëgu rü ñoma tama nüxũ naxĩnüëxürüü nixĩgü —ñanagürü.

Ngechuchu rü meã nanangoxëë ga yema ore ga toecüchigagu yaxuxũ
(Mt 13.18-23; Mr 4.13-20)

¹¹ Rũ Ngechuchu rü ñanagürü: —Ngëma ore i toecüchigagu pemaã chixuxũ rü ñaãchiga nixĩ. Rũ ngëma trigupüxü rü Tupanaärü orechiga nixĩ.

¹² —Rũ guma trigu ga namagu yixünerüü nixĩ i duüxügü i ngëma orexü ñnüëxü. Natürü Chataná rü ngëma duüxügüxü nüxũ inayarüngümaëxëë i ngëma ore, na tama yaxõgüãxücèx rü tama nayauxgüãxücèx i maxü i taguma gúxü.

¹³ —Rũ guma trigu ga nutatanügu yixüne, rü ngëma nixĩ i duüxügü i nüxũ ñnüëxü i Tupanaärü ore rü taãëcüma yaxõgüxü. Natürü tama aixcüma nanayauxgü i ngëma ore, erü paxaãchi nayaxõgü,

rü yixcûra guxchaxû nüxû üpetügu, rü nüxû narüxoe i ngêma ore.

14 –Rü guma trigu ga tuxunecügu yixûne, rü ngêma nixî i duûxûgü i Tupanaârü orexû ïnûëxû rü yaxôgûxû natürü ñoma i naãneârü ngêmaxûcèx oegaãëgûxû, rü norü ngêmaxûguama rûxîñûëxû rü tama nüxû rûxoechaûxû i norü ngûchaûgü. Rü ngêmagagu düxwa tama Tupanacèx namaxê.

15 –Natürü guma trigu ga mexû ga waixûmügu yixûne, rü ngêma nixî i duûxûgü i aixcûma taãëãcûma nayauxgûxû i Tupanaârü ore, rü naga ïnûëxû, rü meã naxcèx maxêxû. Rü ngêma nixî i duûxûgü i aixcûma Tupanawe rûxîxû rü naxûgûxû i ngêma nüma nanaxwèxexû.

Cuèxruxû ga omügu ixuxû
(Mr 4.21-25)

16 –Taxúema wüxi i omüwa tanangixichi na tanatüxpechitaxûcèx rü êxna tûmaârü pechicatüügu tayaxûcuchixûcèx. Natürü ngóxûgu tanaxú na tüxû nabaxixûcèx ya yíxema ngexma chocuxe.

17 –Rü ngêxgumarüü ta i guxûma i tacü i cúãcûma ixuxû rü yixcûra rü duûxûgü tá nüxû nacuèxgûama. Rü guxûma i ngêma ñuxma duûxûgûcèx êxûguxû rü tá nangoxoma.

18 –¡Meã iperûxîñûë i ñuxmax! Erü texé ya naga ïnûë i ngêma ore i mexû, rü Tupana tá yexeraãcü tüxû nüxû nacuèxêê. Natürü yíxema tama naga ïnûë, rü yexeraãcü tá tüxna nanayaxu i ngêma íraxû i tûmaârü cuèx i noxri tüxû ngêxmachiréxû –ñanagürü.

Ngechuchuarü mamá rü naëneëgüchiga
(Mt 12.46-50; Mr 3.31-35)

¹⁹ Rü naë ga Ngechuchu rü naëneëgü, rü yema Ngechuchu íyexmaxüwa tangugü. Natürü taxuacü naxütawaxüchi tangugü, yerü namuxüchi ga duüxügü.

²⁰ Rü wüxi ga duüxü Ngechuchumaã nüxü nixu, rü ñanagürü: —Yéa düxétüwa tangëxma ya cue rü cueneëgü, rü cuxü tadaugüchaü —ñanagürü.

²¹ Natürü nüma ga Ngechuchu rü ñanagürü nüxü ga duüxügü: —Rü yíxema nüxü ínüexe i Tupanaärü ore rü nagu maxexe rü yíxema tixí ya chaue rü chaueneëgü ixígüxe —ñanagürü.

Ngechuchu rü buanecüxü rü yuapexü
ínayachaxächixëë
(Mt 8.23-27; Mr 4.35-41)

²² Rü wüxi ga ngunexügu ga Ngechuchu rü norü ngúexügümaã wüxi ga nguëgu nichoü. Rü ñanagürü nüxü: —¡Ngíxã daa naxtaxaarü tocutüwa taxí! —ñanagürü. Rü inaxíachi.

²³ Rü yexguma yaxãüyane rü nipechigü ga Ngechuchu. Rü ngürüächi yexma nüxü naxü ga wüxi ga tacü ga buanecü. Rü guma nguëwa rü niyauxcuchichigü ga dexá. Rü düxwa inayangutaügüchaü.

²⁴ Rü yemacèx nüma ga norü ngúexügü rü Ngechuchuxü nacagü ga na ínadxüçèx. Rü ñanagürügü nüxü: —Pa Ngúexëëruüx, ngëmama itabaxügü —ñanagürügü. Rü yexguma ga Ngechuchu rü ínaruða, rü buanecüxü rü yuapexü nanga. Rü ínayachaxächi ga buanecü, rü inayarüxo ga yuape, rü ínachaxanemare.

25 Rū yexguma ga Ngechuchu rü ñanagürü nüxü ga norü ngüexüğü: —¿Tacü pexü naxüpetü ecèx tama meâ peyaxõgüxü? —ñanagürü. Natürü ga nūmagü rü nabaixāchiāēgü. Rū nügümücügüna nicachigü, rü ñanagürügü: —¿Tacü êxna nixi i ñaã yatü rü ngēmacèx èixrücü ya buanecü rü yuape rü naga naxinüëxü? —ñanagürügü.

Yatü ga Gadáracüãx ga ngoxogü nawa yexmagüxü

(Mt 8.28-34; Mr 5.1-20)

26 Rū düxwa naxtaxaarü tocutüwa nangugü ga Gadáaraarü nañewa. Rū yema naane rü Gariréaaneärü toxmèxtawa nayexma.

27 Rū yexguma marü nguewa ínaxüegu, ga Ngechuchu, rü naxcèx nixü ga wüxi ga yatü ga guma ñānecüãx ga mucü ga taunecü ngoxogü nawa yexmagücü. Rū guxüguma nangexchiruecha. Rū tama ñwa nayexma, yerü duüxêchíquëxetanügu nayarüxauxchigünexü.

28 Rū yexguma Ngechuchuxü nadèuxgu, rü napèxegu nayacaxãpüxü. Rū aita naxüãcüma ñanagürü: —¿Tüxcüü nuã choxü cuyachixewe, Pa Ngechuchux, Pa Tupana ya Tacüxüchi Nanex? Rū cuxü chacèexü na tama ngúxü choxü quingexëëxü —ñanagürü.

29 Rū yema ñanagürü yerü Ngechuchu marü nanamu ga yema ngoxogü na ínachoxüxüçèx. Rū muëxpüxcüna rü guma yatüxü naxãüãëxëëxü ga yema ngoxogü. Rū duüxügü rü cadena-mã nayanèixchacüügüxü rü nayanèixparagüxü na taxuwama naxüxüçèx. Natürü nüma rü nagu

nacaugüama ga cadenagü. Rû yema ngoxogü rû dauxchitawa ga taxúema íxãpataxüwa nanagagü.

³⁰ Rû Ngechuchu nüxna naca rû ñanagürü: — ¿Tacü nixĩ i cuéga? —ñanagürü. Rû nüma rû Ngechuchuxü nangãxü, rû ñanagürü: —Muxüchixü nixĩ i chauéga —ñanagürü. Rû yema ñanagürü yerü namuxüchi ga yema ngoxogü ga guma yatügu chocuxü.

³¹ Rû yema ngoxogü rû Ngechuchuna nacagü ga tama ngẽma poxcuchica i äxmaxü i taguma iyacuáxügu na nawocuãxüçex.

³² Rû guma mëxpúneärü tuãchiwa nayexmagü ga muxüma ga cuchigü ga yéma chibüexü. Rû yemacèx ga yema ngoxogü rû Ngechuchuxü nacèexügu na yema cuchigügu nayachocuxüçex. Rû Ngechuchu rû: —Ngü —ñanagürü.

³³ Rû yexguma ga yema ngoxogü rû guma yatüwa ínachoxü rû yema cuchigügu nayachocu. Rû guxüma ga yema cuchigü rû inaxüãchi, rû naxtaacutüarü mëxpúxüwa nayarüyuxgü, rû yexma nayi.

³⁴ Rû yexguma yema cuchigüarü dauruügü nüxü daugügu ga yema ngupetüxü, rû nabaixãchiãégü rû ínibuxmü. Rû ñãnewa nüxü nayarüxugü, rû yema ñãneärü ngaicamana ipeagüxü ga duüxügütanüwa rû ta nüxü nayarüxugü.

³⁵ Rû ga duüxügü rû ínayadaugü ga yema ngupetüxü. Rû yexguma Ngechuchuxütawa nangugügu, rû yéma nüxü nadaugü ga guma yatü ga ngoxoãxchirécü. Rû Ngechuchucutüxütawa narüto, rû marü tama naxãüãë. Rû namuüë ga duüxügü.

36 Rŭ yema duŭxŭgŭ ga nŭxŭ daugŭxŭ ga yema ngupetŭxŭ, rŭ yema ŷyadaugŭxŭmaã nŭxŭ nix-ugŭgŭ ga ñuxãcŭ Ngechuchu na namexẽẽxŭ ga guma yatŭ ga ngoxoãxchirécŭ.

37 Rŭ yexguma yemaxŭ naxĩnŭẽgu, rŭ guxŭma ga yema Gadáranecŭãx ga duŭxŭgŭ, rŭ Ngechuchuxŭ nacèèxŭgŭ na ínaxŭxŭcèx ga yema naãnewa, yerŭ poraãcŭ namuŭẽ. Rŭ yemacèx ga Ngechuchu rŭ ngegu nixŭe, rŭ ínaxŭãchi.

38 Rŭ guma yatŭ ga ngoxoãxchirécŭ rŭ Ngechuchuxŭ nacèèxŭ ga nawe na naxŭxŭcèx. Natŭrŭ ga Ngechuchu rŭ nanamu ga yexma na naxãxŭcèx, rŭ ñanagŭrŭ nŭxŭ:

39 —¡Cuchiŭwa naxŭ, rŭ duŭxŭgŭmaã nŭxŭ yarŭxu ga tacŭ cuxcèx na naxŭxŭ ga Tupana! —ñanagŭrŭ. Rŭ ínixŭ ga guma yatŭ, rŭ guxŭma ga yema ïãnecŭãx ga duŭxŭgŭmaã nŭxŭ nayarŭxu ga tacŭ naxcèx na naxŭxŭ ga Ngechuchu.

*Yáiruxacŭchiga rŭ yema nge ga
Ngechuchurigu ingõgŭcŭchiga
(Mt 9.18-26; Mr 5.21-43)*

40 Rŭ yexguma Ngechuchu wenaxãrŭ taegugu ga naxtaxaarŭ tocutŭwa, rŭ duŭxŭgŭ rŭ taããcŭma nanayauxgŭ, yerŭ guxŭma ínanguxẽẽgŭ.

41 Rŭ yema Ngechuchuxŭtawa nangu ga wŭxi ga yatŭ ga Yáiru ga naega. Rŭ nŭma ga Yáiru rŭ wŭxi ga ngutaquẽxepataŭãrŭ ãẽxgacŭ nixŭ. Rŭ Ngechuchupẽxegu nayacaxãpŭxŭ rŭ nŭxŭ nacèèxŭ ga napatawa na naxŭxŭcèx.

42 Yerü nüxũ iyexma ga wüxi ga naxãcü ga ngĩgümaã wüxicacü, rü iyadaawe, rü ituraxüchi. Rü ngĩma rü maneca 12 ga taunecü ngĩxũ nayexma. Rü yexguma Yáirupatawa naxũxgu ga Ngechuchu, rü muxũchixũ ga duũxũgü nawe narüxĩ, rü düxwa ínayaxũxtügü.

43 Rü yema duũxũgütanüwa iyexma ga wüxi ga ngecü ga 12 ga taunecü ägüechacü. Rü yemamaã iyadaawecha. Rü duturugüxũtagu ngĩxũ iguxêê ga guxcü ga ngĩrü dïêru, natürü taxúema ga texé ngĩxcèx tayataanexêêga.

44 Rü yema ngecü ga Ngechuchuweama ne ixũ, rü naxpechinüchirugu iyangögü. Rü yexgumatama ínayachaxãchi ga na naxägüxũ.

45 Rü yexguma ga Ngechuchu rü duũxũgüna naca, rü ñanagürü: —¿Texé tixĩ ya choxũ ingögüxe? —ñanagürü. Rü guxüma ga duũxũgü rü: —Taxúema —ñanagürügü. Rü yexguma ga Pedru rü namücügü rü ñanagürügü: —Pa Ngúexêêruũx, cuma nüxũ cudau i ñuxre i duũxũgü ngema cuxũ na nayaxũxtügüxũ, rü ngëxguma rü ta:

“¿Texé ya choxũ ingögüxe?” ñacuxũ — ñanagürügü.

46 Natürü ga Ngechuchu rü ñanagürü: — Ngẽmáacü wüxie choxũ tingögü, erü nüxũ chicuèxãchi na chorü poramaã tüxũ na charümexêêxũ —ñanagürü.

47 Rü yexguma nangoxomagu ga na nüxũ nacuèxamaxũ ga Ngechuchu ga yema nüxũ na yangögüxũ, rü yaduruxácüma naxütawa ixũ ga yema ngecü. Rü napëxegu iyacaxãpüxü. Rü guxũ ga duũxũgüpëxewa namaã nüxũ iyaxu ga tacücèx nüxũ na yangögüxũ, rü ñuxãcü yexgumatama

ngĩxcèx na yataanexũ.

48 Rũ yexguma ga Ngechuchu rũ ñanagürũ ngĩxũ: —Pa Chauzacũx, cuxcèx nitaane, erũ cuyaxõ. ¡Rũ ñuxma rũ taãẽãcũma íxũ! —ñanagürũ.

49 Rũ yexguma íyadexayane ga Ngechuchu, rũ yéma nangu ga wüxi ga duũxũ ga ngutaquẽxepataũãrũ ãẽxgacũ ga Yáirupatawa ne ũxũ. Rũ ñanagürũ Yáiruxũ: —Cuxacũ rũ marũ iyu. ¡Rũ tãxũ i cuyachixewechigũxũ ya Ngúexẽẽruũ! —ñanagürũ.

50 Natürũ yexguma yema orexũ naxĩnũgu ga Ngechuchu, rũ ñanagürũ Yáiruxũ: —¡Tãxũ i cuyanguãẽxũ! Erũ ngẽxguma cuyaxõxgu rũ cuxacũ rũ tá wena imaxũ —ñanagürũ.

51 Rũ yexguma Yáirupatawa nangugũgu, rũ Ngechuchu nayachocuxẽẽ ga Pedru rũ Chaũtiágu rũ Cuáũ rũ ngĩnatũ rũ ngĩẽ ga yema bucũ ga yuxcũ. Natürũ tama nanaxwèxe na togũ yexma chocuxũ.

52 Rũ guxũma ga duũxũgũ ga yéma yexmagũxũ rũ naxauxe rũ ngĩxcèx nangechaũgũ. Natürũ Ngechuchu rũ ñanagürũ nüxũ: —¡Tãxũ i pexauxexũ! Erũ ngẽma bucũ rũ tama nixĩ i nayuxũ. Rũ ipemare —ñanagürũ.

53 Natürũ ga yema duũxũgũ rũ Ngechuchuxũ nacugüeama, yerũ ngĩxũ nadaugũ rũ aixcũma marũ iyu.

54 Rũ yexguma ga Ngechuchu rũ ngĩxmẽxgu nayayauxãchi, rũ tagaãcũ ñanagürũ: —Pa Bucũx, ¡írũda! —ñanagürũ.

55 Rũ yexguma ga ngĩma rũ wena imaxũ, rũ yexgumatama írũda. Rũ Ngechuchu rũ duũxũgũmaã nüxũ nixu na ngĩxũ

naxüwemügüxcèx.

⁵⁶ Rû ngînatü rû ngîẽ ga yema bucü, rû poraãcü tabaixãchiãgü. Natürü Ngechuchu rû tüxü namu na taxúemaãma nüxü na tixuxücèx ga yema ngu-petüxü.

9

Ngechuchu norü ngúexügüxü namu na nüxü yanaxugüexücèx ga Tupanaarü ore (Mt 10.5-15; Mr 6.7-13)

¹ Rû Ngechuchu rû nanangutaquëxexëẽ ga yema 12 ga norü ngúexügü. Rû pora nüxna naxã rû nüxna naxãga na ínawoxüãxücèx ga nagúxüraüxü ga ngoxogü, rû na nameëxëãxücèx ga duüxügü ga idaaweexü.

² Rû nayamugü na duüxügümaã nüxü yaxugüexücèx ga ore ga mexü na ñuxãcü ãëxgacü yïxü ya Tupana, rû na nameëxëãxücèx ga duüxügü ga idaaweexü.

³ Rû ñanagürü nüxü: —¡Rû taxuxütáma ípinge i perü namawaü, rû bai ya perü caxüchigüxü ya naïxmenëxã, rû bai i perü choca, rû bai i perü pãü, rû bai i perü dïëru. Rû wüxitama i perü daxü ípinge, rû tama i taxre!

⁴ —Rû ngëxguma wüxi ya ñãnewa pengugügu, ¡rû wüxi ya ípatagutama perücho rû ñuxmata ipexiãchi nawa ya yima ñãne!

⁵ —Rû ngextá tama pexü ínayauxgüxüwa, ¡rû ípechoxü nawa ya yima ñãne! Rû ngëxguma ngema ipexiãchigu ¡rû ipepagücutü i perü üxaxücutü na ngëmawa nüxü nacuëxgüxcèx na chixexü naxügüxü i ngëma duüxügü! —ñanagürü.

⁶ Rū inaxĩãchi, rü guxũma ga ãñexãcũgũwa naxĩ. Rū nüxũ nixugüetanũ ga Tupanaãrũ ore ga mexũ. Rū guxũwama nanameẽxëetanũ ga duũxũgũ ga idaaweexũ.

Eróde rü tama nüxũ nacuèxéga na texe yixũ ga Ngechuchu

(Mt 14.1-12; Mr 6.14-29)

⁷ Rū Gariréaaneãrũ ãëxgacũ ga Erode, rü nüxũ nacuáchiga ga guxũma ga yema Ngechuchu üxũ. Rū poraãcü nagu narüxĩnũ rü naxoegaãë ga Erode, yerü nümaxũ ga duũxũgũ rü ñanagürügũ: —Cuáũ ya baiũxëeruũ nixĩ ya yima, rü marü wena namaxũ —ñanagürügũ.

⁸ Natürü togü rü ñanagürügũ: —Nuxcümaũcü ga Tupanaãrũ orearü uruũ ga Ería nixĩ, rü wena nangox —ñanagürügũ. Rü togü rü ñanagürügũ: —Bexmana náí ga nuxcümaũcü ga Tupanaãrũ orearü uruũ nixĩ, rü wena namaxũ —ñanagürügũ.

⁹ Natürü Erode rü ñanagürü: —Chomatama chanamu ga churaragü na Cuáũxũ yadae-naxãgüxüçèx. ¿Rü tacü ëxna nixĩ i ngẽma yatü i duũxũgũ ngẽmaãcü poraãcü nüxũ ixuchigagüechaxũ? —ñanagürü. Rü Erode rü nüxũ nangüchxũxüchi na ñuxãcü Ngechuchuxũ na nadauxũ.

Ngechuchu rü nanachibüexëë ga 5000 ga yatügü

(Mt 14.13-21; Mr 6.30-44; Cu 6.1-14)

¹⁰ Rū yexguma nawoeguxgu ga yema Ngechuchuarü ngüexũgũ ga yamugüxũ, rü Ngechuchumaã nüxũ nixugüe ga yema naxügüxũ. Rü nüma ga Ngechuchu rü yema norü

ngúexügümaã nixügachi, rü Bechaídaarü ñãnewa namaã naxü.

¹¹ Natürü yexguma duüxügü nüxü cuèxgügu ga ngextá na nayexmaxü, rü Ngechuchuwe narüxí. Rü Ngechuchu rü meãma yema duüxügüxü nayaxu, rü namaã nüxü nixu na ñuxãcü ãëxgacü yíixü ya Tupana. Rü nanameëxëë ga yema duüxügü ga idaaweexü.

¹² Rü yexguma marü nayáuanegu, rü Ngechuchucèx naxí ga yema 12 ga ngúexügü ga yamugüxü. Rü ñanagürügü nüxü: —¡Yamugü i ñãã duüxügü na ñãnexãcügü rü ñpatagü ya ngaicamana ngëxmagünewa na naxíxüçèx, rü ngëxma na napegüxüçèx rü norü õnatèèx yataxegüxüçèx! Erü nuã íngëxmagüxüwa rü nataxuma i tacü rü õna —ñanagürügü.

¹³ Natürü Ngechuchu rü ñanagürü nüxü: —¡Pematama penaxüwemü! —ñanagürü. Rü nanangãxügü, rü ñanagürügü: —Wüximëëxpüx i pâü rü taxre i choxnixícatama toxü nangëxma. ¿Rü ëxna cunaxwèxe na naxcèx tayataxegüxü i õna naxcèx i guxüma i ñãã duüxügü? —ñanagürügü.

¹⁴ Rü 5000 ga yatügü nixí ga yema yéma yexmagüxü. Natürü Ngechuchu rü ñanagürü nüxü ga norü ngúexügü: —¡Ëcü ípenatogüxëëx rü 50 chigü i wüxi tücumüwachigü! —ñanagürü.

¹⁵ Rü yemaãcü nanaxügü ga norü ngúexügü. Rü íanatogüxëë ga guxüma ga duüxügü.

¹⁶ Rü yexguma ga Ngechuchu rü nanade ga yema wüximëëxpüx ga pâü rü yema taxre ga choxni. Rü daxügu nadawenüãcüma Tupanana moxë naxã, rü ñuxüchi inanabücu ga yema pâü rü choxni. Rü norü ngúexügüna nanaxã na nüxü

yanuãxúcèx ga yema duũxügü.

17 Rũ guxũma ga yema duũxügü rũ meãma nachibüe. Rũ yemawena rũ 12 ga pexchigü nanapagüamatama namaã ga yema pãũ rũ choxnichipêxegü ga iyaxügüxũ.

Pedru nanangoxêẽ na Cristu na yĩxũ ga Ngechuchu

(Mt 16.13-19; Mr 8.27-29)

18 Rũ wũxi ga ngunexũ rũ Ngechuchu norũ ngúexügümaã noxrũwama yayumũxêgu, rũ nũma rũ norũ ngúexügüna naca, rũ ñanagürü: —¿Ñuxũ ñaxũ i duũxügü i chauchiga i choma na texé chiĩxũ? —ñanagürü.

19 Rũ norũ ngúexügü nanangãxügü rũ ñanagürügü: —Nangêxma i duũxügü rũ:

“Cuáũ ya baiũxêẽruũ quixĩ”, ñagüxũ, rũ togü rũ:

“Eria quixĩ”, ñagüxũ, rũ togü rũ:

“Wũxi ga nuxcũmaũcü ga Tupanaãrũ orearũ uruũ i wena maxũcü quixĩ”, ñagüxũ —ñanagürügü.

20 Rũ yexguma Ngechuchu nũxna naca rũ ñanagürü: —¿Rũ pema i ñuxũ ñapegüxũ choxũ na texé chiĩxũ? —ñanagürü. Rũ Pedru nanangãxũ rũ ñanagürü: —Cuma nixĩ i Cristu i Tupana Nane —ñanagürü.

Ngechuchu nanaxunagü ga norũ yuxchiga

(Mt 16.20-28; Mr 8.30-9.1)

21 Rũ Ngechuchu rũ nayaxucuxêgü ga norũ ngúexügü na taxúemaãma nũxũ yaxugüexúcèx ga nũma rũ Cristu na yĩxũ.

22 Rũ ñanagürü nũxũ ga norũ ngúexügü: — Choma i Tupana Nane na duũxũxũ chiĩxũ, rũ poraãcü ngúxũ tá chinge. Rũ choxũ tá naxooxgü

i Yudiŋgüarü äëxgacügüerugü, rü paigüarü äëxgacügü, rü ngëma ngúexëëruüŋgü i Moĩchëarü mugüwa nguxëëtaegüxü. Rû tá choxü nimëxgü, natürü tomaëxpüx i ngunexüŋgu rü wena táxarü chamaxü –ñanagürü.

²³ Rû yixcama rü guxüma ga norü ngúexüŋgüxü ñanagürü: –Rü ngëxguma texé chowe rüxüxchaügu, jëcü nüxü tarüxo i tümaârü ngúchaü, rü namaã tapora i ngëma guxchaxüŋgü i tümacëx ínguxü i ñoma curuchawa tipotaxürüü tüxü ixíxëëxü, rü ngëmaetüwa chowe tarüxüãma!

²⁴ –Erü yíxema tügü maxëchaxëëchaüxë rü tá tayu, natürü yíxema chauxcëx yuxe rü aixcüma tá tüxü nangëxma i maxü i taguma gúxü.

²⁵ ¿Rü tacüwa i nüxü namexü ya wüxi ya yatü ega nayauxägu i guxüma i ñoma i naãneârü ngëmaxüŋgü, natürü iyanatauxëëägu i norü maxü?

²⁶ –Rü ngëxguma texé chauxcëx ãnegu rü naxcëx taxãnegu i chorü ore, rü choma i Tupana Nane i duüxüxü na chiixü rü tá ta tümacëx chaxãne i ngëxguma äëxgacü chixĩãcüma núma chaxüxgu. Rû ngëxguma wenaxârü núma chaxüxgu rü Chau-natü ya Tupanarüü tá chapora, rü daxücüãx i Tupanaârü orearü ngeruüŋgü i üünegüxürüü tá chamexëchi.

²⁷ –Rü aixcüma pemaã nüxü chixu rü ñuxre i duüxüŋgü i nuã ngëxmagüxü rü tá nüxü nadaugü na ñuxãcü äëxgacü na yíixü ya Tupana naxüpa na nayuexü –ñanagürü.

*Ngechuchu rü toraxü nangox
(Mt 17.1-8; Mr 9.2-8)*

28 Rŭ 8 ga ngunexŭguwena ga na yema ñaxŭ, rŭ Ngechuchu rŭ wŭxi ga mēxpŭnewa naxŭ na yēma yayumŭxēxŭcèx. Rŭ ínayaxŭmŭcŭgŭ ga Pedru rŭ Chaŭtiágu rŭ Cuáŭ.

29 Rŭ yexguma ínayumŭxēyane ga Ngechuchu rŭ nachiwe rŭ ngŭrŭāchi niyauracŭü, rŭ naxchiru rŭ ta niyauracŭü, rŭ poraācŭxŭchima nacómŭ.

30 Rŭ yexguma rŭ yēma nangox ga taxre ga yatŭgŭ ga Ngechuchumaā idexagŭxŭ. Rŭ Moíché nixŭ ga wŭxi, rŭ Ería nixŭ ga to.

31 Rŭ yema taxre íyexmagŭxŭwa rŭ poraācŭxŭchi nangóone. Rŭ ínidexagŭ nachiga ga ñuxācŭ Yerucharéŭgu tá na nayuxŭ ga Ngechuchu.

32 Rŭ woo ga Pedru rŭ namŭcŭgŭ rŭ poraācŭ na nayaxtaexŭ rŭ tama napee. Rŭ nüxŭ nadaugŭ ga ñuxācŭ poraācŭ na nangónexŭ ga naxŭtawa ga Ngechuchu rŭ yema taxre ga yatŭgŭ ga namaā yexmagŭxŭxŭtawa.

33 Rŭ yexguma yema taxre ga yatŭgŭ Ngechuchuna ixŭgachitanŭgu, rŭ Pedru rŭ ñanagŭrŭ Ngechuchuxŭ: —Pa Ngúexēēruŭx, namexēchi nixŭ na nuā ingēxmagŭxŭ. ¡Rŭ ngŭxā tanaxŭ ya tomaēxpŭx ya dŭxenŭ, rŭ wŭxi ya cuxcèx, rŭ nái ya Moíchécèx, rŭ nái ya Eríacèx! — ñanagŭrŭ. Natŭrŭ ga Pedru rŭ tama nüxŭ nacuèx ga na ñuxŭ ñaxŭ yerŭ poraācŭ nabaixāchiāē.

34 Rŭ yexguma íyadexayane ga Pedru, rŭ wŭxi ga caixanexŭ natanŭgu nayangèixema. Rŭ poraācŭ namuŭē ga yema ngúexŭgŭ ga yexguma yema caixanexŭ natanŭgu yangèixemagu.

35 Rŭ yema caixanexŭwa inanaxŭ ga wŭxi ga naga ga ñaxŭ: —Daa nixŭ ya Chaune ya nüxŭ

changechaũxũchicü. ¡Rü naga pexĩnüẽ! –ñaxũ.

³⁶ Rü yexguma yema ñaxguwena ga yema naga rü Ngechuchuarü ngúexũgü rü taxúexũma ga toguexũ nadaugü, rü Ngechuchuxũxĩcatama nadaugü. Rü yema ngúexũgü rü taxúemaãma nüxũ nixugüe ga yema nüxũ nadaugũxũ.

Ngechuchu rü nanamexẽẽ ga wüxi ga bucü ga ngoxo nawa yexmacü

(Mt 17.14-21; Mr 9.14-29)

³⁷ Rü yexguma moxũãcü ga guma mèxpúnewa yanachoũgu, rü muxũma ga duũxũgü yexma Ngechuchuxũ nayangaugü.

³⁸⁻³⁹ Rü yema duũxũgütanüwa rü wüxi ga yatü tagaãcü Ngechuchuxũ ñanagürü: –Pa Ngúexẽẽruũx, ¡choxũ rüngũxẽẽ, rü tüxũ nadau ya chaune! Erü tũgümaã choxũ tawüxicèx, rü wüxi i ngoxo tũmawa nangẽxma. Rü ngẽxguma tüxũ naxũxgu, rü aita tüxũ naxũxẽẽ, rü tüxũ naxãũãẽxẽẽ, rü tüxũ narüchièxẽẽ. Rü chixexũ tũmamaã naxũ, rü tama tüxũ ningéxchaũ.

⁴⁰ Rü marü nüxũ chacèèxũ i curü ngúexũgü na tũmawa ínatèxüchigüãxũcèx i ngẽma ngoxo, natürü tama nüxũ inaxĩnü –ñanagürü.

⁴¹ Rü yexguma Ngechuchu nanangãxũ, rü ñanagürü: –Pa Duũxũgü i Tama Yaxögũxũx, ¿Ñuxguratáta i pemaã chanuxmaxũ rü yaxna pemaã cha xĩ-nüxũ? ¡Nuã naga ya cune! –ñanagürü.

⁴² Natürü yexguma Ngechuchuxũtawa nanguxgu ga guma bucü, rü yema ngoxo rü guma bucüxũ ñaxtũanegu nayanguxẽẽ, rü nanaxãũãẽxẽẽ. Natürü Ngechuchu nananga ga yema ngoxo,

rü nanamexêê ga guma bucü. Rü ñuxüchi nanatüxütawa nanamu.

⁴³ Rü guxüma ga duüxügü rü nabaixächiãêgü ga yexguma nüxü nadaugügu ga ñuxãcü na naporaxü ya Tupana.

Ngechuchu rü wenaxãrü nanaxunagü ga norü yuxchiga

(Mt 17.22-23; Mr 9.30-32)

Rü yexguma duüxügü namaã haixächieyane ga yema Ngechuchu üxü, rü ñanagürü ga Ngechuchu nüxü ga norü ngúexügü:

⁴⁴ —¡Meã iperüxĩnüê i ñãã ore i pemaã nüxü chixuxü! ¡Rü täütáma nüxü ipeyarüngümaê! Choma i Tupana Nane na duüxüxü chiixü, rü chauechita tá choxü ínaxuaxügü i duüxügü na ãëxgacügü choxü iyauxgüxücèx —ñanagürü.

⁴⁵ Natürü ga norü ngúexügü rü tama nüxü nacuéxgüéga ga yema namaã nüxü yaxuxü. Yerü Tupana rü tama naxcèx nanangoxêê ga yema ore na nüxü nacuéxgüxücèx. Rü yema ngúexügü rü namuêê ga Ngechuchuna na nacagüxü na meã namaã nangoxêêãxücèx ga yema namaã nüxü yaxuxü.

¿Texé tá tixĩ ya guxããrü yexera ixĩxê?

(Mt 18.1-5; Mr 9.33-37)

⁴⁶ Rü yexguma ga norü ngúexügü rü inanaxügüe ga nügümaã na yaporagatanücüxü nachiga ga texé tá tiixü ya natanüwa guxããrü yexera ixĩxê.

⁴⁷ Natürü Ngechuchu rü nüxü nacuéxama ga yema norü ngúexügü nagu rüxĩnüêxü. Rü yemacèx wüxi ga buxü nügüxütawa naga, rü nügüxütagu nayachixêê.

48 Rũ ñanagürü nüxũ ga norü ngúexũgü: —Texé ya ñaã buxũxũ meã yaxúxe chauégagu, rü choxũ nixĩ i tayaxuxũ. Rũ yixema meã choxũ yaxúxe, rü Chaunatü ya núma choxũ mucũxũ rü ta meã tayaxu. Rũ yixema guxããrũ yexera tũgü írũxíraxe, rü yixema tixĩ ya guxããrũ yexera ixĩxẽ —ñanagürü.

*Texé ya tama taxchi aixe rü tórü ngũxẽẽruũ tixĩ
(Mr 9.38-40)*

49 Rũ yexguma ga Cuáũ rü ñanagürü nüxũ: — Pa Ngúexẽẽruũx, nüxũ tadau ga wüxi ga yatü ga cuégagu ngoxogü íwoxũxũ. Rũ toma nüxna tanachuxu ga yema yerü tama tatanũxũ nixĩ ga nümax —ñanagürü.

50 Natürü Ngechuchu rü ñanagürü nüxũ: —Tama name i nüxna na penachuxuxũ. Erü texé ya tama taxchi aixe, rü tórü ngũxẽẽruũ tixĩ —ñanagürü.

Ngechuchu nayangagü ga Chaũtiágu rü Cuáũ

51 Rũ yexguma marü yangaicagu ga Ngechuchu ga daxũguxũ ga naãnewa na naxũxũ, rü tama namuũãcũma inaxũãchi ga Yerucharéũwa na naxũxũ.

52 Rũ nügüpẽxegu nayamugü ga ñuxre ga norü orearü ngeruũgü. Rũ nümagü rü nawa naxĩ ga wüxi ga ñãnexãcü ga Chamáriaanewa yexmane, na yexma naxcèx yadaugũxũcèx ga wüxi ga ĩ na Ngechuchu nagu pexũnexũ.

53 Natürü yema Chamáriaanecũãx rü tama nanayauxgũchaũ, yerü nüxũ nacuèxgü ga Yerucharéũwa tá na naxũxũ.

54 Rũ yexguma yemaxũ nadaugügu ga norü ngúexũgü ga Chaũtiágu rü Cuáũ, rü ñanagürügü Ngechuchuxũ: —Pa Corix, ¿cunaxwèxexũ

na Tupanana naxcèx tacaxũ na daxũwa ne namuãxũcèx ya üxü na naguxẽẽãxũcèx i guxũma i ñaã duũxũgü, yema nuxcũmaũcü ga Tupanaãrũ orearũ uruũ ga Ería üxürüũ? –ñanagürügü.

55 Rũ yexguma ga Ngechuchu rũ nüxũ nadawenü, rũ nayangagü, rũ ñanagürü nüxũ: –Pema rũ tama nagu perüxĩnüë na texearũ duũxũgü pixĩgüxũ.

56 –Erü choma i Tupana Nane na duũxũxũ chiĩxũ, rũ tama duũxũgüarũ tauxexẽẽwa núma chaxũ, natürü núma chaxũ na duũxũgüxũ chamaxẽẽxũcèx –ñanagürü. Rũ yexguma rũ náí ga ñanexãcüwa naxĩ.

*Duũxũgü ga Ngechuchuwe rüxĩxchaũxũchiga
(Mt 8.19-22)*

57 Rũ yexguma namagu naxĩxgu rũ wüxi ga yatü Ngechuchuxũ ñanagürü: –Pa Corix, cuwe charüxũxchaũ i ngextá cuma ícuxũxüwa –ñanagürü.

58 Rũ Ngechuchu nanangãxũ rũ ñanagürü: – Ngowagü rũ nüxũ nangẽxma i naxmaxũgü, rũ werigü rũ nüxũ nangẽxma i naxchiãũgü, natürü choma i Tupana Nane na duũxũxũ chiĩxũ, rũ nataxuma i chauchica i ngextá nagu chicuxeruxũ –ñanagürü.

59 Rũ Ngechuchu ñanagürü nüxũ ga wüxi ga to ga yatü: –¡Chowe rüxũ! –ñanagürü. Natürü nüma ga yema yatü rũ ñanagürü nüxũ: –Pa Corix, noxri chanawèxe i chaunatüxũ ichayatèxira –ñanagürü.

60 Rũ Ngechuchu nanangãxũ rũ ñanagürü: – Nüë ngẽma cutanüxũ i tama yaxõgüxũ iyatèxgü i

ngẽma naxrũũ yuexũ, natũrũ cuma rũ curũ puracũ nixĩ na paxa duũxũgũmaã nũxũ cuyarũxuxũ i Tupanaãrũ ore na ñuxãcũ guxããrũ ãẽxgacũ na yĩixũ i nũmax –ñanagũrũ.

⁶¹ Rũ wũxi ga to ga duũxũ rũ ñanagũrũ Ngechuchuxũ: –Pa Corix, ngẽmããcũ cuwe charũxũchaũ, natũrũ noxri chanaxwẽxe i nũxũ chayarũmoxẽ i ngẽma chopatacũãxgũ –ñanagũrũ.

⁶² Natũrũ Ngechuchu rũ ñanagũrũ nũxũ: –Texẽ ya yĩxema inaxũgũxe na Tupanaãrũ puracũwa tapuracũxũ natũrũ tũmaãrũ ngẽmaxũguama rũxĩnũxẽ, rũ tama tame na Tupanaãxũ tapuracũxũ –ñanagũrũ.

10

Ngechuchu nayamugũ ga 72 ga norũ ngũexũgũ

¹ Rũ yemawena ga Cori ga Ngechuchu rũ nayadexechi ga 72 ga to ga norũ ngũexũgũ. Rũ taxrechigũ inayamugũ na yoxni guxũ ga yema ããnegũ rũ nachicagũ ga Ngechuchu nawa ũxchaũxũwa na naxĩxũcèx.

² Rũ ñanagũrũ nũxũ: –Aixcũmaxũchi nangẽxma i muxũchixũ i duũxũgũ i yaxõgũchaũxũ natũrũ ngema Tupanaarũ orearũ uwa puracũexũ rũ noxretama nixĩ. Rũ ngẽmacèx name i perũ yumũxẽwa nũxna peca ya yima puracũarũ yora na ngema norũ puracũwa namugũãxũcèx i to i puracũtanũxũ..

³ –¡Rũ ipexĩãchi rũ ngẽma pexĩ! Rũ dũcax, ñoma carnerugũ i aigũtanũwa imugũxũrũũ nixĩ i pexũ chimugũxũ.

⁴ –¡Rũ tãũtãma choca ípinge, rũ bai i perũ dũẽru, rũ bai i perũ chapatu! Rũ tama chanaxwẽxe

i namagu penuxcü i ngëxguma namawa texéxü perümoxëgügu.

5 –Rü ngëxguma wüxi ya İwa pengugügu, rü ñaãcü tá nüxü perümoxëgü i ngëma duüxügü:

“¡Petaãxë erü Tupana rü napetanügu!”, ñaperügügu tá.

6 –Rü ngëxguma ngema nangëxmagu i duüxügü i Tupanaxü cuëxgüchaüxü rü Tupana rü tá nüxna nanaxã i taãxë. Natürü ngëxguma ngema nataxuxgu i duüxügü i Tupanaxü cuëxgüchaüxü, rü ngema Tupanaarü taãxë rü pexrütáma nixi.

7 –¡Rü wüxi ya İgutama perücho, rü ngëma pechibüe rü peyaxü i ngëma nüxü ngëxmaxü i ngëma İcũãxgü! Erü wüxi i puracütanüxü rü name nixi na nayauxãxü i norü natanü naxcëx i norü puracü. Rü yima İãnewa pengëxmagüyane rü tama chanaxwëxe i náı ya İgu peyapegü.

8 –Rü ngëxguma wüxi ya İãne ya nawa meã pexü nayaxunewa pengugügu, ¡rü penangö i ngëma õna i pexna naxãgüxü!

9 –¡Rü penameëxëx i ngëma idaaweexü i yima İãnewa ngëxmagüxü! ¡Rü namaã nüxü pixu rü ñapegügu nüxü:

“Tupanaarü pora rü marü pexna nangaicama rü napexütagu”, ñapegügu nüxü!

10 –Natürü ega nawa pengugügu ya wüxi ya İãne i ngextá duüxügü tama meã pexü İyauxgüxüwa, ¡rü ngëma İtamügu İpechoxü rü ñapegügu nüxü i ngëma İãnecũãx!:

11 “Rü woo ñaã perü İãnearü üxaxü i tocutüwa yaxüxü, rü itanapagü, na ngëmawa nüxü pecuáxcëx na Tupana rü tama pemaã nataãëxü.

¡Natürü tama nüxü ipeyarüngümaẽ na marü pexna nangaicamaxüchichiréxü ya Tupana na perü ãëxgacü yïxü”, ñaperügügü tá nüxü i ngẽma ãnecüãx!

¹² –Rü pemaã nüxü chixu rü ngẽma ngunexü i nagu nagúxü i naãne, rü Chodomacüãx i duïxügüarü yexera Tupana tá nanapoxcue i ngẽma duïxügü i tama meã pexü yauxgüxü.

*Ãnegü ga tama Tupanaga ãnüene
(Mt 11.20-24)*

¹³ –Rü wüxi i ngechaü nixï i pexcèx, Pa Corachïcüãx rü Bechaïdacüãx i Duïxügüx, yerü yexguma chi Tiruarü ãnewa rü Chidãüârü ãnewa chanaxüxgu ga yema mexügü ga cuèxruügü ga Tupanaârü poramaã petanüwa chaxüxü, rü woo ga na poraãcü yachixexü ga yema Tirucüãx rü Chidãücüãx ga duïxügü rü nuxcümama chitama nüxü narüxoe ga nacüma ga chixexü, rü poraãcüxüchi chima nügümaã nangechaügü rü naxauxe, yerü chi nügü nicuèxãchitanü ga na yapedaduãxgüxü.

¹⁴ –Naturü pemaã nüxü chixu rü ngẽma ngunexü i Tupana nagu napoxcuexü i pecaduãxgüxü, rü ngẽma ngunexügu rü Tirucüãx rü Chidãücüãxârü yexera tá pexü napoxcue i pemax.

¹⁵ –Rü pemax, Pa Capernáucüãxgü i Duïxügüx ¿éxna pema nagu perüxïnúëgu rü daxügüxü i naãnewa tá pexïxü? Pemaã nüxü chixu rü naãnetüüwa i ngextá Tupana Chatanáxü ípoxcuxüwa tá nixï i pewogüxü.

16 Rū ñuxũchi norü ngúexũgũxũ ñanagürü: — Rū yíxema pega ñnüëxê, rü chauga rü ta taxĩnüë. Natürü yíxema tama pega ñnüëxê, rü chauga rü ta tama taxĩnüë. Rū yíxema tama chauga ñnüëxê, rü tama naga taxĩnüë ya Chaunatü ya núma choxũ mucü —ñanagürü ga Ngechuchu.

Nawoegu ga yema 72 ga Ngechuchuarü ngúexũgü

17 Rū taãëãcüma nawoegu ga yema 72 ga norü ngúexũgü ga yamugũxũ. Rū ñanagürügü nüxũ: — Pa Corix, ngëxguma cuégagu tidexagügu, rü èixrũxũ i ngoxogü rü toga naxĩnüë —ñanagürügü.

18 Rū Ngechuchu rü ñanagürü nüxũ: —Ngëmäãcü aixcüma nixĩ. Yerü nüxũ chadau ga Chataná ga daxũguxũ ga naãnewa na nataëxũ wüxi ga aëmacürüü.

19 —Rü choma nixĩ ga pexna chanaxãxũ ga pora na tama chixexũ pemaã naxügüxücèx ega woo äxtapegüwa rü ëxna tuxchinawegüwa pengagügu. Rū yexgumarüü ta pexna chanaxã ga pora na nüxũ perü- yexeraxücèx i guxũma i Chatanáärü pora na ngëmaãcü taxucürüwama tacü rü chixexũ pemaã naxüxücèx.

20 —¡Natürü tãxũ i petaãëgüxũ naxcèx i ngëma na pega naxĩnüëxũ i ngoxogü! Rū narümemaë nixĩ i petaãëgü naxcèx na marü naxümatüxũ i peéga i Tupanaärü poperawa i daxũguxũ i naãnewa — ñanagürü.

*Ngechuchu rü nataãë
(Mt 11.25-27, 13.16-17)*

21 Rū yexgumatama ga Tupanaãë ga Üünexũ rü poraãcü Ngechuchuxũ nataãëxê. Rū ñanagürü

ga Ngechuchu: –Pa Chaunatü, Pa Daxũguxü i Naãne rü Ñoma i Naãneãrü Yorax, cuxü chicuëxüü, yerü ñaã chorü ngúexũgũxü nüxü cucuëxëë i ñaã ore ga naxchaxwa iquicúxü ga duũxũgü i ñoma i naãnewa nüxü cuëxüchigũxü. Rü yemaãcü cunaxü, Pa Chaunatüx yerü yemaãcü nixĩ ga cunaxwèxexü –ñanagürü.

²² Rü ñanagürü ga Ngechuchu: –Chaunatü choxna nanaxã i guxüma i tacü i ngëxmaxü. Rü taxúema choxü tacuèx na Tupana Nane chiixü. Rü Chaunatüxicatama nixĩ ya choxü cuácü na Nane chiixü. Rü ngëxgumarüü ta taxúema nüxü tacuèx na texe yĩxü ya Chaunatü. Rü choma ya Nane rü ngëma duũxũgü i Chaunatüxü nüxü chadauxëëchaũxüxĩcatama nixĩ i nüxü cuëxgũxü na texe yĩxü –ñanagürü.

²³ Rü yexguma norü ngúexũgũxü nadawenü, rü namaãxĩca ñanagürü: –Tataãëgü ya yixema tümãxëtümaãxüchi nüxü daugüxe i ñaã ñuxma pema nüxü pedaugũxü.

²⁴ –Erü pemaã nüxü chixu, rü muxüma ga nuxcümaũgũxü ga Tupanaãrü orearü uruũgü rü ãëxgacügü ga tacügü, rü nüxü nangúchaũ ga nüxü na nadaugüchaũxü i ñaã ñuxma pema chauxütawa nüxü pedaugũxü. Natürü tama nüxü nadaugü. Rü nüxü nangúchaũ ga nüxü na naxĩnüëchaũxü i ñaã ñuxma pema chauxütawa nüxü pexĩnüëxü. Natürü tama nüxü naxĩnüë –ñanagürü.

Ore ga mecü ga Chamáriacũãxgu ixuxü

²⁵ Rü yexguma inachi ga wüxi ga ngúexëëruü ga Moĩchëarü mugüwa nguxëëtaexü,

rü Ngechuchuxütawa naxũ na namaã yanadexaxüçèx. Rü Ngechuchuxũ naxüxchaũ, rü yemacèx nüxna naca rü ñanagürü: —Pa Ngúexêëruũ ya Ngechuchux, ¿Tacü nixĩ i mexũ na chanaxüxũ na choxũ nangëxmaxüçèx i maxũ i taguma gúxũ? —ñanagürü.

²⁶ Rü Ngechuchu nanangãxũ, rü ñanagürü: — ¿Ñuxũ ñaxũ i ngëma ore i Moïchéarü mugüwa ümatüxũ? ¿Rü tacüxũ i cumaã yaxuxũ? — ñanagürü.

²⁷ Rü yema ngúexêëruũ ga Moïchéarü mugüwa ngüxêëtaexũ, rü Ngechuchuxũ nangãxũ, rü ñanagürü: —¡Nüxũ nangechaũ ya Cori ya curü Tupana i guxũma i curü maxũmaã, rü guxũ i cuãëmaã, rü guxũ i curü poramaã, rü guxũ i nagu curüxĩnüxũmaã! ¡Rü nüxũ nangechaũ i cumücü ngëma na cugütama cungechaũxürü! —ñanagürü.

²⁸ Rü yexguma ga Ngechuchu rü ñanagürü nüxũ: —Ngëma ore i choxũ namaã cungãxüxũ rü marü name. Rü ngëxguma ngëma ore quinguxêëxgu, rü tá cunayaxu i maxũ i taguma gúxũ —ñanagürü.

²⁹ Natürü ga yema ngúexêëruũ ga Moïchéarü mugüwa ngüxêëtaexũ, rü nügüétüwa nachogüchaũ. Rü yemacèx Ngechuchuna naca, rü ñanagürü: — ¿Rü texé tixĩ ya chomücü? —ñanagürü.

³⁰ Rü yexguma ga Ngechuchu rü nanangãxũ, rü ñanagürü nüxũ: —Wüxi ga yatü Yerucharéüwa ne naxü, rü Yericú ga ñanewa naxü. Rü namagu nüxũ nangaugü ga ngítèèxgüxũ. Rü guxũma ga norü yemaxüçèx nangĩxgü, rü èixrüxũ ga naxchiru rü ta naxcèx nangĩxgü. Rü nanaçuaixgü, rü nayayuãchixêëgü, rü yemaãcü yéma nanatèxgü.

31 –Rü yematama namawa naxüpetü ga wüxi ga Yudiügüarü pai. Natürü yexguma yema yatüxü nadèuxgu rü nüxü yéma naxüpetümare.

32 –Rü yéma naxüpetü ta ga wüxi ga Lebítanüxü ga tupauca ga taxünewa puracüxü. Rü yexguma yema yatüxü nadèuxgu, rü nüma rü ta nüxü naxüpetümare.

33 –Natürü yixcüra rü wüxi ga Chamáriaanecüãx ga yatü rü yematama namawa naxüpetü. Rü yexguma guma yatüxü nadèuxgu rü nüxü nangechaütümüü.

34 –Rü guma yatücèx nixü. Rü chixü rü binumaã nanaxüxü ga norü oxrigü, rü meãma nayanèixgü ga yema norü oxrigü. Rü ñuxüchi norü burugu nanamunagü, rü wüxi ga pegüchicawa nanaga. Rü yéma nüxna nadau.

35 –Rü moxüãcü ga yexguma inaxüãchigu ga yema Chamáriaanecüãx, rü ngixü nayaxu ga taxretachinü ga norü dñeru, rü yema pegüchicaarü yorana ngixü naxã. Rü ñanagürü nüxü:

“¡Nüxna nadau i ñaã yatü! Rü ngëxguma yexeragu naxãtanügu na nuã nangëxmaxü, rü choma tá cuxü chanaxütanü i ngëxguma chataeguxgu”, ñanagürü.

36 Rü ñanagürü ga Ngechuchu nüxü ga yema ngüexëëruü ga Moïchëarü mugüwa nguxëëtaexü: –Ñuxma chanaxwèxe i chomaã nüxü quixu i ngëxürüüxü ga yema tomaëxpüxtanüwa ga aixcüma namücü ixixü ga yema yatü ga ngitèëxgüxü imèxgüxü –ñanagürü ga Ngechuchu.

37 Rü yexguma ga yema ngüexëëruü ga Moïchëarü mugüwa nguxëëtaexü rü ñanagürü:

—Yema Chamáriaanecũãx nixĩ ga yema yatümücü ixĩxũ, yerü nüxũ nangechaũtümüũ —ñanagürü. Rũ yexguma ga Ngechuchu rü ñanagürü nüxũ: — ¡Ñuxma rü íixũ rü yema Chamáriaanecũãx üxürüũ naxü! —ñanagürü nüxũ.

Marta rü Maríapatawa nangu ga Ngechuchu

³⁸ Rũ yexguma Ngechuchu namagu ixũxgu norü ngúexũgümaã rü wüxi ga ñanexãcüwa nangu. Rũ yema guma ñanexãcüwa rü wüxi ga nge ga Martagu ãegacü ngĩgüpatawa inanguxẽẽ.

³⁹ Rũ Martaaxũ iyexma ga wüxi ga ngĩyèx ga Maríagu ãegacü. Rũ ngĩma rü Ngechuchucutüxũtawa irüto na inaxĩnũcèx ga Ngechuchuarü ore.

⁴⁰ Natürü ga Marta rü itaarü puracüãx rü yemaãcü ngĩrü puracüguama irüxĩnũ. Rũ yemacèx Ngechuchucèx iyaxũ, rü ngĩgürügü nüxũ: —Pa Corix, ¿tama èxna nagu curüxĩnũ i ngẽma na chataarü puracüãxũ rü ngẽma chaueyèx rü chox-naxĩca na natáãxũ i guxũma i ngẽma puracü? ¡Rũ namaã nüxũ ixu na choxũ nangũxẽẽxücèx! — ngĩgürügü.

⁴¹ Natürü Ngechuchu rü ngĩxũ nangãxũ, rü ñanagürü ngĩxũ: —Pa Martax, cuma rü poraãcü curü puracücèx cuxoegaãẽ, rü muxũma i ngẽmaxũgu curüxĩnũ.

⁴² —Natürü wüxixicatama nixĩ i guxũärü yexera i mexũ na nagu rüxĩnũxũ. Rũ María iyixĩ i ngẽmagu rüxĩnücü. Rũ taxúetáma ngĩxna tayanuxũ i ngẽma —ñanagürü ga Ngechuchu.

11

*Ngechuchu nanangúexēē ga yumüxēchiga
(Mt 6.9-15, 7.7-11)*

¹ Rü wüxicana wüxi ga nachicawa nayumüxē ga Ngechuchu. Rü yexguma nüxü nachauxgu, rü wüxi ga norü ngúexü rü ñanagürü nüxü: —Pa Corix ¡toxü nangúexēē na ñuxácü tayumüxēgüxü, yema Cuáü ga baiüxēēruü norü ngúexügüxü nangúexēēxürüü! —ñanagürü.

² Rü Ngechuchu ñanagürü nüxü: —Rü ngëxguma peyumüxēgügu rü ñaperügügü tá:

“Pa Tonatü ya Daxügücüx, rü aixcüma Üünecü quixĩ i cumax. ¡Rü núma naxü na torü äëxgacü quiixüçèx! Rü tanaxwèxe i curü ngúchaü na naxügüxü i duüxügü i ñoma i nañewa, ngëma daxügüxü i nañewa na curü ngúchaü ínaxügüxürüü.

³ ¡Rü toxna naxã i torü õna i wüxichigü i ngunexüçèx ixixü!

⁴ ¡Rü toxü nüxü nangechaü i torü pecadugü, erü toma rü ta tüxü nüxü tangechaü ya guxãma ya yixema chixri tomaã chopetüxe! ¡Rü tãxü i tacü rü chixexüpëxewa toxü cuwogüxü na tama nagu tayixüçèx!”

ñanagürü.

⁵ Rü ñanagürü ta ga Ngechuchu: —Ngëxguma chi wüxie i pema rü tüxü nangëmaxgu i wüxi i tümamücü, rü chi ngãxüçüü napatawa taxüxgu rü ñatagügu nüxü:

“Pa Chomücüx, ¡tomaëxpüx i pãu choxna naxã!

⁶ —Erü wüxi i chomücü rü yaxüwa ne naxü, rü ngexwacèx chopatawa nangu. Rü

choma rü changearü õnaãx, rü taxuũmaãma chanachibüxẽẽega”, ñatagügu.

7 –Rü ngẽma tümamücü i napatawa ngẽxmaxũ, rü chi tüxũ nangãũxgu rü ñaxgu:

“¡Tãxũ i choxũ cuchixewexũ! Chorü ñãx rü marü narüwãxta, rü choma rü chauxácügü rü ngürücarewa tangẽxmagü. Rü ngẽmacèx taxucürüwa ícharüda na tacü cuxna na chaxãxücèx”, ñaxgu chi tüxũ.

8 –Rü pemaã nüxũ chixu, rü ngẽma na tümamücü yĩxücèx rü tãütáma ínarüda na tacü tüxna naxãxücèx. Natürü tá ínarüda na tama tanachixeweechaxücèx, rü tá tüxna nanaxã i guxũma i tacü i tanaxwèxexũ.

9 –Rü ngẽmacèx pemaã nüxũ chixu rü, ¡Naxcèx ípeça rü Tupana rü tá pexna nanaxã! ¡Rü Tupanacèx pedèux rü tá nüxũ ipeyangau! ¡Rü ñãxwa: Tu tu tu ñapegü, rü tá pexcèx niwãxna i ñãx!

10 –Erü guxãma ya yíxema naxcèx íçaxe rü tanayaxu, rü guxãma ya naxcèx dauxe rü nüxũ itayangau. Rü guxãma ya ñãxwa: Tu tu tu ñagüxe, rü tümacèx tá niwãxna i ñãx.

11 –¿Rü ñuxãcü i wüxi i pema na papágü piĩxũ rü penena penaxãxũ ya wüxi ya nuta ega pãücèx pexna nacaxgu, rü õxna wüxi i ãxtape ega choxnicèx pexna nacaxgu?

12 –¿Rü texé i petanüwa rü penena penaxã i tuxchinawe ega wüxi ya otacharaücèx pexna nacaxgu?

13 –Rü ngẽma pema na pichixecümachiréxũ natürü nüxũ pecuèx na ñuxãcü mexũ i ãmare pexacügüna na pexãxũ, rü pemaã nüxũ chixu rü Penatü ya Daxũgücü rü perü yexera tá nixĩ na

peyna mexũ naxãxũ. Rũ guxãma ya yíxema Tupanaxõtawa Naãe i Üünexũcèx ícaxe, rũ tá tũxna nanaxã –ñanagürü ga Ngechuchu.

Ngechuchuxũ nixugüe na ngoxoarü poramaã napuracüxũ nawogüe

(Mt 12.22-30; Mr 3.20-27)

¹⁴ Rũ Ngechuchu ínanatèxüchi ga wüxi ga ngoxo ga wüxi ga yatüxũ ngegaxèẽxũ. Rũ yexguma ínaxũũxgu ga yema ngoxo rũ guma yatü rũ nidexa. Rũ guxũma ga duũxügü rũ nabaixãchiãægü ga yexguma yemaxũ nadaugügu.

¹⁵ Natürü ñuxre ga duũxügü rũ ñanagürügü: – Ñãã yatü i Ngechuchu, rũ Behebú i ngoxogüarü ãëxgacüarü poramaã nixĩ i ínanawoxũãxũ i ngoxogü –ñanagürügü.

¹⁶ Natürü ga togü rũ nüxũ naxügüchaũ, rũ yemacèx naxcèx ínacagü ga nüxũ na nawéaxũ ga wüxi ga cuèxruũ ga daxüçüãx na yemawa nüxũ nacuèxgüxüçèx rũ ngoxi aixcüma Cristu yĩ.

¹⁷ Natürü nüma ga Ngechuchu rũ nüxũ nacuèxama ga tacügu na naxĩnüèxũ, rũ yemacèx ñanagürü nüxũ: –Ngëxguma chi wüxi i nachiuãnecüãx i duũxügü nügü itoyegu rũ nügütanüwa chítama nügü nadaixgu, rũ nügü chítama naguxèẽ. Rũ ngëxguma chi wüxi ya ícüãx nügümaã nuèèchagu rũ nügü nadaixgu, rũ nügü chítama naguxèẽ.

¹⁸ –¿Rũ ngëxguma chi Chataná nügümaãtama nuxgu, rũ nügütama yamèxgu, rũ ñuxácü chi i ãëxgacüecha yĩixũ? Rũ ngëma ñacharügü i ñuxma erü pema choxũ pixuxgu rũ Behebúarü poramaã íchanawoxũ i ngoxogü.

19 —Natürü ngëxguma chi Chatanáärü poramaã íchanawoxügu i ngoxogü, rü perü ngúexügu rü chita Chatanáärü poramaã ínanawoxü i ngoxogü. Rrü ngēmawa meã nüxü tacuèx na pema rü ípetüexü.

20 —Natürü pemaã nüxü chixu rü aixcüma Tupanaärü poramaã nixĩ i íchanawoxüxü i ngoxogü. Rrü ngēmawa pexü nüxü chacuèxëë na núma petanüwa nanguxü ya Tupana na äëxgacü yïxüçèx.

21 —Rrü ngëxguma wüxi ya yatü ya poracü rü meãma nügü naxüxnegu rü nüxna nadèuxgu ya napata, rü taxúetáma naxcèx tangĩx i norü ngëmaxü i napatawa ngëxmaxü.

22 —Natürü ngëxguma ínanguxgu i to i yatü i nüxü rüporamaëxü, rü nüxü nayexeragu, rü tá nüxna nanapuxü ya naxne ya nügü namaã ínaporaãxüne, rü tá nüxna nanapuxü i guxüma i norü ngëmaxü, rü tá nayana.

23 —Yíxema tama choxü ngechaüxë rü chauxchi taxai. Rrü yíxema tama choxü rüngüxëexë na Tupanacèx tayagagüxü i duüxügu rü chauxchawa tanangianexëë.

ngoxo i taeguxüchiga
(Mt 12.43-45)

24 —Rrü ngëxguma wüxi i ngoxo rü wüxi ya yatüwa ínaxüüxgu, rü dauxchitagu nanañaãne, rü naxcèx nadau na ngextá na nangüxü. Rrü ngëxguma taxuguma nangüëgagu, rü nügü ínicuèx rü ñanagürü:

“Maneca naxcèx tá chataegu ya yima yatü ga noxri nawa íchaxüxüchirécü”, ñanagürü.

25 –Rü ngëxguma nataegugu, rü yima yatüxü inayangau na ñoma wüxi ya ï ya mexëene rü meã nabixichinerüü na yïxü.

26 –Rü ínixü rü naxcèx nayadau i to i 7 i ngoxogü i norü yexera i chixexü. Rü guxüma i ngëma ngoxogü rü wüxigu yima yatügu nachocu, rü ngëxma naxãchiüügü. Rü ngëxguma ya yima yatü rü noxrïarü yexera nachixe –ñanagürü.

Taãe i aixcüma ixïxüchiga

27 Rü yemaxü íyaxuyane, rü wüxi ga ngecü rü duüxügütanüwa tagaãcü ngïgürügü: –Tataãe ya yíxema tügüanüwa cuxü yaxëexë rü tügü nixüwa cuxü maïxë –ngïgürügü.

28 Natürü ga Ngechuchu rü ñanagürü: –Yexeraãcü tataãe ya yíxema nüxü ñnuxë i Tupanaärü ore rü naga ñnuxë –ñanagürü.

Duüxügü ga tama yaxögüchaïxü rü naxcèx ínacagüama ga to ga cuëxruü ga Tupanaärü poramaã üxü

(Mt 12.38-42; Mr 8.12)

29 Rü nimuëtanü ga duüxügü ga Ngechuchuxütawa ngutaquëxegüxü. Rü inanaxügü ga Ngechuchu ga namaã na yadexaxü. Rü ñanagürü: –Naã duüxügü i ñomaücüü maxëxü rü nichixecüma. Rü naxcèx ínacagü i wüxi i cuëxruü i mexü i Tupanaärü poramaã üxü. Natürü Tupana rü wüxixicatama i cuëxruü tá nüxü nawëx. Rü ngëma nixï i cuëxruü ga Tupanaärü orearü uruü ga Yonáwa duüxügüxü nawëxü na nüxü nacuëxgüxücèx na aixcüma Tupana yïxü ga guma yéma namucü.

30 –Rü yexgumarüŭ ga Yoná rü wüxi ga cuèxruŭ nixĩ naxcèx ga Nínibecũãx ga duŭxũgü, rü ngëxgumarüŭ tá ta nixĩ ya Tupana Nane ya duŭxũxũ ixĩcü na wüxi i cuèxruŭ tá yĩxũ naxcèx i ñomaũcüü maxëxũ i duŭxũgü.

31 –Rü ngëxguma naãneãrũ guxgu rü Tupana rü ñomaũcüü maxëxũ i duŭxũgüna nacèxgu i norü pecaduchigacèx, rü ngĩma ga nuxcümaũcü ga Chabaaneãrũ ãëxgacü tá írũda rü tá ínaxuaxũ i ñomaũcüü maxëxũ i duŭxũgü. Yerü ngĩma rü yaxũwaxüchi ne ixũ ga na ãëxgacü ga Charumóũxũ naxĩnũxũcèx ga ñuxãcü poraãcü nüxũ na nacuèxüchixũ. Natürü ñuxma nuã petanüwa nangëxma i wüxi i Charumóũãrũ yexera ixĩcü.

32 –Rü ngëxguma naãneãrũ guxgu rü Tupana rü ñomaũcüü maxëxũ i duŭxũgüna nacèxgu norü pecaduchigacèx, rü nuxcümaũgüxũ ga Nínibecũãx ga duŭxũgü rü tá ínarüdagü rü tá ínanaxuaxũgü i ñomaũcüü maxëxũ i duŭxũgü. Yerü nümagü ga Nínibecũãxgü ga duŭxũgü rü nüxũ narüxoe ga nacümagü ga chixexũ ga yexguma Yoná namaã nüxũ ixuxgu ga Tupanaãrũ ore. Natürü ñuxma nuã petanüwa nangëxma i wüxi i Yonáãrũ yexera ixĩxũ.

Taxüneãrũ omüchiga
(Mt 5.15, 6.22-23)

33 –Taxüema wüxi i omüwa tanangixichi rü ñuxũchi itayacux rü ëxna tacütüügu tayaxücuchi. Natürü norü üchicaũgu tanaxünagü na ngema tüxũ nabaxixüçèx ya yixema duŭxëgü ya yima ïgu chocuxe.

34 –Cuxetügü rü ñoma wüxi i omürüü nixĩ i cuxunecèx. Rü ngëxguma ngëma Tupana cuxũ naxwèxexüçèx cudèuxgu, rü guxũma i curü maxũ rü name. Natürü ngëxguma ñoma i naãneârü ngúchaüçèx cudèuxgu, rü guxũma i curü maxũ rü chixexüwa nangëxma.

35 –¡Meã cugüna nadau na tama eãnexüxũ nanguxuchixüçèx i ngëma ore i mexũ i cuxũ ngëxmaxũ, i ñoma wüxi i omürüü ixĩxũ!

36 –Ngëxguma chi guxũ i curü maxüwa nangëxmagu i Tupanaârü ngóonexũ rü taxuwama nachixëxgu i curü maxũ, rü meã chi nüxũ cucuèx i Tupanaârü ngúchaü ñoma wüxi i omü i cuxũ baxixürüü –ñanagürü.

Ngechuchu rü duixügütanüwa ínanaxuaxũ ga Parichéugü rü ngúxëëruülgü ga Moïchëarü mugüwa nguxëëtaegüxũ

(Mt 23.1-36; Mr 12.38-40; Lc 20.45-47)

37 Rü yexguma nüxũ nachauxgu ga na yadexaxũ ga Ngechuchu rü wüxi ga Parichéu nüxna naxu ga napatawa na yachibüxüçèx. Rü yema Parichéupatawa naxũ, rü mechawa nayarüto.

38 Rü yema Parichéu rü nabaixãchiãë ga yexguma Ngechuchuxũ nadèuxgu na tama yanguxëëãxũ ga yema Moïchëarü mu na nayauxmëxgüxiraxũ ga yexguma nachibüegu.

39 Natürü nüma ga Cori ga Ngechuchu rü ñanagürü nüxũ: –Pema i Parichéugü rü ñoma pochiyu rü poratu i düxétüwaxicatama iyaxuxürüü pixĩgü. Natürü i peãxëwa rü nagu perüxĩnüë na pengixũ rü chixexũ pexüxũ.

40 —Pa Naëchitamare Maxëxüx, çtama ëxna nüxü pecuèx na guma Tupana ga naxücü i ngëma tórü düxëtüxünewa ngëxmaxü, rü gumatama yiixü ga naxücü ga tórü maxü i tórü aixepewa ngëxmaxü?

41 —Rü name nixĩ i Tupanana penaxã i perü maxü na aixcüma naxcëx pemaxëxüçèx. Rü ngëmaäcü tá pime i guxüwama.

42 —Natürü wüxi i ngechaü nixĩ i pexcèx, Pa Parichëugüx, erü pema rü perü ngëmaxüwa rü meã Tupanana penaxã i ngëma noxrü ixixü, natürü perü maxüwa rü tama aixcüma naga pexĩnüë rü tama nüxü pengechaü. Rü marü name na perü ngëmaxüwa Tupanana penaxãxü i ngëma noxrü ixixü. Natürü perü maxüwa rü ta penaxwèxe i meã naga na pexĩnüëxü rü nüxü na pengechaüxü.

43 —Rü wüxi i ngechaü nixĩ i pexcèx, Pa Parichëugüx, erü pema rü pexü nangüchaü i äëxgacüchicagüwa na perütogüxü i ngutaquëxepataügüwa. Rü penaxwèxe na ñoma äëxgacüxü rümoxëxürü na meã pexü namoxëgüxü i duüxügü i ítamügüwa.

44 —Rü wüxi i ngechaü nixĩ i pexcèx, erü ñoma yuetamaügü i tama nüxü idauxü i duüxügü naëchitamare naëtüwa chopetüxürü pixigü. Erü woo perü düxëtüwa pime, natürü aixepewa i peãëwa rü poraäcü pichixe —ñanagürü ga Ngechuchu.

45 Rü wüxi ga ngüexëëruü ga Moïchëarü mugüwa ngüxëëtaexü, rü Ngechuchuxü nangãxü rü ñanagürü: —Pa Ngüexëëruü Pa Ngechuchux, rü ngëma na ngëma ñacuxü, rü toma rü toãëwa nangüx —ñanagürü.

46 Natürü Ngechuchu rü ñanagürü nüxü: — Wüxi i ngechaü nixĩ i pexcèx, Pa Ngúexēēruüğü i Moĩchearü Mugüwa Nguxēētaegüxüx, erü poraacü penamu i duüxüğü na naga naxĩnüēxüçèx i ngēma Moĩchearü mugü i guxchaxü i pematama bai i írarüwa naga pexĩnüēchaüxü.

47 —Rü wüxi i ngechaü nixĩ i pexcèx, erü peyamexēēğü i tümamaüğü ga guxema nuxcūmaüğüxe ga Tupanaärü orearü uruüğü ga perü oxigü tüxü dèixe.

48 —Rü ngēmawa nüxü tacuèx na pema rü ta ipexāgüxü nawa ga yema chixexü ga perü oxigü ügüxü. Yerü nümagü rü tüxü nadai ga guxema Tupanaärü orearü uruüğü, rü ñuxma i pema rü peyamexēēğü i tümamaüğü.

49 —Rü yemacèx nixĩ ga Tupana ga ñaxü: “Ngēma duüxüğütanüwa tá chanamugü i chorü orearü uruüğü rü chorü orearü ngeruüğü. Natürü ngēma duüxüğü i chixexüğü rü tá nanadai i nümaxü rü togüxü rü tá nachixewegü rü tá nawe ningēxütanü”,

ñaxü ga Tupana.

50-51 Rü ñanagürü ga Ngechuchu: —Rü pemaã nüxü chixu rü Tupana tá nayapeguächixēē i pema i ñuxma maxēxē erü pema rü ta perü oxigücūmagu pexĩ. Nümagü rü noxritama naãneärü ügügumama rü nanadai ga muxüma ga Tupanaärü orearü uruüğü. Rü nüxĩra nayamèxgü ga Abé rü gumawena nayadaietanü ga muxüma ga togü ñuxmata Zacaría ga tupauca ga taxünegu yamèxgüãcüwa nangu. Rü guxüma ga yema orearü uruüğü ga perü oxigü dèixüçèx rü Tupana tá pexna naca, erü pema rü ta perü oxigürüütama

pixĩgü rü tama nüxũ perüxoechaũ i ngẽma chixexũ i pexũxũ.

52 –Rü wüxi i ngechaũ nixĩ i pexcèx, Pa Ngúexẽẽruũgü i Moĩchearü Mugüwa Nguxẽẽtaegüxũx, erü duũxüğüchaxwa ipeyacux i Tupanaãrü ore i aixcüma ixĩxũ i pematama tama pixõgüxũ. Rü nüxna penachuxu i togü i duũxüğü i aixcüma yaxõgüchaũxũ na nümagü rü ta tama yaxõgüãxüçèx –ñanagürü ga Ngechuchu.

53-54 Rü yexguma Ngechuchu yema ñaxgu, rü yema ngúexẽẽruũgü ga Moĩchearü mugüwa nguxẽẽtaegüxũ rü yema Parichéugü rü poraãcü Ngechuchumaã nanuẽ. Rü inanaxüğü ga nüxna na nacagüexũ naxcèx ga muxüma ga ore ga guxchaxümaã na yemaãcü chi nüxũ iyangaugüxüçèx ga ore ga chixexũ na yemamaã norü ãëxgacügüxũ- tawa Ngechuchuxũ íyaxuaxüğüçèx.

12

Ngechuchu nanangúexẽẽ na tama namexũ na duũxüğüpëxewa meã imaxnetaxũ natürü taãewa rü chixexügu rüxĩnũxũ

1 Rü yoxni yexma nangutaquëxegü ga muxüchixũ ga duũxüğü. Rü yema na namuxüchixüçèx rü düxwa nügücutüwa ningagüetanü ga duũxüğü. Rü Ngechuchu inanaxüğü ga norü ngúexüğümaãxĩra na yadexaxũ, rü ñanagürü: –¡Pexuãëgü naxcèx i Parichéugü! Erü duũxüğüpëxewa meã namaxënetaxũ natürü naãewa rü chixexügu narüxĩnũẽ.

2—Natürü guxŭma i ʔacü i wüxie cúãcü üxŭ rü tá nangoxoma. Rü guxŭma i ʔacü iicúxŭ rü yixcúra rü tá duŭxŭgü nüxŭ nacuèxgüama.

3—Rü ngēmacèx guxŭma i ngēma ore i ěānexŭwa cúãcü nüxŭ pixuxŭ rü yixcúra rü tá nangoxoma rü guxŭ i duŭxŭgü tá nüxŭ naxĩnüē. Rü ngēma ore i ucapuarü aixepewa cúãcü nüxŭ pixuxŭ, rü yixcúra rü guxāpēxewa tá nüxŭ nixugügü i duŭxŭgü.

*Name nixĩ na Tupanaxŭ pemuŭĕxŭ
(Mt 10.26.31)*

4—Rü ngēmacèx i pemax, Pa Chomücügŭx, rü pemaã nüxŭ chixu rü ʔtama nüxŭ pemuŭĕ i ngēma duŭxŭgü i pexŭ daixchaŭxŭ! Erü taxŭnexŭxĩcatama nimèxgü, natürü taxucürŭwama taãĕxŭ nimèxgü.

5—Natürü pemaã tá nüxŭ chixu na texéxŭ tá na pemuŭĕxŭ. ¡Nüxŭ pemuŭĕ ya Tupana! Erü nüma nüxŭ nangĕxma i pora na yamáãxŭ i pexene, rü napoxcuãxŭ i peãĕ i ngextá ngoxogŭxŭ ¡napoxcuxŭgu. ¡Rü yimaxŭ tá nixĩ i pemuŭĕxŭ!

6—¿Tama ěxna taxretachinü i dĕruxacŭgu namaã petaxe i wüximĕĕxpŭx i werixacŭgü? Natürü Tupana rü tama tŭxŭ inayarŭngŭma ya yíxema werixacŭãxgü, rü bai ya wüxi.

7—Rü woo i peyaegŭ rü Tupana nüxŭ nacuèx na ñuxre i peyae ngĕxmaxŭ. Rü ngēmacèx, ʔtãxŭ i pexoegaãĕgŭxŭ! Erü pema rü muxŭma i werixacŭgŭarü yexeraxŭchi pexŭ nangechaŭ ya Tupana.

Yíxema duïxügüpëxewa tügü ixuxe na Ngechuchu ya Cristuarü duïxü tiïxü (Mt 10.32-33, 12.32)

⁸ —Rü pemaã nüxü chixu rü guxâma ya texé i ñoma i naãnewa duïxügüpëxewa tügü ixuxe na chorü duïxü tiïxü, rü choma i Tupana Nane na duïxüxü chiïxü, rü napëxewa i Tupanaârü orearü ngeruügü i daxüçüãx rü tá tuxü chixu na chorü duïxü tiïxü i tümax.

⁹ —Natürü texé ya ñoma i naãnewa duïxügüpëxewa tügü ixuxe na tama chorü duïxü tiïxü, rü choma rü tá ta napëxewa i Tupanaârü orearü ngeruügü i daxüçüãx rü tá tuxü chixu na tama chorü duïxü tiïxü i tümax.

¹⁰ —Rü guxâma ya texé ya chixri chauchiga idexaxe i choma i Tupana Nane na duïxüxü chiïxü, rü Tupana tá tuxü nüxü nangechaü i ngëma. Natürü texé ya Tupanaãe i Üünexüchiga chixri idexaxe, rü Tupana rü täütáma tuxü nüxü nangechaü i ngëma.

¹¹ —Rü ngëxguma duïxügü ngutaquëxepataüğüwa rü ëxna äëxgacügüpëxewa pexü nagagügu na pexü napoxcuexüçëx, rü ;täxü i pexoegaãëgüxü na tacümaã tá penangãxüxü rü ëxna tacüxü tá namaã na pixuxü!

¹² —Erü ngëxguma nawa nanguxgu na pidexagüxü, rü Tupanaãe i Üünexü tá pexü nanguxëe na tacüxü tá namaã pixuxü —ñanagürü ga Ngechuchu.

Wüxi i äücümaxü nixi na imuärü dïëruãxü

¹³ Rü yema duïxügütanüwa rü wüxi ga yatü Ngechuchuxü ñanagürü: —Pa Ngüxëëruüx, ;namaã nüxü ixu ya chaueneë rü choxna naxãã i ngëma

chaunatü ga yucüarü ngẽmaxũ i choxna üxũ! — ñanagürü.

14 Natürü Ngechuchu rü ñanagürü nüxũ: —Pa Yatüx, ¿texé perü ãẽxgacüxũ choxũ tingucuchixẽẽ na chayatoyexücèx i ngẽma penatüarü ngẽmaxũ? —ñanagürü.

15 Rũ ñanagürü ta ga Ngechuchu: —¡Pexuãẽ na tama pexũ nangúchaũxücèx i togüarü ngẽmaxũ! Erü wüxi i duũxũ rü tama ngẽma na namuãrũ ngẽmaxũãxücèx nixĩ i nayauxãxũ i norü maxũ i taguma gúxũ —ñanagürü.

16 Rũ yexguma wüxi ga ore ga cuèxruũxũ namaã nixu, rü ñanagürü: —Nayexma ga wüxi ga yatü ga muãrũ dñeruãcü, rü guxũma ga yema nanetügü ga naãnegu natogüxũ rü meãma nüxũ nixu.

17 —Rũ guma yatü rü nagu narüxĩnü rü naãewa ñanagürü:

“¿Tãcü tá chaxüxũ i ñũxmax? Erü nataxuma i chorü nachica i ngexta namaã na changuxũxũ i chaunetügüarü o”, ñanagürü.

18 —Rũ naãewa ñanagürü:

“Marü nüxũ chacuèx na tãcü tá chaxüxũ. Rũ nagu tá chapogü ya guxũnema ya chorü ñpatagü ga nagu namaã changuxũne ga chaunetügüarü o. Rũ nái ya taxüragüne tá chaxü na ngẽxma namaã changuxũxücèx i guxũma i chaunetügüarü o rü guxũma i chorü ngẽmaxũgü.

19 —Rũ ngẽxguma marü namexgu i guxũma, rü chaugümaã tá ñacharügü: ‘Ñũxma rü tá icharüngü rü meã tá chachibü rü meã chaxaxe rü ngẽmaãcü tá chataãẽ. Erü namuxũchi i chorü ngẽmaxũgü, rü mucüma ya taunecü tá choxũ natai’, ñacharügü tá

chaugümaã”.

²⁰ —Natürü Tupana rü ñanagürü guma yatüxü:

“Pa Yatüx, cungëãmare i cuma erü ñoma i chütaxügu tátama cuyu. Rü ngëma curü ngëmaxügu i namaã cunguxüxü, rü ¿texéarü tá nixĩ i ngëxguma?” ñanagürü ga Tupana.

²¹ —Rü ngëxgumarüü tá ta namaã nangupetü i ngëma duüxügu i nügücèxtama norü ngëmaxügümaã nguxüxü rü tama nügü ímexëëxü i Tupanapëxewa —ñanagürü ga Ngechuchu.

Tupana rü naxãcüguna nadau

(Mt 6.25-34)

²² Rü yemawena rü norü ngúexügüxü ñanagürü ga Ngechuchu: —Pemaã nüxü chixu jrü tâxü i pexoegaãëgüxü naxcèx i tacü tá na pengõxü rü tacümaã tá na pixãxchiruxü!

²³ —Erü perü maxü rü õnaärü yexera nixĩ, rü pexene rü naxchiruarü yexera nixĩ.

²⁴ —¡Dücèx penangugü i werigü i tama toegüchiréxü, rü tama nanetüarü o ibuxgüxü, rü ngepatagüxü na ngexta namaã nanguxügüxücèx i norü õna! Natürü Tupana rü nanaxüwemü. Rü pema rü Tupanacèx rü poraãcü guxüma i werigüarü yexera pixigü.

²⁵ —Rü taxuwama name na pexoegaãëgüxü. Erü taxucürüwama wüxie i pema rü pegütama ipemèxãchixëë ngãxü ya metругu ega woo poraãcü naxcèx pexoegaãëgügu.

²⁶ —Rü ngëxguma tama pemaã nanguxü i ngëma íraxü rü taxucürüwama pegütama ipemèxãchixëë ega woo naxcèx pexoegaãëgügu, rü ¿tüxcüü i

ngëxguma rü ta tacü i togü i ngëmaxügücèx pexoegaãëgüxü?

²⁷ —¡Dücèx penangugü i putüragü na ñuxãcü nayaexü i nachacu! Rü tama napuracüexü, rü tama nügü üxchirugüxü. Natürü woo guma ãëxgacü ga Charumóu ga na namexëchixü ga naxchiru rü taguma wüxi ga putürachacuarü mexürü nixi.

²⁸ —Rü marü nüxü pedau i ñuxãcü Tupana na nangèxãëxü i putüragü i ñuxma naãnewa rüxügümarexü natürü moxü rü marü taxuxü. Rü ngëxguma Tupana ngëmaãcü nangèxãëgu i putüragü rü pema rü tá ngëmaãrü yexera pexchiru pexna naxã, Pa Duüxügü i Írarüwatama Yaxögüxüx.

²⁹ —Rü ngëmacèx tama name i pexoegaãë naxcèx i tacü tá na pengõxü rü tacü tá na pixaxüxü.

³⁰ —Erü ñoma i naãnecüãx i duüxügü rü naxcèx nadaugü i guxüma i ngëma pemaã nüxü chixuxü. Natürü pema rü pexü nangëxma ya Penatü ya Tupana ya nüëchama nüxü cuácü na pexü nataxuxü i guxüma i ngëma.

³¹ —Rü ngëmacèx narümemaë nixi na Tupanaãrü ngúchaüçèx pedaugüxü na perü ãëxgacü yíixüçèx. Rü ñuxüchi nüma rü tá pexna nanaxã i guxüma i tacü i pexü taxuxü.

Ñuxãcü tüxü nangëxma i tórü ngëmaxügü i daxügüxü i naãnewa

(Mt 6.19-21)

³² —¡Tãxü i pemuüëxü, Pa Chauzacügüx! Pema rü noxretama pixïgü natürü Penatü ya Tupana rü norü ngúchaü nixi na pexna naxããxü i pechica i ngextá nüma ãëxgacü íyíixüwa.

33 —¡Rü namaã petaxe i perü ngẽmaxũgü rü togü i duũxũgü i nüxũ nataxuxũna penaxã i ngẽma dñeru! Rü ngẽmaãcü tá pegũxũ penangẽxmaxẽẽ i perü ngẽmaxũgü i taguma pexũ ngauxũ rü taguma gũxũ i daxũguxũ i naãnewa i ngextá tama íyaxücuxũwa i ngĩtèxáxũ rü naweane tama ínachixexẽẽxũwa.

34 —Erü ngextá ínangẽxmaxũwa i perü ngẽmaxũgü, rü ngẽxma nixĩ i perüxĩnũẽxũ.

Name nixĩ i yigü ítamexẽẽgü naxĩpa na ínanguxũ ya Cristu

35 —¡Rü ípememare namaã i perü omügü i naĩgũxũ!

36 —Rü name nixĩ i wüxi i coriarü duũxũgü i ímemaregũxũrũũ na pixĩgũxũ. Rü penaxwèxe na ñoma duũxũgü i ñãxwa norü corixũ nangũxẽẽgũxũrũũ na pixĩgũxũ. Rü ngẽxguma norü cori rü wüxi i ngĩgũarü petawa ne naxũxgu rü: Tu tu tu ñaxgu, rü paxa naxcèx nayawãxnagü i ñãx.

37 —Rü nataãẽgü i ngẽma coriarü duũxũgü ega inadauegu i ngẽxguma ínanguxgu i norü cori. Rü pemaã nüxũ chixu rü ngẽma cori rü norü mechawa tátama nanatogũxẽẽ i ngẽma norü duũxũgü i nüxũ ínanguxẽẽgũxũ, rü nüma tátama ngẽma norü duũxũgũxũ inaxüwemü.

38 —Rü woo ngãxũcüü ínanguxgu rü èxna marü yangunechaũgu rü nataãẽgü i ngẽma coriarü duũxũgü ega inadauegu i ngẽxguma ínanguxgu i norü cori.

39 —Rü ngẽxguma chi wüxi ya ñãrũ yora nüxũ cuèxgu na ñuxguacü ínanguégaxũ i ngĩtèxáxũ, rü

tãu chima nape. Rũ chi nüxna nadau ya nap-
ata na tama yawãxnaãxücèx rũ tama na nüxũ
nangĩxücèx.

⁴⁰ —Rũ pema rũ ta penaxwèxe na ípememarexũ.
Erũ ngürũachi tama nagu íperũxĩnüëyane tá íchangu
i choma i Tupana Nane na duũxũxũ chiĩxũ —
ñanagürũ ga Ngechuchu.

*Wüxi ga duũxũ ga meã norũ coriga ñnüxũ rũ to ga
tama meã norũ coriga ñnüxũchiga
(Mt 24.45-51)*

⁴¹ Rũ yexguma ga Pedru rũ Ngechuchuna naca
rũ ñanagürũ: —Pa Corix, ¿toxcèxicatama êxna nixĩ i
ñaã ore i cuèxruũ i tomaã nüxũ quixuxũ, rũ êxna
guxũ i duũxügücèx yĩxũ? —ñanagürũ.

⁴² Rũ ñanagürũ ga Cori ga Ngechuchu: —
¿Texé tiĩxũ ya yíxema tümaãrũ coriarũ duũxẽ ya
aixcũma yanguxẽexẽ rũ meã tümaãẽxũ cuáxe?
¿Tama êxna yíxema tiĩxũ ya tümaãrũ cori tüxna
ãgaxe na meã nüxna tadauxücèx rũ meã oragu
tanachibüexẽẽxücèx i norũ duũxügũ?

⁴³ —Rũ tataãẽ ya yíxema coriarũ duũxẽ i
ngẽxguma ínanguxgu i tümaãrũ cori rũ tüxũ
íyanguẽgu na meãma ítanaxũxũ i ngẽma puracũ i
nagu tüxũ namuxũ.

⁴⁴ —Rũ aixcũma pemaã nüxũ chixu rũ ngẽma
tümaãrũ cori rũ tá guxũma i norũ ngẽmaxũgũarũ
dauruũxũ tá tüxũ nixĩxẽẽ.

⁴⁵⁻⁴⁶ —Natürũ ngẽxguma chi ngẽma duũxũ nagu
rũxĩnügu rũ norũ cori rũ tama paxa na ínanguxũ,
rũ inaxügũãgu na chixri namuãxũ i natanũxügũ
i yatũxügũ rũ ngexügũ, rũ peta naxũxgu rũ
nachibüxgu, rũ naxaxegu, rũ nügũ nangãxẽẽgu, rũ

ngürüächi ngẽma ngunexũ rü ngẽma ora i tama nagu ínanguxẽẽãxũgu tá ínangu i norü cori. Rü poraãcüxüchi tá nanapoxcu ngẽma duũxũgü i tama norü coriga ãnũexũxũ napoxcuexũrũ.

47 —Rü ngẽma coriarü duũxũ i nüxũ cuèxchiréxũ na tacü nanaxwèxexũ i norü cori, natürü tama nügü ímexẽẽxũ rü tama norü coriga ãnũxũ, rü tá poraãcü nanaçuaxi.

48 —Natürü ngẽma coriarü duũxũ i tama nüxũ nacuáãcüma chixri norü coriga ãnũxũ, rü chixexũ üxũ, rü tá írarüwaxüra nanaçuaxi. Rü texé ya Tupana muxüma tüxna ãxẽ, rü muxüçèxtáma tüxna naca. Rü texé ya muxüna tüxũ nadauxẽexẽ rü tá yexeraãcü tüxna naca.

Ngechuchugagu nixĩ i yatoyexũ i duũxũgü
(Mt 10.34-36)

49 —Núma chaxũ na ñoma i naãnewa duũxũgüxũ chidauchitanüxẽẽxũcèx. Rü chierü aixcüma marü yadauchitanügu.

50 —Rü choma rü tá poraãcü ngúxũ chinge, rü chanaxixãchiãẽ ñuxmatáta yangu i ngẽma.

51 —Rü tama name i nagu perüxĩnüẽ na núma chaxũxũ na guxũ i duũxũgü rü wüxigu naxĩnüexũcèx. Natürü pemaã nüxũ chixu rü núma chaxũ na chaugagu yatoyexũcèx i duũxũgü.

52 —Erü ñaãwena ega wüxi ya ípatawa nangẽxmagu i wüximẽẽxpüx i duũxũgü, rü tomaẽxpüx tá choxũ nayaxõgü rü taxre i tama, rü ãxna taxre tá choxũ nayaxõgü rü tomaẽxpüx i tama.

53 —Rü wüxi i papá tá nayaxõ rü nane rü tãütáma nayaxõ, rü ãxna nane tá nayaxõ natürü nanatü i tama. Rü ngẽxgumarüũ ta wüxi i mamá tá iyaxõ

rü ngĩxãcü rü tãútáma iyaxõxchãũ, rü ěxna ngĩxãcü tá iyaxõ rü ngĩe rü tãútáma iyaxõxchãũ. Rũ wũxi ya ngĩxẽ tá iyaxõ rü ngĩneãx rü tãútáma iyaxõ, rü ěxna ngĩneãx tá iyaxõ rü ngĩxẽ rü tãútáma iyaxõ — ñanagürü ga Ngechuchu.

Cuèxruũgü i nachiga i tacü tá nangupetüxũ
(Mt 16.1-4; Mr 8.11-13)

⁵⁴ Rũ Ngechuchu ñanagürü ta nüxũ ga duũxũgü: —Ngẽxguma nüxũ pedèuxgu na naxẽãchianexũ, rü nagu perüxĩnũe tá na napuxũ. Rũ aixcüma ngẽmaãcü nixĩ.

⁵⁵ —Rũ pema nüxũ pecuèx na ñuxãcü penangugüxũ ya buanecü, rü ngẽmaãcü nüxũ pecuèx rü tá na nanguxetüxũ. Rũ aixcüma ngẽmaãcü nixĩ.

⁵⁶ —Pa Duũxũgüx, pema rü togü i duũxũgüpẽxewa meã pemaxẽneta, natürü peãewa rü chixexũgu perüxĩnũe. Pema nüxũ pecuèx na ñuxãcü penangugüxũ ega tá napuxgu rü ěxna tá nanguxetügu. ¿Rũ ñuxãcü i ñuxma i tama nüxũ pecuáxũ na Tupana yĩxũ ya petanüwa ngucü?

Name nixĩ na curüngüxmüxũ namaã i curü uwanü
(Mt 5.25-26)

⁵⁷ —Rũ tüxcüũ tama nüxũ pecuáxchaũ i ngẽma nama i mexũ i Tupana pexũ naxwèxexũ na nagu pexĩxũ.

⁵⁸ —Rũ ngẽxguma chi wüxie wüxi i ngetanücèx cuxũ íxuaxũgu rü ãẽxgacüxütawa cuxũ tagaxgu, rü name nixĩ i namawatama tüxũ icurüngüxmüxẽe na tama ãẽxgacüpẽxewa cuxũ tagaxücèx. Erü wüxicana na ãẽxgacüxütawa cunguxũ rü ãẽxgacü

tá purichíagüna cuxũ namu. Rü purichíagü tá cuxũ napoxcu.

⁵⁹ —Rü cumaã nüxũ chixu rü ngẽxma poxcuchicagu tá curüxãũx ñuxmatáta ngĩxũ cuxütanü i guxcü i dñeru i nüxũ ngĩxũ cungetanücü. [Rü aixcüma ngẽxgumarüü tá cumaã nanaxü ya Tupana ega tama namaã cunamexẽẽxgu i curü maxũ —ñanagürü ga Ngechuchu.]

13

Wüxi i mexĩ nixĩ na nüxũ rüxoexũ i tacüma i chixexũ

¹ Rü yexgumatama Ngechuchuxütawa nangugü ga ñuxre ga duũxügü. Rü Ngechuchumaã nüxũ nixugü ga na ñuxãcü ãẽxgacü ga Piratu namuxũ ga norü churaragü na nadaiãxücèx ga ñuxre ga yatügü ga Gariréaanecũãx ga yexguma yema yatügü rü Tupanacèx carneru nadaixgu tupauca ga taxũnewa.

² Rü Ngechuchu nüxna naca rü ñanagürü nüxũ: —¿Pema nagu perüxĩnũẽgu rü yemaãcü nüxũ nangupetü ga yema yatügü, yerü yema togü ga Gariréaanecũãxãrü yexera nipecaduãxgü?

³ —Pemaã nüxũ chixu rü tama nixĩ. Rü ngẽxguma chi pema rü tama nüxũ perüxoegu i pecüma i chixexũ, rü guxãma i pema rü tá ta ipeyarütauxe.

⁴ —¿Rü ẽxna pema nagu perüxĩnũẽgu rü guxũ ga Yerucharéucũãxãrü yexera nipecaduãxgü ga yema 18 ga yatügü ga yuexũ ga yexguma Chiruéwa yexmaxũ ga dauxũtaechica naetü rüngutaũgu?

5 —Pemaã nüxũ chixu rü tama nixĩ. Rü ngẽxguma chi pema rü tama nüxũ perüxoegu i pecüma i chixexũ, rü guxãma i pema rü tá ta ipeyarütauxe — ñanagürü ga Ngechuchu.

Ore ga nanetü ga iguera ga ngearü õõxũgu ixuxũ

6 Rü nüma ga Ngechuchu rü nüxũ nixu ga wüxi ga ore ga igueragu ixuxũ, rü ñanagürü: —Rü wüxi ga yatü nüxũ nayexma ga wüxi ga ubanecü. Rü yexma nanato ga wüxi ga iguera. Rü nüma ga guma yatü rü ínayadauuxũ ga yema iguera rü ngoxi naxõõ, natürü taxuxũma ga norü oxũ inayangau.

7 —Rü yemacèx yema norü duũxũ ga norü naãnena dauxũxũ ñanagürü:

“Dücèx, tomaẽxpüx ya taunecü guxũguma íchayadauxũ i ñaã iguera, rü taguma naxo. Rü ngẽmacèx chanaxwèxe na cuyadaxüchixũ na tama natücèxma nuã naãnewa naxíaneãxücèx”, ñanagürü nüxũ.

8 —Natürü ga yema norü duũxũ ga norü naãnena dauxũ, rü norü corixũ nangãxũ, rü ñanagürü:

“Pa Corix, ¡nüetama doma taunecüxicatama nangẽmèx! Rü tá chanaxaimüãnepüne rü waxmüãnexũmaã tá chanagüpüne.

9 —Rü bexmana ngẽxguma rü tá naxo. Natürü ngẽxguma táütama naxoxgu rü tá chayadaxüchi”, ñanagürü.

Ngechuchu rü ngüxchigaarü ngunexũgu ngĩxcèx nayataanexẽ ga wüxi ga ngecü ga pücèxwecü

10 Rü wüxi ga ngüxchigaarü ngunexũgu rü Ngechuchu nanguxẽẽtae ga wüxi ga ngutaquẽxepataũwa.

11 Rū yéma iyexma ga wūxi ga ngecū ga 18 ga taunecū idaawecū. Rū ipūcèxwe yerū wūxi ga ngoxo ngīxū napūcèxwexēē, rū taxuacūma iyarūwēxāchi.

12 Rū yexguma Ngechuchu ngīxū dèuxgu rū ngīxcèx naca, rū ñanagürü ngīxū: –Pa Ngecūx, ñuxma rū marū cuxcèx nitaane i curū daawewa –ñanagürü.

13 Rū yexguma rū ngīxū ningōgū, rū yexgumatama iyarūwēxāchiwemūxū, rū inaxūgū ga Tupanaxū na yacuèxūxū.

14 Natürü yema ngutaquēxepataūārū āēxgacū rū nanu, yerū Ngechuchu rū ngūxchigaarū ngunexūgu ngīxū narūmexēē ga yema nge. Rū yemacèx ga yema āēxgacū rū ñanagürü duūxūgūxū: –Nangēxma i 6 i ngunexū i nagu namexū na ipuracūexū. Rū ngēma ngunexūgūgu nixī i namexū na nuā pexīxū na pegū peyarūmexēēgūxūcèx rū tama i ngūxchigaarū ngunexūgu –ñanagürü.

15 Rū yexguma ga Cori ga Ngechuchu rū nanangāxū, rū ñanagürü: –Pa Duūxūgūx, pema rū togū i duūxūgūpēxewa meā pemaxēneta, natürü peāewa rū chixexūgu perūxīnūē. ¿Tama ēxna guxā i pema rū ngūxchigaarū ngunexūgu peyawēxū i perū woca rū ēxna perū buru na peyaxaxexēēgūxūcèx?

16 –Rū ñaā ngecū rū Abráūtanūxū iyixī, rū Chataná rū 18 ya taunecū ngīxū nachixexēē namaā i ñaā daawe. ¿Rū taux ēxna i namexū na ngīxcèx chayataanexēēxū i ngūxchigaarū ngunexūgu? –ñanagürü.

17 Rū yexguma yema ñaxgu ga Ngechuchu, rū

guxŭma ga norŭ uwanŭgŭ rŭ poraãcŭ naxãneẽ. Natŭrŭ guxŭma ga togŭ ga duŭxŭgŭ rŭ nataãẽgŭ ga yexguma nŭxŭ nadaugŭgu ga yema mexŭgŭ ga Ngechuchu ŭxŭ.

Ore i motacha- chiregu ixuxŭ
(Mt 13.31-32; Mr 4.30-32)

¹⁸ Rŭ ñanagŭrŭ ga Ngechuchu: —¿Ñuxãcŭ nixŭ i ãẽxgacŭ na yŭxŭ ya Tupana, rŭ nañuxraŭxŭ i nŭma ãẽxgacŭ íyŭxŭwa? ¿Rŭ tacŭgu tá chanangu?

¹⁹ —Maneca wŭxi ya motachachire ya wŭxi ya yatŭ naãnegu toxŭnerŭŭ nixŭ. Rŭ woo naxíraxŭchichirẽx ya naxchire natŭrŭ narŭxŭ, rŭ naya ñuxmata wŭxi i nanetŭ i taetaxŭ nixŭ. Rŭ ngẽmacèx i werigŭ rŭ natanŭgu nixŭachiãŭ —ñanagŭrŭ.

Ore i pãũãrŭ puxẽẽruŭgu ixuxŭ
(Mt 13.33)

²⁰ Rŭ ñanagŭrŭ ta ga Ngechuchu: —¿Ñuxãcŭ nixŭ i Tupana ãẽxgacŭ íxŭxŭwa? ¿Rŭ tacŭgu tá chanangu?

²¹ —Rŭ pãũãrŭ puxẽẽruŭrŭŭ nixŭ na guxŭwama nanguxŭ. Erŭ wŭxi i ngecŭ rŭ íraxŭ- tama i pãũãrŭ puxẽẽruŭmaã inaxŭéŭ i taxŭ i ngírŭ pãũchara. Rŭ ngẽma pãũãrŭ puxẽẽruŭ rŭ woo naxíra rŭ naya-puxẽẽ i guxŭma i ngírŭ pãũchara —ñanagŭrŭ ga Ngechuchu.

Îãx i íraxŭchiga
(Mt 7.13-14, 21-23)

²² Rŭ inixŭchigŭ ga Ngechuchu ga Yerucharéŭwa na naxŭxŭ. Rŭ yexguma namagu yaxŭxgu rŭ ñãnegŭwa rŭ ñãnexãcŭgŭwa

nixüpetüchigü, rü yéma nayangúexëëtanü ga duüxügü.

²³ Rû wüxi ga duüxü nüxna naca rü ñanagürü: —Pa Corix ¿noxretátama nixĩ i ngêma nayauxgüxü i maxü i taguma gúxü? —ñanagürü. Rû nüma ga Ngechuchu nanangãxü, rü ñanagürü:

²⁴ —Daxügüxü i naãneärü ãx rü naxíraxüchi. ¡Rü paxa naxcèx pedau na nawa pichocuxüçèx! Erü pemaã nüxü chixu rü muxüchixüma i duüxügü tá nüxü nangúchaü na nawa yachocuxü, natürü tãütáma nawa nichocu.

²⁵ —Erü ngëxguma ãrü yora marü nawãxtagu i ãx, rü pema i düxétüwa ngëxmagüxe rü tá penatutuãü. Rû ñaperügügü tá:

“Pa Corix, ¡paxa toxçèx yawãxna i ãx!” ñaperügügü tá. Natürü nüma i cori rü tá pexü nangãxü, rü ñanagürü tá:

“Tama pexü chacuèx na ngextácüãx pixüxü”, ñanagürü tá pexü.

²⁶ —Rü ngëxguma rü tá ñaperügügü nüxü:

“Cumaãchirëx wüxiwa tachibüe rü taxaxegü. Rû toxü cungúexëë ga torü ãneärü ítamügüwa”, ñaperügügü tá.

²⁷ —Natürü nüma rü tá pexü nangãxü rü ñanagürü tá: “Marü pemaã nüxü chixu rü tama pexü chacuèx na ngextácüãxgü pixüxü. ¡Rü ípixĩ i nuã chauxütawa i guxãma i pemax, Pa Chixri Maxëxü!” ñanagürü tá.

²⁸ —Rü ngema tá pexauxe, rü tá pixüxchapütagü i ngëxguma nüxü pedèuxgu i Abráü rü Ichaá rü Acobu rü guxüma i Tupanaärü orearü uruügü na Tupana ãëxgacü íixüüwa na nangëxmagüxü rü pema rü nüxna na ípewoxüxü.

29 –Erü guxŭwatáma ne naxĩ i duŭxŭgŭ. Rŭ Tupana ãĕx- gacŭ íxĩxŭwa tá nangĕxmagŭ. Rŭ ngĕma tá narŭtogŭ na ngĕma nachibŭexŭcĕx.

30 –Rŭ tá nangĕxma i nŭmaxŭ i ñoma i naãnewa duŭxŭgŭ nŭxŭ oexŭ, natŭrŭ daxŭguxŭ i naãnewa rŭ Tupana tá wixpĕxewa nanaxŭgŭxĕĕ. Rŭ tá nangĕxma i nŭmaxŭ i ñoma i naãnewa duŭxŭgŭ nŭxŭ icuĕxŭŭgŭxŭ, natŭrŭ daxŭguxŭ i naãnewa rŭ Tupana rŭ tá wixweama nanaxŭgŭxĕĕ –ñanagŭrŭ ga Ngechuchu.

Ngechuchu rŭ Yerucharéŭcŭãx ga duŭxŭgŭcĕx naxaxu

(Mt 23.37-39)

31 Rŭ yematama ga ngunexŭgu rŭ Ngechuchuxŭtawa nangugŭ ga ñuxre ga Parichéugŭ. Rŭ ñanagŭrŭgŭ Ngechuchuxŭ: –¡íxĩ i nuã! Erü ãĕxgacŭ ya Erode rŭ cuxŭ nimĕxéga –ñanagŭrŭgŭ.

32 Natŭrŭ nŭma ga Ngechuchu nanangãxŭ rŭ ñanagŭrŭ: –¡Naxŭtawa pexĩ i ngĕma yatŭ i nŭxŭ cuĕxŭchixŭ na ñuxãcŭ duŭxŭgŭxŭ nawomŭxĕĕxŭ, rŭ namaã nŭxŭ pixu rŭ ñuxma rŭ moxŭ rŭ tá íchana- woxŭ i ngoxogŭ, rŭ tá chanameĕxĕĕ i ngĕma duŭxŭgŭ i idaaweexŭ, rŭ pĕxmaãcŭ tá chanagŭxĕĕ!

33 –Natŭrŭ chanaxwĕxe i ichixŭchigŭ i ñuxma rŭ moxŭ rŭ paxmaãcŭ ñuxmatáta Yerucharéŭwa changu. Erü Yerucharéŭgu nixĩ i na nayuexŭ i guxŭma i Tupanaãrŭ orearŭ uruŭgŭ.

34 –Rŭ dŭcax, Pa Yerucharéŭcŭãx, pema peyadaietanŭ i Tupanaãrŭ orearŭ uruŭgŭ, rŭ nutamaã ípenamuxŭchigŭ i Tupanaãrŭ orearŭ

ngeruüğü i pexcèx núma namugüxü. Rū ñuxreëxpüxcüna wüxigu chaugüxütagu pexü chanutaquëxexëëchaü, ñoma wüxi i ota ya naxâcüâx nügütüügu tüxü nutaquëxexürüü. Natürü pema rü tama penaxwèxe.

³⁵ –Düçèx i ñuxma ya perü ñâne, rü Tupana tá ínanatèx. Rū pemaã nüxü chixu rü tãütáma wena choxü pedau ñuxmatáta daxüguxü i nañewa ne chaxü. Rū ngëxguma rü tá choxü pedau rü tá ñaperügüğü:

“Namexëchi nixĩ ya yima Cori ya Tupana núma namucü”, ñaperügüğü tá –ñanagürü ga Ngechuchu.

14

Ngechuchu rü naxcèx nayataanexëë ga wüxi ga yatü ga rüchaxünexü

¹ Rū wüxi ga ngüxchigaarü ngunexügu rü Ngechuchu rü wüxi ga Parichéupatawa nayachibü. Rū yéma nayexmagü ga togü ga Parichéugü ga yéma bexma Ngechuchuxü ngugüexü.

² Rū yéma nayexma ta ga wüxi ga yatü ga idaawexü ga rüchaxünexü.

³ Rū yexguma ga Ngechuchu rü yema ngüxëëruüğü ga Moïchéarü mugüwa ngüxëëtaegüxüna rü Parichéugüna naca, rü ñanagürü: –¿Tama penachuxuxü ega ngüxchigaarü ngunexügu chanamexëëxgu i wüxi i idaawexü? –ñanagürü.

⁴ Natürü ga nümagü rü nangeëxgümare. Rū yexguma ga Ngechuchu rü naxmëxgu

nayayauxãchi ga yema idaawexũ, rü nanamexẽẽ. Rũ namaã nüxũ nixu ga na íyaxũxũcèx.

⁵ Rũ Ngechuchu rü ñanagürü Parichéugüxũ: — ¿Texé i pema i ngëxguma perü buru rü ëxna perü woca puchugu nagoxgu, rü taux ëxna i ngëxgumatama ípeyadauxũ rü ípe- yatúãchixũ i woo ngüxchigaarü ngunexũgu? —ñanagürü.

⁶ Rũ nümagü rü taxuũmaãma nanangãxũgü.

Duĩxũgü ga ngĩgüarü petawa nüxna naxugüxũchiga

⁷ Rũ yexguma mechawa natogüchaũgu ga yema nüxna naxugüxũ, rü Ngechuchu nüxũ nadau na wüxichigü rü ñãrũ yoraxũtawaxüchi natoxchaũxũ. Rũ yexguma yemaxũ nadèuxgu rü nayaxucuxëgü, rü ñanagürü:

⁸ —Ngëxguma texé cuxna uxgu i wüxi i ngĩgüarü petawa, rü tama name i petaarü yoraxũtawaxüchi üxũ i naxmèxwëxewa cuyarüto. Erü yixcürã ngürüãchi tá ínangu i to i nüxna naxuxũ i curü yexeraxüchi ixĩxũ.

⁹ —Rü ngëma petaarü yora i pexna uxũ, rü tá cumaã nüxũ nayarüxu na icuchixũcèx i ngëma nachicawa na ngëma natoxẽẽãxũcèx i ngëma to i curü yexera ixĩxũ. Rũ ngëxguma i cuma rü porãcũ cuxãneãcũma rü nawa iyacuáxũ i naxmèxwëxewa tá cuyarüto.

¹⁰ —Rü narümemaẽ ega texé cuxna uxgu, rü nawa iyacuáxũ i naxmèxwëxewa curüto. Rũ ngëxguma i ngëma petaarü yora i cuxna uxũ rü ñanagürü tá cuxũ:

“Pa Chomücüx, ¡nuã chauxũtawa yarüto!” ñanagürü tá cuxũ. Rũ ngëmaãcũ ngëma petaarü

yora rü wüxi i mexü tá cumaã naxü napëxewa i guxüma i duüxügü i nüxna naxuxü i cumaã ngëma rütogüxü.

¹¹ —Erü texé ya tügü írütaxe rü Tupana tá tüxü naxânexëë. Natürü texé ya tügü írüxírxaxe rü Tupana tá tüxü nicuèxüü —ñanagürü ga Ngechuchu.

¹² Rü ñanagürü ta ga Ngechuchu nüxü ga yema yatü ga nüxna uxü: —Rü ngëxguma wüxi i ònacèx rü éxna petacèx texéna cuxuxchaügu, rü tama name i nüxna cuxu i cumücügü, rü bai i cueneëgü, rü bai i cutanüxügü, rü bai i curü ngaicamagu pegüxü i duüxügü i dïëruãxgüxü. Erü nümagü rü tá nüxí cuxna naxugüe, rü ngëmaäcü tá cuxü nanaxütanügü.

¹³ —Natürü ngëxguma wüxi i peta cuxüxgu, rü narümemaë nixí i nüxna cuxu i duüxügü i ngearü dïëruãxgüxü, rü duüxügü i taxucürüwama puracüexü, rü ngëma ichixeparagüxü, rü ngëma ingexetügüxü.

¹⁴ —Rü tá cutaãëxüchi i ngëxguma erü nümagü rü taxucürüwa cuxü nanaxütanügü. Natürü tá cunayaxu i curü natanü i ngëxguma wena namaxëgu i Tupanaärü duüxügü i mexü —ñanagürü.

*Ore i taxü i ònagu ixuxü
(Mt 22.1-10)*

¹⁵ Rü yexguma yemaxü naxñnügü ga wüxi ga yatü ga mechawa rüttoxü rü Ngechuchuxü ñanagürü: —Rü tataãë ya yíxema Tupana äëxgacü íixüxüwa chibüxe —ñanagürü.

¹⁶ Rü yexguma ga Ngechuchu rü ñanagürü nüxü: —Wüxi ga yatü nanaxü ga wüxi ga òna ga taxü.

Rü norü duũxũxũ namu na nüxna yaxuxũcèx ga muxũma ga duũxũgü.

17 –Rü yexguma marü namexgu ga norü õna, rü wena norü duũxũxũ namu na yema duũxũgü ga marü nüxna naxugũxũmaã nüxũ na yanaxuxũcèx ga marü na namemarexũ ga norü õna, rü paxa yéma na naxĩxũcèx.

18 –Natürü guxũma ga yema nüxna naxugũxũ, rü inanaxũgü ga nügü na ínaxuegũxũ. Rü yema nüxĩra nüxna naxu rü ñanagürü:

“Ngexwacaxtama naxcèx chataxe i wüxi i naãne. Rü paxa tá íchayadau. ¡Rü namaã nüxũ ixu i cori rü taxucürüwama ngema chaxũ!” ñanagürü.

19 –Rü ga yema to rü ñanagürü:

“10 i wocagü i puracürüũcèx chataxe, rü tá ngẽmaxũ chayaxü. ¡Rü namaxã nüxũ ixu i cori rü taxucürüwama ngema chaxũ!” ñanagürü.

20 –Rü ga to rü ñanagürü:

“Ngexwacaxtama chaxãmèx rü ngẽmacèx taxucürüwama ngema chaxũ”, ñanagürü.

21 –Rü yexguma nataegugu ga yema coriarü duũxũ, rü norü corimaã nüxũ nixu ga guxũma ga yema ore. Rü yexguma ga norü cori rü nanu, rü ñanagürü nüxũ ga norü duũxũ:

“¡Paxa ngema ïtamügü i taxũwa rü ïtamüacügüwa naxũ, rü nuã nagagü i ngẽma duũxũgü i ngearü dñeruãxgũxũ, rü ngẽma duũxũgü i taxucürüwama puracüexũ, rü ngẽma ichixeparagũxũ, rü ngẽma ingexetügũxũ!” ñanagürü.

22 –Rü yixcamaxũra ga yema norü cori namaã nüxũ ixuxũ naxũxguwena rü yema norü duũxũ ñanagürü nüxũ:

“Pa Corix, marü chanaxü i ngẽma chomaã nüxü quixuxürüü, natürü naxãchicaaneãmatama i nuã cupatawa”, ñanagürü.

²³ –Rü yexguma ga norü cori rü ñanagürü nüxü:

“¡Paxa ngema nama i taxüğüwa rü nama i íraxüğüwa naxü, rü nuã nagagü i togü i duüxüğü na nuxã chopatagu nachocuxüçèx, rü ngẽmaãcü na naxããcuxüçèx ya daa chopata!

²⁴ Erü pemaã nüxü chixu rü taxuüma ga yema nüxïra nüxna chaxuxü rü nuã chorü õnawa tá nachibüe”, ñanagürü.

*Tama natauxcha na Cristuwe rüxüxü
(Mt 10.37-38)*

²⁵ Rü muxüchixüma ga duüxüğü Ngechuchuwe narüxï. Rü nadauegu ga Ngechuchu, rü ñanagürü nüxü:

²⁶ –Rü ngẽxguma texé chowe rüxüxchaügu, rü tanaxwèxe i choxü tangechaü tümanatüarü yexera, rü tümaëärü yexera, rü tümamèxärü yexera, rü tümaxãcüğüarü yexera, rü tümaëneëğüarü yexera, rü tümaëyèxğüarü yexera, rü tümaärü maxüärü yexera rü ta. Rü ngẽxguma tama ngẽmaãcü choxü tangechaügu rü taxucürüwama aixcüma chorü ngüexü tixï.

²⁷ –Rü yíxema tama naxwèxexë na chaugagu ngüxü tingeãcüma chowe tarüxüxü, rü taxucürüwama chorü ngüexü tixï.

²⁸ –Rü ngẽxguma chi wüxie i petanüwa rü wüxi ya ípata ya taxüne taxüxchaügu, ¿rü tama ëxna i noxri i tanangugüxiraxü na ñuxre i dïëru tá nagu ngïxü ítatáxü? Rü ngẽmawa nüxü tacuèx rü marü tüxü iyangu i ngẽma tümaärü dïëru i tüxü ngëxmacü na tayanguxëëxüçèx ya yima ï.

29 —Erü ngëxguma chi tama meã tanangugügu i tumaãrũ dĩeru na ñuxregu tá naxãtanũxũ ya yima ã, rü norü caxtaxica chi itapugügu rü yixcũra rü taxucürüwa chi tanaguxẽẽgu i ngẽma puracü, rü guxũma i duũxũgü i nüxũ daugũxũ i ngẽma tumaãrũ puracü rü tá tüxũ nacugüe.

30 —Rü ñanagürügü tá:

“Ngẽma yatü inanaxügü na naxüpataxũ, natürü taxucürüwama nayanguxẽẽ”, ñanagürügü tá.

31 —Rü ngëxguma wüxi i nachiuãneãrũ ãẽxgacü rü to i nachiuãneãrũ ãẽxgacümaã nügü nadaixchaũgu, ¿rü tama êxna i noxri inangugüãxũ rü ngoxi 10,000 i churaragü rü yangu na nügü nadaixcèx namaã i norü uwanü i 20,000 i churaragü nüxũ ngëxmaxũ?

32 —Rü ngëxguma nangugüãgu na tama yanguxũ i norü churaragü rü, ¿taux êxna i ngëxguma yaxũwa nangëxmagutama i norü uwanü, rü naxũtawa namugüãxũ i norü orearü ngeruũgü, rü namaã nüxũ na yanaxugüexcèx na nügümaã nangüxmüẽxũ?

33 —Rü ngëxgumarüũ tá ta nixĩ i pemax, erü ngëxguma ngexerüxúxe i petanüwa tama ngema tanawogügu i guxũma i tüxũ ngëxmaxũ na chowe tarüxũxcèx, rü taxucürüwama aixcũma chorü ngüexũ tixĩ.

Ngëxguma nangeacagu ya yücũra rü taxuwama name

(Mt 5.13; Mr 9.50)

34 —Pema rü ñoma yücürarüũ pixĩgü i ñoma i naãnewa, erü yima yücũra rü õna na namexẽẽxürüũ rü pema rü ñoma i naãnecũãx i duũxũgütanüwa rü norü mexẽẽruũ pixĩgü. Name

ya yucüra. Natürü ngëxguma chi nangeacagu, ¿rü ñuxãcü tá wenaxãrü naxããca?

³⁵ –Rü taxuwama name. Rü woo waixümüãrü waxmüãnexëëruüçèx rü tama name. Rü Ítanatèxmare. Rü yíxema aixcüma ächixexë, ¡rü name nixĩ i nagu tarüxĩnüë i ñãã ore! –ñanagürü.

15

Ore i carneru i iyarütaxuxügu ixuxü (Mt 18.10-14)

¹ Rü guxüma ga yema yatügü ga Dumaãrü äëxgacücèx dïëru ngïxü ideetanüxü, rü togü ga duüxügü ga chixexü ga nacümagu ïxü, rü Ngechuchucèx naxĩ na iyanaxĩnüëxüçèx ga norü ore.

² Rü yemacèx ga Parichéugü rü ngúexëëruüügü ga Moïchëarü mugüwa nguxëëtaegüxü, rü Ngechuchuxü nixugüe, rü ñanagürügü: –Ñãã yatü rü norü me nixĩ i pecaduãxgüxümaã na naxãmücüxü, rü namaã na nachibüxü – ñanagürügü.

³ Rü yexguma ga Ngechuchu rü ñãã ore ga cuèxruüxü namaã nixu, rü ñanagürü:

⁴ –¿Texé i petanüwa rü ngëxguma tüxü nangëxmagu i 100 i tümaãrü carnerugü rü wüxi tüxü iyarütauxgu, rü taux ëxna i nachitaüwa tanawogüxü i ngëma 99, rü naxcèx tayadauxü i ngëma tüxü iyarütaxuxü ñuxmata nüxü itayangau?

⁵ –Rü ngëxguma nüxü itayangëuxgu rü taãëãcüma tügüätügu tayagaxü.

⁶ –Rü ngëxguma tümapatawa tanguxgu, rü tanangutaquëxexëë i tümamücügü, rü duüxügü i tümaãrü ngaicamagu pegüxü, rü ñatagüxü nüxü:

“¡Wüxigu chomaã petaãëgü, Pa Chomücügü! Erü marü nüxü ichayangau i ngëma chorü carneru ga iyarütaxuxü”, ñatagüxü nüxü.

⁷ –Rü pemaã nüxü chixu rü ngëxgumarüü ta nataãëgü i daxüçüãx i ngëxguma nangëxmagu i 99 i duüxügü i mexügü i marü Tupanaärü ixīgüxü, natürü yexeraäcü nataãëgü i ngëxguma wüxi i duüxü i pecaduãxü nüxü rüxoxgu i nacüma i chixexü rü Tupanaãxü yaxõõgu –ñanagürü.

Ore ga dïëru ga iyarütauxcügu ixuxü

⁸ Rü Ngechuchu rü wüxi ga to ga ore ga cuëxruüxü nixu, rü ñanagürü: –Ngëxguma chi wüxi i ngecüaxü nangëxmagu i 10 tachinü i dïëru, rü wüxi ngïxü iyarütauxgu, ¿rü taux éxna i omüwa nangixichiãxü rü nabixichiãxü ya ngïpata, rü meãma ngïxcëx nadauxü ñuxmata ngïxü iyangau?

⁹ –Rü ngëxguma ngïxü iyangauxgu, rü inangutaquëxexëë i ngïmücügü i ngexügü rü ngïtanüxügü i ngïrü ngaicamagu pegüxü, rü ngïxü nüxü:

“¡Wüxigu chomaã petaãëgü, Pa Chomücügü! Erü marü ngïxü ichayangau i ngëma chorü dïëru ga iyarütauxchirëxcü”, ngïxü.

¹⁰ –Rü pemaã nüxü chixu rü ngëxgumarüü ta nataãëgü i daxüçüãx i Tupanaärü orearü ngeruügü i ngëxguma wüxi i duüxü i pecaduãxü nüxü rüxoxgu i nacüma i chixexü rü Tupanaãxü yaxõõgu –ñanagürü ga Ngechuchu.

Ore ga wüxi ga ngextüxücü ga nanatüna ixücügu ixuxü

¹¹ Rü ñanagürü ta ga Ngechuchu: –Nayexma ga wüxi ga yatü ga taxre ga nane nüxü yexmacü.

12 –Rü guma rübumaëcü, rü nanatüxũ ñanagürü:
 “Pa Pa, ¡choxna naxã i ngẽma curü ngẽmaxügü i
 choxna üxũ!” ñanagürü. Rü yexguma ga nanatü
 rü yema taxre ga nanemaã nayatoye ga norü
 yemaxügü.

13 –Rü ñuxre ga ngunexüguwena rü guma nane
 ga rübumaëcü rü nananutaquẽxe ga guxüma ga
 norü yemaxügü rü namaã nataxe. Rü yema
 dñerumaã rü to ga nachiuãnewa naxü. Rü chixri
 yéma namaxü, rü yemaãcü ngixü naguxëẽ ga
 guxcüma ga norü dñeru.

14 –Natürü yexguma marü ngixü
 naguxëẽguwena ga guxcüma ga norü dñeru, rü
 poraãcü nataxu ga õna ga yema nachiuãnewa. Rü
 yemacèx ga guma ngextüxcü rü inanaxügü ga
 taiya nüxü na ngüxü.

15 –Rü yexguma rü norü puracücèx nadau
 naxütagu ga wüxi ga yatü ga yema nachiuãnecüãx.
 Rü nüma ga yema yatü rü norü naãnewa nanamu
 na yéma norü cuchigüna yadauxcèx.

16 –Rü düxwa nüxü nachixéga ga yema
 cuhiwemü, yerü poraãcü nataiyaxüchi. Natürü
 taxúema õna nüxna taxã.

17 –Rü yexguma naãëwa nagu narüxñü, rü
 ñanagürü:

“¿Ñuxre i chaunatüarü puracütanüxü rü nüxü
 nangëxma i õna rü nüxü ínayaxü? Rü choma i nuã
 rü taiyamaã tá nuxma chayü.

18 –Rü chaunatücèx tá chataegu, rü ñachagürü
 tá tüxü: ‘Pa Papax, marü chixexü Tupanapewa
 chaxü rü cupewa rü ta.

19 –Rü tama marü chame na Chaune, ñacuxü
 choxü. ¡Rü wüxi i curü puracütanüxüxü choxü

ixĩxẽẽ! ñacharügü tá tüxü ya chaunatü”, ñanagürü.

20 —Rü inaxüächi rü nanatüpatacèx nataegu. Rü yexguma yangaicagu ga nanatüpata, rü yaxügu nüxü tadau ga nanatü, rü tüxü nangechaütümüü. Rü naxcèx tiña, rü nüxna tanèixächi, rü nüxü tachüxu.

21 —Rü yexguma ga nüma ga tümane rü ñanagürü tüxü:

“Pa Papax, marü chixexü Tupanapewa chaxü, rü cupewa rü ta. Rü ngemacèx marü tama name na ‘Chaune’ ñacuxü choxü”, ñanagürü.

22 —Natürü tüma ga nanatü rü tümaärü duüxügüxü ñatarügü:

“¡Paxa nuã penange i naxchiru i mexèchixü rü peyacüxcuchix! ¡Rü wüxi i anera ta naxmèxwa ngixü pingèxcuchix! ¡Rü chapatu rü ta nuãta penge, rü peyacuaixcuchix!

23 —¡Rü peyayaxux i ngëma wocaxacü i rüngümaexü, rü peyamá, rü ngixã namaã tachibüe rü tapetae!

24 —Erü daa chaune rü chauxcèx rü marü nayu, natürü maxücü chauxcèx ínangu. Rü marü inayarütauxchirèx, rü wenaxärü nangox”, ñanagürü. Rü yexguma inanaxügüe ga na napetaegüxü.

25 —Rü yoxni ga guma nane ga rüyamaëcü, rü naãnewa nayexma. Rü yexguma nataegugu rü marü ñärü ngaicamana nangugu, rü nüxü naxĩnü ga na ínapaxetagüxü rü íyaxüächitanüxüxü.

26 —Rü wüxi ga nanatüarü duüxücèx naca, rü nüxna naca ga tacü na ínaxüexü ga íwa.

27 —Rü yema nanatüarü duüxü rü nanangãxü, rü ñanagürü: “Cueneë rü marü ínangu. Rü ngëmacèx cunatü toxü tamu na tayamáxücèx i

ngẽma wocaxacü i rüngümaexũ, erü cueneẽ rü mecü ínangu rü tama niðaawe”, ñanagürü nüxũ.

²⁸ —Natürü ga guma naẽneẽ ga rüyamaẽcü rü nanu, rü tama ígu naxücuchaũ. Rü yemacèx düxwa ga nanatü rü naxcèx ítaxũxũ, rü nüxũ tayacèèxũ na yaxücuxũcèx.

²⁹ —Rü nüma rü ñanagürü tüxũ ga nanatü:

“Cuma nüxũ cucuèx i ñuxre ya taunecü cuxũ chapuracü, rü taguma chixri cuga chaxĩnü. Rü bai i ñuxgu wüxicana wüxi i chibuxacü choxna cumu na chomücügümaã chapetaexũcèx.

³⁰ —Natürü ñuxma na ínanguxũ i ngẽma cune i chixri curü dïeru ngĩxũ guxẽèxũ nagu i ngexũgü i ngẽãèxũ, rü naxcèx cuyamèx i ngẽma wocaxacü i rüngümaexũ”, ñanagürü.

³¹ —Rü yexguma ga nanatü rü ñatarügü nüxũ:

“Pa Chaunex, cuma rü guxũguma chauxütawa cungẽxma, rü guxũma i chorü ngẽmaxũgü rü cuxrü nixĩ.

³² —Natürü ñuxma rü name nixĩ na ipetaegüxũ rü na itaãègüxũ erü cueneẽ ga guma chauxcèx rü marü yucü, rü maxũcü taxcèx ínangu. Rü woo tüxna inayarütaxu, rü wenaxãrü taxcèx nangox”, ñatarügü.

16

Ore ga yatü ga chixri norü coriarü yemaxũna dauxũgu ixuxũ

¹ Rü ñanagürü ta ga Ngechuchu norü ngúexũgüxũ: —Nayexma ga wüxi ga cori ga muãrü yemaxũãxũchixũ. Rü nüxũ nayexma ga wüxi ga norü duũxũ ga norü yemaxũãrü dauruũ. Natürü

togü ga duïxügü rü norü corimaã nüxü nixugü na yema norü duïxü rü chixri norü yemaxüna na nadauxü.

² –Rü yexguma ga yema cori rü yema norü duïxüçèx naca, rü ñanagürü nüxü:

“Dücèx, cuchigaxü chomaã nixugügü i duïxügü. ¿Rü tacü nixi i ngëma? ¡Rü chomaã nüxü ixu rü ñuxãcü nixi i curü puracü, erü marü täütáma chorü ngëmaxüärü dauruïxü cuxü chixixëë!” ñanagürü nüxü.

³ –Rü yexguma ga yema coriarü duïxü rü nagu narüxïnü, rü nügüãëwa ñanagürü:

“¿Tacü tá chaxü i ñuxmax, erü chorü cori rü marü choxü ínatèxüchi i ngëma chorü puracüwa? Tama chapora na nañewa chapuracüxüçèx, rü chaxãne na dïerucèx na íchaçaxü nüxna i togü.

⁴ –Rü marü nüxü chacuèx na tacü tá na chaxüxü na choxü nangëxmaxüçèx na texé tümapatawa choxü yaxuxü i ngëxguma changearü puracüãxgu”, ñanagürü.

⁵ –Rü yexguma nügüxütawa naxcèx naca ga wüxichigü ga yema duïxügü ga norü coriaxü yangetanügüxü. Rü yema nüxïra yéma naxütawa nguxüna naca, rü ñanagürü:

“¿Ñuxre i nüxü cungetanüxü i chorü cori?” ñanagürü.

⁶ –Rü nüma nanangãxü, rü ñanagürü:

“Nüxü chanangetanü i 100 i data i chixü”, ñanagürü. Rü yema coriarü duïxü rü ñanagürü nüxü:

“Ñãã nixi i popera i curü ngetanü nawa ngóxü. ¡Rü paxa íruto rü to i popera naxü, rü 50 i dataguxicatama naxü i curü ngetanü!” ñanagürü.

7 –Rü yemawena rü yema to ga duïxü ga norü coriaxü nangetanüxüna naca, rü ñanagürü:

“¿Cuma rü ñuxre yïxü i nüxü cungetanüxü i chorü cori?” ñanagürü. Rü nüma rü nanangãxü, rü ñanagürü:

“Nüxü chanangetanü i 100 i choca i trigu”, ñanagürü. Rü yema coriarü duïxü rü ñanagürü nüxü:

“Ñãã nixi i popera i curü ngetanü nawa ngóxü. ;Rü paxa íruto rü to i popera naxü rü 80 i chocagux-icatama naxü i curü ngetanü!” ñanagürü.

8 –Rü norü cori rü nüxü nicuèxüüãma ga yema norü duïxü ga chixexü, yerü nüxü nadau ga ñuxãcü na naxããxüchixü. Rü pemaã nüxü chixu rü ñoma i naãnecüãx i duïxügü, rü ngëma Tupanaãxü yaxögüxü i duïxügüarü yexera paxa naxcèx nadaugü na ñux-ãcü nüxü natúxü i duïxügü.

9 –Rü pemaã nüxü chixu rü ngëma ñoma i naãne i chixexüwa pexü ngëxmaxü rü name nixi i ngëmamaã nüxü penangúchaüxëë i duïxügü na Tupanaxütawa nangugüxü. Rü ngëmaãcü i ngëxguma naguxgu i ngëma ñoma i naãnewa pexü ngëxmaxü rü peyuxgu, rü tá pexü nangëxma ya Penatü ya pexü yaxucü i daxügüxü i naãnewa.

10 –Yíxema meã namaã icuáxe ega woo noxretama tümamëxëwa ngëxmagu, rü ngëxguma muxüma tümamëxëwa ngëxmagu rü tá ta meã namaã itacuèx. Natürü yíxema chixri namaã icuáxe ega noxretama tümamëxëwa ngëxmagu, rü ngëxguma muxüma tümamëxëwa ngëxmagu rü ngëxgumarüü tá ta chixri namaã itacuèx.

11 –Rü ngëxguma tama meã namaã ipecuèxgu i ngëma pexmëxwa ngëxmaxü i ñoma i naãne i chixexüwa, ¿rü texé tá pexmëxgu tanaxü i ngëma aixcüma mexü i Tupanaärü ixixü?

12 –Rü ngëxguma tama meã namaã ipecuèxgu i ngëma Tupana pexna äxü i ñoma i naãnewa, ¿rü ñuxäcü tá pexna nanaxã i pechica i daxüguxü i naãnewa?

13 –Taxucürüwama i wüxi i duüxü rü nataxrearü coriãx. Erü wüxi i norü corichi rü tá naxai, rü ngëma to rü tá nüxü nangechaü. Rü ëxna wüxicèx rü tá meã napuracü rü ngëma to rü tá nüxü naxo. Rü pema rü taxucürüwama Tupanacèx pemaxë ega perü dïeruguxicatama perüxïnüëgu –ñanagürü ga Ngechuchu.

14 Natürü ga yema Parichéugü rü poraäcü norü dïeruguama narüxïnüë. Rü yemacèx Ngechuchuxü nacugüe ga yexguma nüxü naxïnüëgu ga guxüma ga yema ore.

15 Rü yexguma ga Ngechuchu rü ñanagürü nüxü: –Pema nixi i duüxügüpëxewa meã pemaxënetaxü, natürü Tupana pexü nacuèx na tacügu perüxïnüëxü. Rü woo duüxügü pexü nicuëxüügü naxcèx i ngëma pexüxü, natürü Tupana rü naãëwa nangux i ngëma –ñanagürü ga Ngechuchu.

Tupanaärü mugü ga Moïché ümatüxü rü ñuxäcü äëxgacü na yixü ya Tupanachiga

16 Rü yexguma ga Ngechuchu rü ñanagürü: – Noxri nayexma ga Tupanaärü mugü ga Moïché duüxügüxü nguxëëxü, rü yema nguxëëtae ga nuxcümaügüxü ga Tupanaärü orearü uruügü duüxügüxü namaã nguxëëxü. Natürü yexguma

Cuáũ ga baiũxẽẽruũ ínguxguwena, rü marü duũxũgũmaã nüxũ chixuchiga i Tupanaãrũ ore i mexũ i ñuxãcü ãẽxgacü na yĩixũ. Rũ ñuxma rü guxũma i ngẽma duũxũgũ rü poraãcü nügũ naporaexẽẽ na yachocuxũcèx i ngẽma Tupana ãẽxgacü íixĩũwa.

¹⁷ —Naxũpa na yanguxũ i Tupanaãrũ mugü rü woo wüxi i mu i íramarexũ yixĩgu, rü naguxchaxũchi na iyanaxoxũ i ngẽma nüxũ yaxuxũ. Natürü aixcũma narũtauxchamaẽ nixĩ na iyanaxoxũ i ñoma i naãne rü guxũma i ngẽma daxũwa nüxũ idauxũ.

Ngechuchu namaã nangúexẽẽtae na tama namexũ na texé tũmamaxũ ítáxũ
(Mt 19.1-12; Mr 10.1-12)

¹⁸ —Ngẽxguma wüxi ya yatü ítámèxgu rü naĩ i ngemaã naxãmèxgu rü Tupanapẽxewa rü pecadu naxü. Rũ texé ya yixema ngĩmaã ãmaxẽ i wüxi i nge i ngĩte ngĩxũ ítèxcü, rü Tupanapẽxewa rü tũma rü ta pecadu taxü.

Yatü i dũeruãxũchixũchiga rü Dácharuchiga

¹⁹ —Nayexma ga wüxi ga yatü ga dũeruãxũchixũ ga guxũguma mexẽchixũ ga naxchirugu icúxũ. Rũ guxũ ga ngunexũgu rü taxũma ga õna naxü rü napetaexũ.

²⁰ —Rũ nayexma ta ga wüxi ga yatü ga ngearü dũeruãcü ga Dácharugu ãegacü. Rũ guxũguma yema dũeruãxũchixũpataèxwa nayarũtooxũ.

²¹ —Rũ guma Dácharu rü nanangõxchaũ ga yema õnatũchi ga yema yatü ga dũeruãxũchixũãrũ mechawa rüyiiixũ. Rũ naxcèx naxĩ ga airugü, rü nanawearü oxriãxgü.

22 –Rü wüxi ga ngunexũ nayu ga guma ngearü dïeruãcü, rü daxũcüãx ga Tupanaãrü orearü ngeruũgü rü daxũguxũ ga naãnewa nanagagü na wüxiwa Abráũmaã nayexmaxüçex. Rü nayu ta ga yema yatü ga dïeruãxüchixũ, rü inayatèxgü ga duũxügü.

23 –Rü ngẽma nachica i Tupana ngoxogüxũ nagu poxcuxüwa naxü ga yema yatü ga dïeruãxüchixũ rü yema poraãcü ngúxü ninge. Rü daxü nadau, rü yaxügu Abráũxü nadau na Dácharumaã wüxiwa nayexmaxü ga daxüguxũ ga naãnewa.

24 –Rü yexguma ga yema yatü ga dïeruãxüchichiréxü rü aita naxü rü ñanagürü:

“Pa Oxi Pa Abráũx, ¡cuxũ changechaũtümüü, rü nuã namu ya Dácharu na dexámaã nügü yawaixpêxemêxêãcüma choxü yanawaixpêxearü conüãxüçex! Erü poraãcü choxü nangüx i nuã üxüwa”, ñanagürü.

25 –Natürü Abráũ rü ñanagürü nüxü:

“Pa Chaunex, ¡nüxna nacuèxãchi na taxuũma cuxũ taxuxü ga yexguma cumaũxgu! Natürü Dácharu rü poraãcü chixexü nüxü naxüpetü. Rü ngẽmacèx i ñüxma rü nuã mexüwa nangêxma, rü cuma rü ngema poxcuchicawa ngúxü quinge.

26 –Rü ñüxüchi nangêxma i wüxi i taxüchixü i ngatexü i tórü ngãxüwa üxü. Rü ngẽmacèx ega númacüãx ngẽma ìxchaũgu, rü taxucürüwama ngẽma naxĩ. Rü woo ngẽmacüãx núma ìxchaũgu rü taxucürüwama núma naxĩ”, ñanagürü.

27 –Rü yexguma ga yema yatü ga dïeruãxüchichiréxü rü ñanagürü:

“Cuxü chacèxü, Pa Oxi, Pa Abráũx, na chau-natüpatawa cunamuxüçex ya Dácharu.

28 –Erü ngema nangẽxmagü ya wüximẽẽxpüx ya chaueneëgü. Rü chanaxwèxe na namaã nüxü na yanaxuxçèx na tama nuã ñaã poxcuchica i poraãcü choxü ínangúxüwa naxĩxüçèx”, ñanagürü.

29 –Natürü ga Abráü rü ñanagürü nüxü:

“Cueneëgü nüxü nangẽxma i Tupanaärü mugü ga Moïché úmatüxü rü yema ore ga nuxcümaügüxü ga Tupanaärü orearü uruüğü úmatüxü. Rü name nixĩ i ngẽma orega na naxĩnüëxü”, ñanagürü.

30 –Rü yexguma ga yema yatü ga dñeruãxüchichiréxü rü Abráüxü nangãxü, rü ñanagürü:

“Ngẽmáãcü, Pa Oxi, Pa Abráüx, natürü ngẽxguma chi wüxi i duüxü i yuchiréxü ngema üxgu rü namaã nüxü yanaxuxgu, rü chi nüxü narüxoe i nacüma i chixexü”, ñanagürü.

31 –Natürü Abráü, rü ñanagürü nüxü:

“Ngẽxguma tama naga naxĩnüëgu ga yema ore ga Moïché úmatüxü rü yema ore ga nuxcümaügüxü ga Tupanaärü orearü uruüğü úmatüxü, rü woo chi wüxi i marü yuwa írudaxü i duüxü ngema üxgu, rü namaã nüxü yanaxuxgu i ore, rü tãü chima nüxü nayaxõgü”, ñanagürü.

17

Naxãücüma nixĩ na pecadugu inguxü (Mt 18.6-7, 21-22; Mr 9.42)

1 Rü Ngechuchu rü norü ngüexügüxü ñanagürü:
–Rü guxügutáma nangẽxma i tacü i duüxügüxü pecaduãxëëxü. Natürü wüxi i ngechaü tá tümacèx nixĩ ya yíxema duüxë ya togüxü pecadugu nguxëëxë.

2-3 –Rü tümacèx rü narümemaẽ nixĩ na tümanaxãwa yangacuchixũ ya wüxi ya nuta ya tacü rü ngẽmaãcü taxtüwa tüxũ na itáexũ naxũpa na pecadugu tananguxẽẽxũ i wüxi i chorü duũxũ. ¡Rü ngẽmacèx name nixĩ i pexuãëgü i pemax! Rü ngëxguma wüxi i cueneë chixexũ cumaã üxgu rü ¡meã naxuxcuxẽ! Rü ngëxguma nüxũ naxoxgu i nacüma i chixexũ rü ¡nüxũ nüxũ nangechaũ i ngẽma!

4 –Rü woo 7 ëxpüxcüna chixexũ cumaã naxüxgu i wüxi i ngunexügu, rü 7 ëxpüxcüna cuxna yacaxgu na nüxũ nüxũ cungechaũxücèx, rü name nixĩ i nüxũ nüxũ cungechaũ –ñanagürü ga Ngechuchu.

Ñuxãcü tapora ega yaxõxgu

5 Rü norü ngúexügu ga norü orearü uwa namugüxũ rü ñanagürügü: –Pa Corix, ¡toxũ rüngüxẽẽ na yexeraãcü tayaxõgüxücèx! –ñanagürügü.

6 Rü yexguma ga Cori ga Ngechuchu rü ñanagürü nüxũ ga norü ngúexügu: –Rü ngëxguma chi woo naxíraxüchigu i perü õ, rü daa naĩ rü chi pega naxĩnü ega ñapegügu:

“¡Cugü nabëx i nuã rü taxtüchiügu cugü yato!” ñapegügu, rü chi pega naxĩnü.

Wüxi i ngüxëẽruũãrü puracüchiga

7 –Ngëxguma chi wüxie i petanüwa rü tüxũ nangëxmagu i wüxi i tümaãrü duũxũ i tümaãnewa ne üxũ i puracüwa rü ëxna carneruarü dauwa, rü tama nügücèxira naxüwemü.

8 –Natürü norü corixüxĩra naxüwemü na nachibüxücèx rü naxaxexücèx, rü nüma rü yixcama nachibü.

9 –Rü norü cori rü tama moxẽ nüxna naxã na naxüwemüãxücèx, erü woetama ngẽma nixĩ i norü puracü i ngẽma norü duũxũ.

10 –Rü ngẽxgumarüũ tá pixĩgü i pemax. Erü ngẽxguma ngẽma Tupana pexũ üxẽẽxũĩcatama pexũxgu, rü penaxwèxe i pegü ñaperügügü:

“Puracütanüxũ i taxuwama mexũ tixĩgü, erü ngẽma nawa tüxũ namuxũĩcatama nixĩ i tin-guxẽẽxũ”, ñaperügügü –ñanagürü ga Ngechuchu.

Ngechuchu nanameẽxẽẽ ga 10 ga yatügü ga chaxüneãxgüxũ

11 Rü yexguma namagu yaxũxgu ga Ngechuchu ga Yerucharẽtwa na naxũxũ, rü Chamáriaane rü Gariréaane nügümaã íxüyexũwa naxüpetü.

12 Rü yexguma wüxi ga ñanexãcüwa nanguxgu, rü yexma napẽxegu nayayi ga 10 ga yatügü ga chaxünemaã idaaweexũ. Rü yaxügu nüxũ nachigü.

13 Rü tagaãcü ñanagürügü nüxũ: – Pa Ngechuchux, Pa Ngúexẽẽruũx, ¡cuxũ tangechaũtümüügü! –ñanagürügü.

14 Rü yexguma Ngechuchu nüxũ dèuxgu, rü ñanagürü nüxũ: –¡Yéa paigüxõtawa pexĩ, rü nüxũ pegü peyawẽxgü! –ñanagürü. Rü yexguma namagu naxĩyane, rü naxcèx nitaanetanü ga yema yatügü.

15 Natürü natanüwa rü nayexma ga wüxi ga Ngechuchucèx taeguxũ ga yexguma marü nügü nadèuxgu ga naxcèx na yataanexũ. Rü tagaãcü Tupanaxũ nicuèxüũchigü.

16 Rũ Ngechuchupẽxegu nanangũcuchi rũ moxẽ nũxna naxã. Rũ yema yatũ rũ Chamáriaanecũãx nixĩ.

17 Rũ yexguma ga Ngechuchu rũ ñanagürũ: — ¿Taux êxna i 10 chirẽx pixĩgũxũ na pexcẽx chay-ataanexẽẽgũxũ? ¿Ngẽxũgũ nixĩ i ngẽma togũ i 9 i yatũgũ?

18 —¿Rũ ñaã to i nachiũãnecũãx i duũxũxĩcatama nixĩ itaeguxũ na Tupanaxũ yacuẽxũxũcẽx? — ñanagürũ.

19 Rũ yexguma rũ guma yatũxũ ñanagürũ: — ¡Inachi rũ íxũ! Cuxcẽx nitaane, erũ cuyaxõ — ñanagürũ.

Ñuxãcü tá nixĩ i ngẽxguma ínanguxgu ya Tupana na ãẽxgacũ yĩxũ

(Mt 24.23-28, 36-41)

20 Rũ Parichéugũ rũ Ngechuchuna nacagũ, rũ ñanagürũgũ: —¿Ñuxgu tá nixĩ na yangucuchixũ ya Tupana na ãẽxgacũ yĩxũcẽx i núma? —ñanagürũgũ. Rũ Ngechuchu nanangãxũ, rũ ñanagürũ: —Norũ nguchiga ya Tupana rũ tama wũxi i tacũ i nũxũ idauxürũ nixĩ.

21 —Rũ taxuacũma ñaperũgũgũ:

“Daa nixĩ”, rũ êxna “Gua nixĩ”, ñaperũgũgũ. Erũ marũ petanũwa nangu ya Tupana na ãẽxgacũ yĩxũcẽx —ñanagürũ.

22 Rũ yexguma norũ ngũexũgũxũ ñanagürũ: —Rũ tá pexcẽx ínangu i ngunexũ i nagu poraãcü tá choxũ pedaugũchaũxũ woo wũxi i paxaãchicẽxtama yixĩgu. Natürũ tãütama choxũ pedaugũ i ngẽxguma.

23 —Rũ duũxũgũ rũ tá ñanagürũgũ pexũ:

“Daa nixĩ ya Cristu”, rü ěxna, “Gua nixĩ ya Cristu”, ñanagürügü tá. Natürü pemax jrü täütáma nüxũ peyaxögü, rü täütáma nawe perüxĩ!

24 —Rü ngëxguma íchanguxgu i choma i Tupana Nane na duũxũxũ chiĩxũ, rü wüxi i ãemacü i guxũãneguma baxixürüũ tá chixĩ.

25 —Natürü noxri rü tá poraãcü ngúxũ chinge, rü ñoma i naãnecũãx i duũxũgü i ñuxma maxëxũ rü tá choxũ naxoe.

26 —Rü yexgumarüũ ga duũxũgü na chixri maxëxũ ga yexguma Noë maũxgu, rü ngëxgumarüũ tá ta chixri namaxë i duũxũgü i ngëxguma íchanguxgu i choma i Tupana Nane na duũxũxũ chiĩxũ.

27 —Rü ga duũxũgü ga yexguma rü nachibüe, rü naxaxegü, rü nixãmëxgü, rü nixütexacügü ñuxmata nawa nangu ga yema ngunexũ ga Noë naweũgu nagu ixüexũ. Rü ínangu ga mucü ga taxüchicü, rü guxũma ga yema duũxũgü rü nayue.

28 —Rü yexgumarüũ ta nangupetü ga yexguma nuxcümaũcü ga Lox maũxgu. Rü duũxũgü rü nachibüe, rü naxaxegü, rü norü yemaxüçèx nataxegü, rü namaã nataxegü, rü nixüanegü rü nitoegü, rü nixüpatagü.

29 —Natürü yexguma Lox ixũxgu nawa ga guma ñãne ga Chodoma, rü daxüwa narüyi ga üxü ga naxĩchine, rü nanadai ga guxũma ga yema duũxũgü.

30 —Rü ngëxgumarüũ tá ta nangupetü i ngëxguma íchanguxgu i choma i Tupana Nane na duũxũxũ chiĩxũ.

31 Rü ngëma ngunexũgu rü texé tama tümapataarü aixepewa ngëxmagu, rü tama name

i tūmapatagu tayangaxi na tūmaārū ngēmaxūgū tayatoxūcèx. Rū texé ya tūmañewa ngēxmaxē, rü tama name i tūmapatacèx tataegu na tacü ngema tayayaxuxūcèx.

³² —Rü nüxna pecuèxāchie ga ñuxācü ngīxū na naxüpetūxū ga Lox namèx ga na nayuxū, ga yexguma ngīgüweama nadèuxgu.

³³ —Erü yixema tügü maxēchaxēēchaūxē rü tá itayarütaxu, natürü yixema chauxcèx yuxe rü aixcūma tá tūxū nangēxma i maxū i taguma gúxū.

³⁴ —Rü pemañ nüxū chixu rü ngēma chütaxūgu rü wüxi i ngürücarewa tá nangēxmagü i taxre i duūxūgü. Rü wüxi tá niga, rü ngēma to rü tá ngema natèx.

³⁵ —Rü taxre i ngexūgü tá nügümañ ínacaegü. Rü wüxi tá niga rü ngēma to rü tá ngema natèx.

³⁶ —Rü taxre i yatügü rü wüxi i nañewa tá nangēxmagü. Rü wüxi tá niga rü ngēma to rü tá ngema natèx —ñanagürü ga Ngechuchu.

³⁷ Rū yemaxū naxñüēgu ga norü ngúexūgü, rü Ngechuchuna nacagü, rü ñanagürügü: —Pa Corix, ¿ngextá tá nixí i nangupetūxū i ngēma nüxū quixuxū? —ñanagürügü. Rü nüma ga Ngechuchu rü nanangāxū, rü ñanagürü: —Duūxūgü rü tá chauxcèx nangutaquēxegü ñoma ēxchagü nawemücèx ngutaquēxexürü —ñanagürü.

18

Ore ga āēxgacügu rü yutecügu ixuxū

¹ Rū Ngechuchu rü wüxi ga to ga orexū na-mañ nixu na yemawa nangúexēēāxūcèx na ñuxācü

nanaxwèxexũ na taguma nũxũ nachaueãcũma guxũguma nayumũxëgũxũ.

² Rũ ñanagürü nũxũ ga norü ngúexũgũ: —Wũxi ga ãñewa nayexma ga wũxi ga ãëxgacü ga tama Tupanaga ãnũxũ rü taxúexũma ngechaũxũ.

³ —Rũ guma ãñewatama iyexma ga wũxi ga nge ga yutecü ga ngixũ nayexmacü ga wũxi ga guxcha namaã ga to ga duũxũ. Rũ yemacèx yema ãëxgacüxütawa ixũxecha na ngixũ namexëãxücèx ga yema guxcha.

⁴ —Rũ muëxpüxcüna yéma ixũũxũ, natürü yema ãëxgacü rü tama ngixũ narüngũxëëchaũ. Natürü düxwa nagu narüxĩnü ga yema ãëxgacü rü naãewa ñanagürü:

“Choma rü tama Tupanaxũ changechaũ, rü taxúexũma chacuáxchaũ.

⁵ —Natürü ngëma choxũ na nachixeweexaxücèx i ñaã nge, rü noxtacüma tá ngixũ charüngũxëë na tama yeücürü choxũ nachixeweexaxücèx”, ñanagürü.

⁶ Rũ Cori ga Ngechuchu rü ñanagürü: —Yema nixĩ ga norü ore ga yema ãëxgacü ga chixexũ.

⁷ —¿Taux ëxna i Tupana rü paxa tüxũ ínapoxũxũ ya yixema duũxë ya tüxũ nayaxuxe i ngëxguma chütacü rü ngunecü rü norü ngũxëëcèx nũxna tacaxgu i tümaãrü yumüxëwa?

⁸ —Rũ pemaã nũxũ chixu rü Tupana rü paxatáma tüxũ narüngũxëë. Natürü ngëxguma wë-naxârü núma chaxũxgu i choma i Tupana Nane na duũxũxũ chiixũ, ¿rü ñuxre i duũxũgü i aixcũma yaxõgũxũxũ tá ichayangau i ñoma i naãnewa? — ñanagürü ga Ngechuchu.

Ore i Parichéu gu ixuxũ rü dñēruarü deruũgu ixuxũ

⁹ Rũ Ngechuchu rü nüxũ nixu ga ñãã ore nachiga ga yema duũxũgũ ga nügũ írūmegūnetaxũ rü tama togũxũ cuáxchaũgũxũ.

¹⁰ Rũ ñanagürü: —Taxre ga yatü rü tupauca ga taxũnewa nayayumũxēgũ. Rũ wũxi rü Parichéu nixĩ, rü yema to rü wũxi ga yatü ga Dumaãrũ ãēxgacücèx dñēru ngĩxũ dexũ nixĩ.

¹¹ —Rũ yema Parichéu rü yexma nachi, rü ñãããcü nayumũxē:

“Pa Tupanax, moxē cuxna chaxã erü tama togü i duũxũgürüũ chixĩ. Rũ tama togürüũ changĩtèx, rü tama ngēmarüũ taxũ i chixexũ chaxü rü ēxna wũxi i nge i ãtecũmaã ichape. Rũ bai i ñãã yatü i Dumaãrũ ãēxgacücèx dñēru ngĩxũ dexürüũ chixĩ.

¹² —Choma rü guxcü ya yũxũgu rü taxreēxpũxcũna chaxaure rü tama chachibü na cugu charũxĩnũxũcèx. Rũ chorü dñēruwa rü guxũguma meã cuxna chanaxã i ngēma cuxna üxũ”, ñanagürü.

¹³ —Natürü ga guma yatü ga Dumaãrũ ãēxgacücèx dñēru ngĩxũ decü, rü yaxũgu narũxãũx. Rũ namuũ ga daxũ na nadawenũxũ, rü yema norü ngechaũmaã nügũ napaxremü, rü ñanagürü:

“Pa Tupanax, ¡Cuxũ changechaũtümüũ! Erü wũxi i pecaduãxũ chixĩ”, ñanagürü ga guma yatü.

¹⁴ —Rũ ngēmacèx pemaã nüxũ chixu rü guma yatü ga Dumaãrũ ãēxgacücèx dñēru ngĩxũ decü rü yexguma napatacèx nataegugu rü Tupanapēxewa rü mecü nixĩ. Natürü yema Parichéu rü Tupana rü tama namaã nataãē. Erü texé ya tügũ icuèxüxũxe rü Tupana tá tüxũ naxãnexēē. Natürü texé ya tama

tügü icuèxüxüxe rü Tupana rü tá tüxü nicuèxüxü
—ñanagürü ga Ngechuchu.

*Ngechuchu rü meã buãxgüxü nayaxu
(Mt 19.13-15; Mr 10.13-16)*

¹⁵ Rü yéma Ngechuchuxütawa tüxü tagagü ta
ga buãxgü na tüxü yangõgüchigüxüçèx. Natürü
yexguma norü ngüexügü yemaxü dauxgügu
rü tüxü ningagü ga guxema tümãcügü
Ngechuchuxütawa tüxü gagüxe.

¹⁶ Natürü Ngechuchu rü nügüxütawa tümãcèx
naca ga guxema buãxta rü ñanagürü norü
ngüexügüxü: —Chanaxwèxe i chauxütawa naxĩ
i buxügü. ;Rü tâxü i nüxna penachuxuxü! Erü
Tupana ãëxgacü íxĩxüwa rü tümãcèx nixĩ ya
yíxema ñãã buxügürüü ixĩgüxe.

¹⁷ —Aixcüma pemaã nüxü chixu rü texé ya tama
wüxi i buxürüü Tupanaxü yaxúxe na tümãärü
ãëxgacü na yĩxüçèx, rü tagutáma nagu taxücu i Tu-
pana ãëxgacü íxĩxüwa —ñanagürü ga Ngechuchu.

*Wüxi ga yatü ga dñeruãxüchicü Ngechuchumaã
nidexa*

(Mt 19.16-30; Mr 10.17-31)

¹⁸ Rü wüxi ga yema Yudiugüarü ãëxgacü rü
Ngechuchuna naca rü ñanagürü: —Pa Ngüexëëruü
ya Mecüx, ¿tacü tá chaxüxü na chanayaxuxüçèx i
maxü i taguma gúxü? —ñanagürü.

¹⁹ Rü Ngechuchu nanangãxü rü ñanagürü nüxü:
—¿Tüxcüü “Mecü” ñacurügü choxü? Erü Tu-
panaxĩcatama nixĩ ya mecü ixĩcü, rü nataxuma i to
i mecü ixĩxü.

²⁰ —Cuma nüxü cucuèx i Tupanaärü mugü i
ñaxü:

“¡Tãütáma naĩ i ngemaã icupe, rü tãütáma cumáéta, rü tãütáma cungĩtèèx, rü tãütáma doraxũ quixu i togüchiga, rü tümaga naxĩnü ya cunatü rü cue!”

ñaxũ.

21 RÜ yexguma ga guma yatü rü ñanagürü Ngechuchuxũ: —Woetama chorü bucüma meãma chayanguxèè i guxũma i ngẽma mugü i nüxũ quixuxũ —ñanagürü.

22 RÜ yemaxũ naxĩnügu ga Ngechuchu rü ñanagürü: —Wüxixicatama cuxũ nataxu, rü ngẽma nixĩ na namaã cutaxexũ i guxũma i curü ngẽmaxũgü rü togü i ngearü ngẽmaxũãxgüxũna na cunaxãxũ i curü natanü, rü ngẽxguma rü tá cuxũ nangẽxma i cuchica i daxũguxũ i naãnewa. RÜ ñuxũchi marü name i chowe curüxũ —ñanagürü.

23 Natürü yemaxũ naxĩnügu ga guma yatü rü poraãcü inayarümaãchi, yerü namuãrü dïeruãxũchi.

24 RÜ yexguma Ngechuchu nüxũ dèuxgu ga ñuxãcü na nangechaũxũ, rü ñanagürü nüxũ ga norü ngúexũgü: —Naguxchaxüchi tá nixĩ na Tupana ãëxgacü íixĩxüwa na yachocuxũ i ngẽma dïeruãxũchigüxũ.

25 —Rü dücax, wüxi i cameyu rü taxucürüwama wüxi ya ucumaxëtüwa naxüpetü. RÜ ngẽxgumarüũ ta nixĩ i wüxi i duũxũ i dïeruãxũchixũ rü taxucürüwama Tupana ãëxgacü íixĩxüwa nixücu [ega norü dïerugama naxĩnügu rü tama yaxõõgu —ñanagürü.]

26 RÜ yexguma yemaxũ naxĩnüëgu ga duũxũgü rü ñanagürügü: —¿Éxna texé tá ya nayaxúxe i maxũ i taguma gúxũ? —ñanagürügü.

27 RÜ Ngechuchu ñanagürü nüxũ: —Duũxũgü rü

taxuacüma nügü namaxëë, natürü Tupanaãxü rü natauxcha na namaxëxëãxü —ñanagürü.

²⁸ Rü Pedru ñanagürü Ngechuchuxü: —Pa Corix, toma rü yéma tanawogü ga guxüma ga torü yemaxügü na cuwe tarüixüçex —ñanagürü.

²⁹⁻³⁰ Rü yexguma ga Ngechuchu rü ñanagürü nüxü ga norü ngüexügü: —Aixcüma pemaã nüxü chixu rü texé ya Tupanacëx tümapatana, rü éxna tümanatüna, rü éxna tümaëna, rü éxna tümaëneëgüna, rü éxna tümaëyëxgüna, rü éxna tümamëxna, rü éxna tümaxãcügüna ngema ixüxë na Tupanaãxü tapuracüxüçex, rü ñoma i nañewa tátama poraãcü tanayaxu i tümaärü natanü. Rü daxüguxü i nañewa rü tá ta tanayaxu i maxü i taguma gúxü —ñanagürü.

Ngechuchu rü wenaxãrü nanaxunagü ga norü yuxchiga

(Mt 20.17-19; Mr 10.32-34)

³¹ Rü Ngechuchu rü noxrüwama naxcëx naca ga norü ngüexügü, rü ñanagürü nüxü: —Ñuxma rü Yerucharéüwa tá taxí na ngema yanguxüçex i guxüma ga yema ore ga nuxcümaügüxü ga Tupanaärü orearü uruügü ümatüxü ga chauchiga.

³² —Rü Yerucharéüçüãx i duüxügü rü tá to i nachiüãnecüãxna choxü namugü. Rü ngema duüxügü rü tá chaugu nidauxcüraügü, rü tá chomaã naguxchigagü, rü tá chauchiwewa nacuaixgüe.

³³ —Rü tá choxü nacuaixgü, rü yixcüra rü tá choxü nimëxgü. Natürü tomaëxpüx i ngunexüguwena rü tá wenaxãrü chamaxü —ñanagürü.

34 Natürü yema norü ngúexügü rü tama nüxü nacuèxgüéga ga na tacüchiga yiixü ga yema ore ga namaã nüxü yaxuxü. Yerü poraãcü nüxü naguxcha ga aixcüma nüxü na nacuèxgüxücèx.

Ngechuchu nanamexêê ga wüxi ga ngexetücü ga Yericúwa
(Mt 20.29-34; Mr 10.46-52)

35 Rü yexguma Ngechuchu ñãne ga Yericúwa nguxchaügu, rü yéma namacüwawa narüto ga wüxi ga yatü ga ngexetücü ga dñerucèx yéma iwémécü.

36 Rü yexguma guma ngexetücü nüxü ñügu ga muxüma ga duüxügü na yéma chopetüxü, rü duüxügüna naca ga tacü na ngupetüxü.

37 Rü nanangãxügü, rü ñanagürügü: — Ngechuchu ya Nacharétucüãx nuã naxüpetü — ñanagürügü.

38 Rü yexguma ga guma ngexetücü rü tagaãcü ñanagürü: —Pa Ngechuchux, Pa Dabítanüxüx, jcuxü changechaütümüü! —ñanagürü.

39 Rü yema duüxügü ga Ngechuchupëxegu ñxü, rü nanangagü ga na iyanangeáxücèx. Natürü guma ngexetücü rü yexeraãcü tagaãcü ñanagürü: —Pa Dabítanüxüx, jcuxü changechaütümüü! — ñanagürüama.

40 Rü yexma nayachiãchi ga Ngechuchu, rü duüxügüxü namu na naxütawa nagagüãxücèx. Rü yexguma marü naxütawa nanguxgu, rü guma ngexetücüna naca ga Ngechuchu, rü ñanagürü:

41 —¿Tacü i cunaxwèxexü na cumaã chanaxüxü? —ñanagürü. Rü guma ngexetücü nanangãxü rü ñanagürü: —Pa Corix, chanaxwèxe na choxü quidauchixêêxü —ñanagürü.

42 Rū Ngechuchu ñanagürü nüxũ —¡Idauchi! Rū marü cuxcèx nitaane erü cuyaxõ —ñanagürü.

43 Rū yexgumatama nidauchi ga guma ngex-etücü, rü Ngechuchuwe narüxũ, rü Tupanaxũ nicuèxüüchigü. Rū guxũma ga duũxügü ga nüxũ daugüxũ ga yema ngupetüxũ rü Tupanaxũ nicuèxüügü ta.

19

Ngechuchu rü Zaquéuchiga

1 Rū Ngechuchu rü Yericúarü ñanewa naxüpetü.

2 Rū yéma nayexma ga wüxi ga yatü ga dñeruãxüchixũ ga Zaquéugu ãegaxũ. Rū nūma nixĩ ga naëru ga yema yatügü ga Dumaärü ãëxgacücèx dñeru ngĩxũ ideetanüxũ.

3 Rū yema Zaquéu rü poraãcü nüxũ nangúchañ ga Ngechuchuxũ na nadauxũ na nüxũ nacuáxücèx. Natürü taxuacüma nüxũ nadau, yerü namuxüchi ga duũxügü, rü ñuxüchi nanuxchanexüchi ga nūmax.

4 Rū yemacèx Ngechuchupëxegu nayangu, rü namacüwawa wüxi ga naĩgu naxĩnagü na Ngechuchuxũ nadauxücèx ga yexguma yéma naxüpetügu.

5 Rū yexguma yéma naxüpetügu ga Ngechuchu, rü daxũ nadau natüüwa ga guma naĩ. Rū ñanagürü nüxũ: —Pa Zaquéux, ¡paxa íruxĩ i ngema! Erü cupatawa tá changu i ñuxma —ñanagürü.

6 Rū paxa ínarüxĩ ga Zaquéu, rü taãëãcüma Ngechuchuxũ nayaxu.

7 Rū yexguma yemaxũ nadaugügu ga duũxügü, rü guxũma inanaxügüe ga chixri Ngechuchuchiga

na yadexagüxü. Rü ñanagürügü: —¿Ñuxãcü i nüma rü wüxi i duüxü i pecaduãxüpatawa nangu? — ñanagürügü.

⁸ Rü yexguma ga Zaquéu rü inachi rü ñanagürü Ngechuchuxü: —Düçèx, Pa Corix, choma rü ngearü dïëruãxgüxüna tá chanaxã i ngãxügu i guxüma i chorü ngẽmaxügü. Rü ngẽxguma chi texé tüxü chawomüxëẽãcüma tüxü changïxgu, rü ãgümücüéxpüxcüna tá tüxü ngïxü chataeguxëẽ i ngẽma tümaãrü dïëru —ñanagürü.

⁹ Rü Ngechuchu rü ñanagürü nüxü: —Rü ñoma i ngunexügu cupatawa nangu i maxü i taguma güxü, erü cuma rü ta rü Abráürüü cuyaxõ.

¹⁰ —Rü choma i Tupana Nane na duüxüxü chiïxü, rü ñoma i naãnewa chaxü na naxcèx chayadauxücèx i ngẽma duüxügü i iyarütauxexü na chanamaxëxëxücèx —ñanagürü.

Ore i dïëru gu ixuxü

(Mt 25.14-30)

¹¹ Rü yoxni yema Ngechuchuarü ore inaxïnüeyane ga duüxügü, rü Ngechuchu rü wüxi ga to ga ore ga cuèxruüxü namaã nixu, yerü marü Yerucharëüxü ningaica, rü duüxügü nagu rüxïnüëgu rü paxa tá ínangu ga Tupana na norü ãëxgacü yïixücèx.

¹² Rü yexguma ga Ngechuchu rü nügüchiga nidexa rü ñanagürü nüxü: —Nayexma ga wüxi ga yatü ga taxü ga cori ixïcü ga nayaxucü ga ore na nachiuãneãrü ãëxgacüxütawa naxüxücèx ga yaxüwa na yema ãëxgacü nüxü unetaxücèx na guma nawa ne naxüxüne ga iãneãrü ãëxgacü yïixücèx.

13 –Rü yexguma tauta inaxũächigu, rü naxcèx nangema ga 10 ga norü duũxũgü. Rü wüxichigüna ngĩxũ naxã ga wüxitachinü ga tatanücü ga dïeru. Rü ñanagürü nüxũ:

“¡Ngĩmaã pepuracüe rü ngĩxũ pimuxẽẽ i ñãã dïeru ñuxmatáta chataegu!” ñanagürü.

14 –Natürü yema ñãnecũãx ga duũxũgü rü naxchi naxaie ga guma cori. Rü yemacèx nawenaãma nayamugü ga ñuxre ga orearü ngeruũgü na nachiũãneãrü ãëxgacümaã nüxũ yanaxugüxücèx na tama nanaxwèxegüxũ na norü ãëxgacüxũ na yĩxücèx ga guma cori.

15 –Natürü nachiũãneãrü ãëxgacü rü nayangucuchixẽẽãma ga guma cori. Rü ñuxũchi ga guma cori rü norü ñãnecèx nataegu na yéma ãëxgacü na yĩxücèx. Rü yexguma ñanguxgu rü naxcèx nangema ga yema 10 ga norü duũxũgü ga dïeru nüxna ngĩxũ naxãxũ, yerü nüxũ nacuáxchaũ ga ñuxrechigü ngĩxũ na yamuxẽẽxũ ga norü dïeru ga wüxichigü ga yema norü duũxũgü.

16 –Rü yema nüxĩra dïeru nüxna ngĩxũ naxãxũ rü norü corixũtawa nangu, rü ñanagürü:

“Pa Corix, curü dïeru rü 10 ëxpüxcüna ngĩxũ chimuxẽẽ”, ñanagürü.

17 –Rü guma Cori ga yexwaca ãëxgacüxũ ingucuchicü rü nanangãxũ, rü ñanagürü:

“Wüxi i mexũ i chorü duũxũ quixĩ. Maneca meãma namaã cupuracü i ngẽma íraxũ i dïeru i cuxna chaxãxũ. Rü ñuxma rü 10 ya ñãnegüarü ãëxgacüxũ tá cuxũ chixĩxẽẽ”, ñanagürü.

18 –Rü yéma nangu ga to ga norü duũxũ, rü ñanagürü:

“Pa Corix, curü dîeru rü wüximě̃xpüxcüna ngĩxũ chimuxě̃”, ñanagürü.

19 –Rü norü cori nanangãxũ rü ñanagürü nüxũ:

“Cuma rü wüximě̃xpüx ya ñanegüarü ã̃xgacüxũ tá cuxũ chixĩxě̃”, ñanagürü.

20 –Rü yéma nangu ga to ga norü duũxũ rü ñanagürü nüxũ:

“Pa Corix, ñaã iyixĩ i curü dîeru. Rü wüxi ya dechugu ngĩxũ chanuque, rü ngěmaãcü ngĩmaã changuxũ.

21 –Yerü cuxcèx chamuũ, erü wüxi i yatü i aũxũ quixĩ. Rü cunayauxtanü i ngěma tama cuxrü ixĩxũ, rü cunayaxu i nanetüarü o i ngextá tama cuma ícutoexũwa”.

22 –Rü yexguma ga guma ã̃xgacü rü ñanagürü nüxũ:

“Wüxi i chorü duũxũ i chixexũ quixĩ i cumax. Rü curü oretama nixĩ i cuxũ ixuxũ na cuchix-exũ. Marü nüxũ cucuèxchirêx ga na chaxaũxũ, rü chanayautanũxũ i ngěma tama choxrü ixĩxũ, rü chanayaxuxũ i nanetüarü o i tama choma icha-toxũ.

23 –¿Natürü tüxcüũ tama bancugu choxũ ngĩmaã cunguxũ i chorü dîeru na ngema choxũ ngĩxũ yamuxě̃güxücèx, rü ngěmaãcü mucü ngĩxũ na chayaxuxücèx i ngěxguma íchanguxgu?” ñanagürü.

24 –Rü yexguma ga ã̃xgacü rü yema yex-magüxũmaã nüxũ nixu, rü ñanagürü:

“¡Nüxna ngĩxũ peyaxu i ngěma dîeru, rü ngěma 10 i dîeru nüxũ ngěxmaxũna ngĩxũ pexã!” ñanagürü.

25 –Rü nümagü rü nanangãxũgü, rü ñanagürügü:

“Natürü, Pa Corix, nüma rü marü nüxũ ingěxma i 10 i dîeru”, ñanagürügü.

26 –Rü guma ãëxgacü nanangãxũ, rü ñanagürü:

“Pemaã nüxũ chixu rü texé ya chauga ñnuxẽ rü yexera tá tuxna chanaxã. Natürü texé ya tama chauga ñnuxẽ rü tá tuxna chanayaxu i woo ngẽma íraxũ i tuxũ ngẽxmaxũ.

27 –Rü yema chorü uwanügü ga tama naxwèxegüxũ ga norü ãëxgacüxũ na chiixũ, ¡rü nuã penagagü, rü nuã chopëxegu peyadai!” ñanagürü.

*Ngechuchu rü Yerucharéügu naxücu
(Mt 21.1-11; Mr 11.1-11; Cu 12.12-19)*

28 Rü yema orexũ yaxuxguwena ga Ngechuchu, rü inixüchigü ga Yerucharéüwa na naxüxũ.

29 Rü yexguma marü nawa nangugüchaügu ga guma ñãnegü ga Bechagué rü Betániã ga Oríbunecüarü Mèxpúneãrü ngaicamana yexmagüne, rü Ngechuchu nanamu ga taxre ga norü ngúexügü.

30 Rü ñanagürü nüxũ: –¡Gua ñãnexãcüwa pexĩ! Rü ngẽxma tá nüxũ peyangau i wüxi i buru i ngexwaca yaxũ i ngẽxma ngaxüxũ i taguma texé natagu au-nagüxũ. ¡Rü peyawëxũ, rü nuã penaga!

31 –Rü ngẽxguma texé pexna çaxgu na tacücèx peyawëxüxũ i ngẽma buru, ¡rü tümamaã nüxũ pixu rü ñapegügü:

“Torü Cori nanaxwèxe”, ñapegügü tuxũ!

32 Rü yéma naxĩ ga yema taxre ga norü ngúexügü. Rü yexma nüxũ nayangau ga yema buru ga Ngechuchu namaã nüxũ ixuxürü.

33 Rü yexguma yawëxügüãgu ga yema buru, rü norü yoragü rü yema ngúexügüna nacagüe, rü

ñanagürügü: —¿Tüxcüü peyawëxü i ngëma buru? —
ñanagürügü.

34 Rû nümagü nanangãxügü, rû ñanagürügü:
—Rû tayawëxü erü torü Cori nanaxwëxe —
ñanagürügü.

35 Rû Ngechuchuxütawa nanagagü ga yema
buru. Rû yema norü ngúexügü rû norü
gáuxüchirumaã nanatütägü. Rû ñuxüchi
Ngechuchuxü natagu naxaunagüxëëgü.

36 Rû duüxügü rû Ngechuchupëxewa norü
gáuxüchirumaã nayaçhamagü ga nama.

37 Rû yexguma inaxügüãgu na ínaxígüxü nawa
ga yema nama ga Oríbunecüarü Mëxpúnewa
yarüdaexü, rû guxüma ga yema duüxügü ga
yaxögüxü ga nawe rüxixü rû inanaxügü ga
taãëacüma aita na naxüexü rû tagaãcü Tupanaxü
na yacuëxüügüxü naxcëx ga guxüma ga yema
cuëxruügü ga taxü ga nüxü nadaugüxü ga
Tupanaärü poramaã naxüxü ga Ngechuchu.

38 Rû ñanagürügü: —¡Namecümäxüchi ya daa
tórü ãëxgacü ya Tupanaégagu núma ücü! ¡Rü
pema rü ta, Pa Daxücüãx, rû petaãxëgü rü nüxü
picuëxüügü ya Tupana! —ñanagürügü.

39 Rû yéma duüxügütanüwa nayexmagü ga ñuxre
ga Parichéügü. Rû ñanagürügü Ngechuchuxü: —
Pa Ngúexëëruüx, ¡Yangagü i ngëma cuwe rüxixü i
duüxügü na yanachianegüxücëx! —ñanagürügü.

40 Natürü Ngechuchu nanangãxü rû ñanagürü
nüxü: —Pemaã nüxü chixu rü ngëxguma chi
iyanangeëxgügu i ñaã duüxügü, rü daa nutagü ya
namacüwawa ngëxmagücü rü chi nüxü aita naxüe —
ñanagürü.

41 Rū yexguma Yerucharéúãrū ngaicamana nanguxgu ga Ngechuchu, rü guma ñānecũãx ga duũxũgücèx naxaxu.

42 Rū ñānagürü: —Pa Yerucharéúãxgü, chierü ñoma i ngunexügu nüxũ pecuèxgu na texé aixcūma taã pexna ãxũ. Natürü ngẽma rü pexchawa in-icux i ñuxma, rü taxuacūma nüxũ pecuèx.

43 —Rü tá guxchaxügu pexũ naxüpetü. Rü perü uwanügu tá nanaxü i norü poxũchica i norü guxũcüwawa ya perü ñāne. Rü norü churaragü tá pexũ ínachoeguãchi, rü guxũcüwawa tá pexcèx ne naxĩ.

44 —Rü tá nagu napogüe ya perü ñāne, rü tá pexũ nadai. Rü taxucütáma ya nuta ngextá nügüxétü nanugüxüra i perü ñāneärü poeguxũtapüwa. Rü ngẽmaãcü tá pexũ naxüpetü, yerü tama nüxũ pecuèxgüchaũ ga yexguma Tupana petanügu naxũñānegu —ñānagürü.

Ngechuchu rü tupauca ga taxũnewa ñānawoxũ ga duũxũgü ga yema taxegüxũ

(Mt 21.12-17; Mr 11.15-19; Cu 2.13-22)

45 Rü Ngechuchu rü tupauca ga taxũnewa nangu rü yexma naxücu. Rü ñānaxügu na ñānawoxũãxũ ga yema duũxũgü ga tupauca ga taxũnewa taxegüxũ.

46 Rü Ngechuchu rü ñānagürü nüxũ: —Tupanaärü ore i ümatüxüwa rü ñānagürü:

“Chopata rü yumüxẽpataũ nixĩ”.

Natürü pema rü ngĩtèèxgüxũpataũ peyaxĩxẽ —ñānagürü.

47 Rü guxũ ga ngunexügu rü tupauca ga taxũnewa nayangüxẽẽtae ga Ngechuchu. Natürü ga paigüarü

ãëxgacügü, rü ngúexëëruügü ga Moïchëarü mugüwa nguxëëtaegüxü, rü Yerucharéüärü ãëxgacügü, rü naxcëx nadaugü ga ñuxãcü tá na yamëxgüãxüçëx.

⁴⁸ Natürü taxucürüwa tacü namaã naxügü, yerü guxüma ga duïxügü rü namaã nataãëgü, rü meã inarüxïñüë ga norü ore.

20

Ngechuchuna nacagü na texéarü oregagu tupauca ga taxünewa nanguxëëtaexü (Mt 21.23-27; Mr 11.27-33)

¹ Wüxi ga ngunexü ga Ngechuchu rü tupauca ga taxünewa nayexma. Rü nanangúexëë ga duïxügü, rü namaã nüxü nixu ga Tupanaärü ore. Rü yexguma iyadexayane rü yéma nangugü ga paigüarü ãëxgacügü, rü ngúexëëruügü ga Moïchëarü mugüwa nguxëëtaegüxü, rü Yudíugüarü ãëxgacügüerugü.

² Rü ñanagürügü nüxü: —¿Texéarü mugagu nixï i cunaxüxü i ngëma núma cuxüxü? ¿Rü texé cuxü tamu na cunaxüxüçëx i ngëma? —ñanagürügü.

³ Rü yexguma ga Ngechuchu rü ñanagürü nüxü: —Choma rü tá ta pexna chaca, rü chanaxwëxe i choxü pengãxügü.

⁴ —¿Rü texé tanamu ga Cuáü na duïxügüxü ínabaiüxëëxüçëx? ¿Pexcëx rü Tupana yïxü ga namucü rü ëxna duïxügümare? —ñanagürü.

⁵ Rü yexguma ga Parichéugü rü inanaxügüe ga nügümaã na yaporagatanücüüxü. Rü nügümaãtama ñanagürügü: —¿Ñuxü ñagügüxü tá? Erü ngëxguma chi:

“Tupana núma nanamu”, ñagügu, rü nüma rü chi ñanagürü tüxü:

“¿Rü tüxcüü ga tama nüxü peyaxõgüxü?” ñanagürü chi tüxü.

⁶—Rü ngëxguma chi ñagügu:

“Yatügümare nuã nanamu”, ñagügu, rü guxü i duüxügü chi nutamaã tüxü ínamuxüchigü, rü tüxü chi nadai. Erü nümagü i duüxügü rü nagu narüxñüë na Tupana yüxü ga Cuáüxü mucü.

⁷Rü Ngechuchuxü nangãxügü rü ñanagürügü: —Tama nüxü tacuëx ga texé núma na namuxü ga Cuáü ga baiüxëëruü —ñanagürügü.

⁸Rü yexguma ga Ngechuchu rü ñanagürü nüxü: —Choma rü ta tãütáma pemaã nüxü chixu na texé choxü muxü na chanaxüxücëx i ngëma choxna naxcëx peçaxü —ñanagürü.

*Ore ga puracütanüxü ga chixexügu ixuxü
(Mt 21.33-44; Mr 12.1-11)*

⁹Rü inanaxügü ga Ngechuchu ga duüxügümaã na yadexaxü. Rü ñaã ore ga cuëxruüxü namaã nixu, rü ñanagürü: —Nayexma ga wüxi ga yatü ga wüxi ga ubanecü ücü ga norü naãnewa. Rü ñüxüchi ñüxre ga puracütanüxüna nanaxã na nüxna nadaugüxücëx rü yixcama rü norü yoramaã na yayauxyegüãxücëx ga yema norü o. Rü ñüxüchi ga guma yatü rü nixü ga yéma rü nuxcüma nataegu.

¹⁰—Rü yexguma nawa nanguxgu ga na yadauxü ga yema ubagü, rü guma yatü rü yéma puracütanüxügüxütawa nanamu ga wüxi ga norü duüxü na naxcëx íyaçaxücëx ga yema ubagü ga nüxna üxü. Natürü yema puracütanüxügü rü

nanaçuaixgü ga guma yatüarü duïxü, rü taxuüma ga uba nüxna naxãgü. Rü yemaãcü ínayamugü.

11 —Rü yexguma ga guma yatü rü wenaxârü to ga norü duïxü yéma ta namu. Natürü ga yema puracütanüxügü rü chixexü namaã nixugüe, rü nanaçuaixgü, rü taxuüma ga uba nüxna naxãgü. Rü yemaãcü ínayamugü.

12 —Rü wenaxârü to ga norü duïxü yéma ta namu ga guma yatü. Natürü ga yema puracütanüxügü rü nanapixëë, rü ínanatèxüchigü ga yema nañnewa.

13 —Rü düxwa ñanagürü ga guma nañneärü yora:

“¿Tacü tá chaxüxü i ñuxmax? Rü name nixí i chaune ya nüxü changechaücü ngema chanamu. Rü ngëxguma nüxü nadaugügu rü bexmana naga tá naxñüë”, ñanagürü.

14 —Natürü ga yema puracütanüxügü rü yexguma guma yatü nanexü nadaugügu, rü nügümaã ñanagürügü:

“Ñaãärü tá nixí i ñaã nañne i yixcama. ¡Rü ngíxã tayamèxgü na tórü na yíxüçèx!” ñanagürügü.

15 —Rü ínanatèxüchigü ga yema nañnewa, rü nayamèxgü —ñanagürü ga Ngechuchu. Rü yexguma ga Ngechuchu rü duïxügüna naca, rü ñanagürü: —¿Tacü tá ngëma puracütanüxümaã naxü i ngëma nañneärü yora i ñuxmax?

16 —Rü ngema tá naxü rü tá nanadai i ngëma puracütanüxügü, rü togüna tá nanaxã i norü nañne —ñanagürü ga Ngechuchu. Rü yexguma yemaxü naxñüëgu ga duïxügü rü ñanagürügü: —Chierü tama ngëmaãcü nangupetüxëëãxgu ya Tupana —ñanagürügü.

17 Natürü Ngechuchu rü nüxũ nadawenü, rü ñanagürü nüxũ: —¿Natürü ñuxũ ñaxũchiga nixĩ i ngẽma Tupanaãrũ ore i ümatũxũ i ñaxũ?:

“Yima nuta ya mecü ya ñãrũ üruũgü nüxũ oechirécü, rü ñuxma rü yimatama nixĩ ya Tupana nüxĩra yaxúcuchicü na namaã inaxügüãxũ ya ñpata”,

ñaxũ.

18 Rũ ñanagürü ta ga Ngechuchu: —Texé ya yima nutamaã yarũñaxẽ, rü tá itapoũgü. Rũ yixema tũmaetügu nanguxe ya yima nuta, rü tá tüxũ niñáixmũ —ñanagürü ga Ngechuchu.

19 Rũ ga paigüarũ ãëxgacügü rü ngúexëëruũgü ga Moĩchëarũ mugüwa nguxëëtaegüxũ, rü yexgumatama Ngechuchuxũ niyauwgüchaũ. Yerü nüxũ nacuèxgü ga nachiga na yixũ ga yema ore ga cuèxruũ ga nüxũ yaxuxũ. Natürü tama nayayauxgü, yerü duũxügüxũ namuũë.

*Ãëxgacüaxũ dñërumã naxütanüxũchiga
(Mt 22.15-22; Mr 12.13-17)*

20 Rũ yemacèx ga yema paigüarũ ãëxgacügü rü Ngechuchuxütawa nanamugü ga ñuxre ga norü duũxügü na mexũ i duũxügürũ yéma iyanaxĩnëxücèx natürü naxcèx na nadaugüxücèx ga ñuxãcü nachiuãneãrũ ãëxgacüxütawa Ngechuchuxũ na ínaxuaxügüxücèx.

21 Rũ yemacèx Ngechuchuna nacagü rü ñanagürügü: —Pa Ngúexëëruũx, toma nüxũ tacuèx rü aixcüma nixĩ i ngẽma nüxũ quixuxũ rü ngẽma namaã cungúexëëtaexũ. Rũ tama duũxũãrũ düxëtüxũnegu cudawenü erü nacüma nixĩ i

cungugüxü. Rü aixcüma cunangüexëë i duüxügü na Tupana naxwëxexüãcüma namaxëxücëx.

22 —Rü dücax, ngëma ãñeãrü dïëru i ãëxgacü ya tacü ya Dumacüãx naxwëxexü na tanaxütanüxü, ¿rü namexü yïxü na nüxü tanaxütanüxü rü ëxna tama? —ñanagürügü.

23 Natürü Ngechuchu nüxü nacüëxama na chixexügu naxïñüëxü ga yema duüxügü, rü yemacëx ñanagürü nüxü: —¿Tüxcüü i chixexügu choxü pengüxëëchaü?

24 —¡Choxü ngïxü pewé i wüxi i dïëru na ngïxü chadauxücëx! ¿Rü texëchicünëxã rü texéëga ngïgu üx? —ñanagürü. Rü nanangãxügü rü ñanagürügü: —Dumacüãx ya ãëxgacü ya tacüchicünëxã nixï —ñanagürügü.

25 Rü yexguma ga Ngechuchu rü ñanagürü nüxü: —¡Ãëxgacüna ngïxü pexã i ngëma ãëxgacüarü ixïcü, rü Tupanana ngïxü pexã i ngëma Tupanaãrü ixïcü! —ñanagürü.

26 Rü yemaãcü ga Ngechuchu rü woo norü orewa rü taxucürüwama chixexügu nanangüxëëgü ga duüxügüpëxewa, yerü meãma nanangãxü. Rü guxüma ga duüxügü rü nangeëxgümare yerü nabaixãchiãëgü namaã ga yema norü ore.

Chaduchéugü rü Ngechuchuna nacagüe rü ngoxi wena namaxë i duüxügü

(Mt 22.23-33; Mr 12.18-27)

27 Rü Ngechuchuxütawa ínayadaugü ga ñuxre ga Chaduchéugü. Rü nümagü nixï ga nagu naxïñüëxü na tagutáma wena namaxëxü i yuexü. Rü yemacëx Ngechuchuxü ñanagürügü:

28 –Pa Ngúexěěruũx, Moĩchéarü mugüwa rü ñanagürü:

“Ngěxguma wüxi ya yatü naxmèx ngexacüyane nayuxgu, rü name nixĩ i naěneětama ngĩmaã naxãmèx i ngěma yutecü i naxũmèx, na ngěmaãcü naxãxãcũxũcèx nüxũ ya naěneë ya marü yucü”,
ñanagürü ga yema ore.

29 Rũ ñanagürügü ta ga Chaduchéugü: –Nayexma ga 7 ga nügüeneë. Rũ naxãmèx ga guma yacü, natürü tauta naxãxãcüyane nayu.

30 –Rũ yexguma naĩ ga naěneë nüxĩ ngĩmaã naxãmèx ga yema ngecü. Rũ guma rü ta nayu, rü nangexacü.

31 –Rũ yexguma rü naĩ ga naěneë nüxĩ ngĩmaã naxãmèx. Rũ yemaãcü gucüma ga guma 7 ga nügüeneëgü rü ngĩmaã naxãmèx ga yema nge. Rũ gucüma nayue tauta naxãxãcüyane.

32 –Rũ ngĩma rü ta düxwa iyu ga yema nge.

33 Rũ ngěxguma yuexũ wena maxěgu, ¿rü ngecürüücü naxmèx tá iyixĩ i ngěma nge? Yerü yexguma namaxěgu rü gucüma ga guma 7 ga nügüeneë ngĩmaã naxãmèx –ñanagürügü.

34 Rũ yexguma ga Ngechuchu rü nanangãxũ rü ñanagürü: –Ñoma i nañewa rü yatügü rü nixãmèxgü rü ngexügü rü nixãtegü.

35 –Natürü ngěma duũxügü i Tupanapěxewa mexũ na wena namaxěxũ na daxũguxũ i nañewa naxĩxũcèx rü ngěma rü tãütáma nixãmèxgü rü éxna nixãtegü.

36 –Erü ngěma rü tagutáma nayue. Rũ daxũcũãx i Tupanaärü orearü ngeruügürüũ tá nixĩgü.

Rü aixcüma Tupanaxãcügü nixĩgü erü yuwa ínarüdagü.

³⁷ –Rü yema ore ga naĩxãcü ga iyauratanücüxũnechigawa, rü Moĩché tũxũ nüxũ nacuèxẽẽ rü yuexũ rü tá wena na namaxẽxũ. Erü yema orewa, rü ñanagürü ga Cori ga Tupana:

“Choma nixĩ i Abráũãrũ Tupana, rü Ichaáarũ Tupana, rü Acobuarũ Tupana”, ñanagürü.

³⁸ –Rü ngẽmawa nüxũ tacuèx rü woo ñoma i naãnewa nayuegu i duũxũgü, natürü Tupanacèx rü guxũguma namaxẽ –ñanagürü.

³⁹ Rü yexguma ga ñuxre ga ngúexẽẽruũgü ga Moĩchéarũ mugüwa nguxẽẽtaegũxũ rü ñanagürügü: –Aixcüma meãma nüxũ quixu, Pa Ngúexẽẽruũx –ñanagürügü.

⁴⁰ Rü yemawena rü marü namuũẽ ga tacüchigacèx Ngechuchuna na nacagüexũ.

¿Texé nane nixĩ ya Cristu?

(Mt 22.41-46; Mr 12.35-37)

⁴¹ Rü Ngechuchu rü ñanagürü nüxũ: –¿Tũxcüũ duũxũgü nüxũ nixugüe rü Cristu rü nuxcümaũcü ga ãẽxgacü ga Dabítaa nixĩ?

⁴²⁻⁴³ –Yerü Dabítama ñaããcü nanaxümatü ga Wiyaegüarü poperawa:

“Tupana rü chorü Cori ya Cristuxũ ñanagürü: ‘¡Nuã chorü tũgü necüwawa rüto, ñuxmatáta cuxmẽxwa chanangẽxmagüxẽẽ i curü uwanügü na namaã icucuáxũcèx!’ ”

ñaããcü nanaxümatü.

44 Rū ñanagürü ga Ngechuchu: —¿Ñuxücürüwa i Dabítaa yíixü ya Cristu ega nūmatama ga Dabí rü norü Corimaã naxuãgu? —ñanagürü.

Ngechuchu rü nüxü nixu na tama nameãrü maxüãxgüxü ga yema ngúexëeruüğü ga Moïchëarü mugüwa nguxëëtaegüxü

(Mt 23.1-36; Mr 12.38-40; Lc 11.37-54)

45 Rū guxüma ga duüxüğü rü yéma inarüxĩnüë ga yexguma Ngechuchu norü ngúexüğüxü ñaxgu:

46 —¡Pexuãëğü naxcèx i ngëma ngúexëeruüğü i Moïchëarü mugüwa nguxëëtaegüxü! Erü nūmagü rü norü me nixĩ i mexü i naxchirumaã na naxĩãneãxü. Rū ítamüwa nanaxwèxegü na duüxüğü meã nüxü rümoxëgüxü. Rū ngutaquëxepataüğüwa rü norü me nixĩ i ãëxgacügümèxwëxewa na natogüxü. Rū õna i taxüwa rü ngëma õnaãrü yoraxütawa ügüxü i nachicacèx nadaugü.

47 —Rü tüxü nawomüxëëgüãcüma tüxna nana-puxü ya tümapatagü ya yixema yutegüxe. Rū ñüxüchi nanamëxëë i norü yumüxëgü na duüxüğü nagu rüxĩnüëxüçèx na aixcüma mexüğü yíigüxü. Natürü nūmagü tá nixĩ i yexeraãcü napoxcuexü — ñanagürü.

21

Yutecüarü ãmarechiga

(Mr 12.41-44)

1 Rū yexguma tupauca ga taxünewa nayexmagu ga Ngechuchu, rü yéma nüxü nadau ga ñuxãcü duüxüğü ga idĩëruãxü Tupanana ngĩxü

na naxãgũxũ ga norũ dĩẽru ga tupaucaarũ dĩẽruchiũwa.

² Rũ ngĩxũ nadau ta ga wũxi ga ngecũ ga yutecũ ga ngearũ dĩẽruãxcũ ga tupaucaarũ dĩẽruchiũgu taxretachinũ ga íraxũchicũ ga dĩẽru ngĩxũ ixũcuchicũ.

³ Rũ ñanagũrũ ga Ngechuchu: –Aixcũma pe-maã nũxũ chixu rũ ñaã ngecũ i yutecũ i ngearũ dĩẽruãxcũ rũ guxũ i togũ i dĩẽru ngĩxũ ixãgũxũãrũ yexera ngĩxũ ixã.

⁴ –Erũ guxũma i togũ rũ ngĩxũ inaxã i ngema nũxũ íyaxũgũcũ. Natũrũ ngĩma ngĩxũ natauxyane ngĩxũ ixã i guxcũma i ngĩxũ ngexmaxcũ i ngĩrũ õnatanũ –ñanagũrũ.

Ngechuchu nanaxunagũ na tupauca ya taxũnegu tá napogũexũ

(Mt 24.1-2; Mr 13.1-2)

⁵ Rũ ñuxre ga norũ ngũexũgũ rũ nidexagũ nachiga ga tupauca ga taxũne ga ñuxãcũ na namexẽchixũ ga naxtapũx ga nutanaxcèxgũ, rũ na namexẽchixũ ga guxũma ga guma tupaucaarũ yemaxũgũ ga duũxũgũ nũxna ãmarexũ. Rũ yexguma ga Ngechuchu rũ ñanagũrũ:

⁶ –Rũ nawa tá nangu i ngunexũgũ i guxũnetama ya daa tupauca ya nũxũ pedauxũne, rũ tá nagu napogũe. Rũ naxtapũxarũ nutagũ rũ taxucũtãma nũgũetũ naxũxũra, rũ bai ya wũxi –ñanagũrũ.

Cuèxruũgũ i tá nũxũ idauxũ naxũpa na nagũxũ i naãne

(Mt 24.3-28; Mr 13.3-23)

⁷ Rũ yexguma ga norũ ngũexũgũ rũ Ngechuchuna nacagũ, rũ ñanagũrũgũ: –Pa

Ngúexēēruūx, ¿ñuxgu tá nixĩ i nangupetūxū i ngēma nūxū quixuxū? ¿Rū tacūwa tá nūxū tacuèx na nangupetūxū tá i ngēma? —ñanagürügü.

⁸ Rū Ngechuchu rü ñanagürü: —¡Pexuãēgü tá na taxuūma pexū womūxēēxūcèx! Erü muxūchixū tá chaugu nügü nicuxgü rü tá ínangugü rü ñanagürügü tá:

“Choma nixĩ i Cristu, rü paxa tá nagux i nañe”, ñanagürügü tá pexū. ¡Natürü tãütama nūxū peyaxōgü!

⁹ —Rü ngēxguma tá nūxū pexĩnūēgu na nügü nadèixū i wūxi i nachiūñane to i nachiūñanemañ, rü ēxna nūxū pexĩnūēgu na wūxi i nachiūñanewatama rü duūxūgü rü norü ãēxgacūmañ nügü nadèixū, ¡rū tãütama pebaixãchiãēgü! Erü ngēmaãcü tá nangupetü i noxrix. Natürü tãütama nañeärü gux nixĩ i ngēma.

¹⁰ —Erü wūxi i ãēxgacüarü churaragü rü to i ãēxgacüarü churaragümañ tá nügü nadai. Rü wūxi i nachiūñane rü to i nachiūñanemañ tá nügü nadai.

¹¹ —Rü nümaxū i nachiūñanegüwa rü poraãcü tá naxĩãxãchiane, rü poraãcü tá nangux i taiya, rü tá nataxüchi i daaweane. Rü duūxūgü tá nūxū nadaugü i daxūwa i tacü i namañ nabaixãchiexū, rü taxū i cuèxruūgü.

¹² —Natürü naxūpa i guxūma i ngēma rü duūxūgü tá pexū ínayauxū, rü tá pewe ningēxütanü. Rü ngutaquēxepataūgüwa tá pexū nagagü na ngema pexna nacagūxūcèx, rü tá pexū napoxcue. Rü nachiūñanegüarü ãēxgacügüpēxewa tá pexū nagagü, naxcèx na chorü duūxūgü pixĩgüxū.

13 —Rü ngẽmaãcü tá pexũ natauxcha na ãẽxgacügümaã nüxũ pixuxũ i chauchiga.

14 —Rü ngẽxguma tá ngema pexũ nagagügu, jrũ táxũ i pexoegaãẽgũxũ naxcèx na tacümaã tá penangãxũxũ na pegüëtüwa pechogũxũcèx!

15 —Erü choma tá pexũ charüngũxẽẽ na nüxũ pecuáxũcèx na tacümaã penangãxũxũ i perü uwanügü. Rü nümagü rü tãütáma nüxũ nacuèxgü na tacümaã pexũ nangãxũgũxũ i ngẽxguma.

16 —Natürü pema rü woo penatügü, rü peegü, rü peeneëgü, rü peeyèxgü, rü petanũxũgü, rü pemücügü rü tá napeechitaegü na purichíagũxũtawa pexũ íyaxuaxũgũxũ. Rü purichíagü rü tá pexũ nadai i ñuxre i pemax.

17 —Rü guxũ i naãnewa rü duũxũgü tá pexchi naxaie, erü choxũ peyaxõgü rü chorü duũxũgü pixĩgü.

18 —Natürü woo tacü pexũ üpetügu rü Tupanamẽxëwa tá pengëxmagü, rü nüma tá pexũ ínapoxũ rü bai i wüxi i peyae tá inayarütaxu.

19 —Rü ngẽxguma aixcüma peyaxõgüamagu rü tama choxũ ípetèxgu, rü tá penayauxgü i maxũ i taguma gúxũ.

20 —Rü ngẽxguma nüxũ pedèuxgu na perü uwanügüarü churaragü Yerucharéũxũ íchomaẽguãchixũ, rü ngẽmawa tá nüxũ pecuèx na paxa tá nagu napogüexũ ya yima ñãne.

21 —Rü yíxema Yudéaanewa ngẽxmagüxe rü name nixĩ i mèxpúneãnewa tabuxmü. Rü yíxema Yerucharéũwa ngẽxmagüxe rü tanaxwèxe na paxa ítachoxũxũ. Rü yíxema tümaãnewa ngẽxmagüxe rü tama name na ñãnecèx tawoeguxũ.

22 —Erü ngēma ngunexügügu tá ínangu i Tupanaärü poxcu. Rū ngēmaäcü tá nayanguxēē i guxūma i ngēma norü ore i ümatüxüwa nüxü yaxuxü.

23 —Rū ngēma ngunexügügu rü tá poraäcü tüxü naguxcha ya yíxema ngexegü ya iitacharaügüxe rü yíxema imaixäcügüxe. Erü tá nangēxma i taxü i ngúxü, rü Tupana rü poraäcü tá nanapoxcue i ngēma duüxügü.

24 —Rū ñuxre, rü tá norü uwanügü taramaã nanadai. Rū togü, rü tá ínanayauxü na to i nachiuñanewa nagagüãxücèx. Rū ñuxüchi i ngēma norü uwanügü rü tá nagu napogüe ya yima ñane ya Yerucharéü. Rū ngēmaäcü tá nangupetü ñuxmatáta nawa nangu na Tupana ínamuxüxü i ngēma.

Tupana Nanearü taeguchiga

(Mt 24.29-35, 42-44; Mr 13.24-37)

25 —Rū ngexguma rü tá nangox i cuèxruxügü. Rü üèxcü rü tauemacü rü woramacurigü rü tá nixígachitanü i nachicawa.. Rü guxü i nachiuñanegüwa rü duüxügü rü tá nanaxixächiãētanü rü tá nabaixächiãēgü namaã na poraäcü naxãügaächixü i taxü i taxtü rü norü yuapegü.

26 —Rü duüxügü rü norü muümaã tá inayayiãxē i ngēxguma nüxü nadaugu i ngēma üpetüchaüxü i ñoma i nañnewa. Erü woo guxūma i tacü i daxüwa nüxü idauxü rü tá naxiãxächitanü rü tá nu ne nanaxĩmare.

27 —Rü ngēxguma rü guxü i duüxügü i ñoma i nañnecüãx rü tá choxü nadaugü i ngēxguma wüxi

i caixanexũgu ícharũxĩxgu rü núma chaxũxgu namaã i chorü pora rü üüne.

28 –Rü ngëxguma inaxügũgu na naxüpetũxũ i ngëma pemaã nüxũ chixuxũ, rü name nixĩ na petaãëgũxũ rü meã pedaunagũxũ, erü paxa tá íchangu na pexũ íchanguxũxëxũcèx –ñanagürü.

29 Rü yemawena rü wüxi ga ore ga cuèxruũxũ namaã nixu ga Ngechuchu, rü ñanagürü: –¡Düçèx penangugü i iguera, rü ëxna ngëxürüüxũmare i to i naĩgü!

30 –Rü ngëxguma nüxũ pedèuxgu na ngexwaca naxüátũxũ, rü ngëmawa nüxũ pecuèx na paxa tá taunecü na yĩxũ.

31 –Rü ngëxgumarũũ ta i ngëxguma nüxũ pedèuxgu na nangupetũxũ i ngëma pemaã nüxũ chixuxũ, rü ngëmawa tá nüxũ pecuèx na yimama yĩxũ ya Tupana na ãëxgacü yĩxũcèx.

32 –Aixcüma pemaã nüxũ chixu rü guxũma i ngëma nüxũ chixuxũ rü tá ningu naxüpa na nayuexũ i duũxügü i ñuxma maxëxũ.

33 –Daxũguxũ i naãne rü ñoma i naãne rü tá nagux. Natürü chorü ore rü tagutáma inayarüxo.

34 –¡Pexuãëgü na tama tacü rü chixexũgagu düxwa nüxũ perüxoexũ na peyaxõgũxũ! Rü ngëmacèx penaxwèxe na pegüna pedaugũxũ na tama pengãxëxũ rü ëxna ñoma i naãneärü ngúchaũguama na perüxĩnüëxũ. Erü ngürüãchi ngëmagu íperüxĩnüëyane tá pexũ íchayabaixgü.

35 –Rü ñoma wüxi ya yüta ya ngürüãchi tacü iyaxúnerüũ tá nixĩ naxcèx i guxũma i duũxügü i ñoma i naãnecũãx i ngëxguma wenaxärü núma chaxũxgu.

³⁶ –Rü ngẽmacèx name nixĩ i pegü ípemexẽẽgü. jRü guxüguma peyumüxëgü na ngẽmaãcü tama pexü naxüpetüxücèx i ngẽma ãücümaxügü, rü aixcüma pimexücèx i ngëxguma chopëxewa pengugügu! –ñanagürü ga Ngechuchu.

³⁷ Rü guxü ga ngunexügügu rü tupauca ga taxünewa nayexma ga Ngechuchu, rü duüxügüxü nangúexëë. Rü chütacü rü guma Mëxpüne ga Oríbunecügu äeganegu nayapeexü.

³⁸ Rü guxüma ga duüxügü rü pëxmamaxüchi tupauca ga taxünewa nangugüxü na Ngechuchuxü naxĩnüëxücèx.

22

Äëxgacügü naxcèx nadaugü na ñuxãcü Ngechuchuxü yayauxgüxü

(Mt 26.1-5, 14-16; Mr 14.1-2, 10-11; Cu 11.45-53)

¹ Rü marü ningaica ga Yudiügüarü peta ga Üpetüchiga ga nagu nangõxgüãxü ga pãü ga ngearü puxëëruüãxü.

² Rü ga paigüarü äëxgacügü rü ngúexëëruügü ga Moïchëarü mugüwa nguxëëtaegüxü rü naxcèx nadaugü ga ñuxãcü duüxügüechita Ngechuchuxü na yamëxgüxü, yerü duüxügüxü namuëë.

³ Rü yexguma ga Chataná rü Yuda ga Icaríutegu nangaxi. Rü nüma ga Yuda rü yema 12 ga Ngechuchuarü ngúexügü ga imugüxütanüxüchirëx nixĩ.

⁴ Rü nüma ga Yuda rü ínayadau natanüwa ga paigüarü äëxgacügü rü tupauca ga taxüneärü purichíagüarü äëxgacügü. Rü namaã nüxü nixu

ga ñuxãcü na natauxchaxũ ga Ngechuchuxũ na yayauxgũxũcèx.

⁵ Rũ nũmagũ ga yema ãëxgacũgũ rũ nataãëgũ. Rũ dĩëru Yudana ngĩxũ naxuaxũgũ.

⁶ Rũ Yuda rũ ngixũ nayaxu ga yema dĩëru. Rũ inanaxũgũ ga naxcèx na nadauxũ ga ñuxãcü duũxũgũechita Ngechuchuxũ na yayauxgũxũ ga ãëxgacũgũ.

Ûpetũchigaarũ õnawa nachibũ ga Cori

(Mt 26.17-29; Mr 14.12-25; Cu 13.21-30; 1 Co 11.23-26)

⁷ Rũ nawa nangu ga yema petaarũ ngunexũ ga nagu nangõxgũãxũ ga pãũ ga ngearũ puxëëruũãxũ. Rũ yema nixĩ ga ngunexũ ga nagu carneruxacũ yamèxgũxũ naxcèx ga Ûpetũchigaarũ peta.

⁸ Rũ Ngechuchu nanamu ga Pedru rũ Cuáũ, rũ ñanagũrũ nüxũ: —¡Peyamexëëx i tórũ õna i Ûpetũchigacèx! —ñanagũrũ.

⁹ Rũ nũmagũ Ngechuchuxũ nangãxũgũ, rũ ñanagũrũgũ: —¡Ngextá nixĩ i cunaxwèxexũ na tanamexëëxũ? —ñanagũrũgũ.

¹⁰ Rũ Ngechuchu nanangãxũ, rũ ñanagũrũ: — Ngëxguma Yerucharéũwa pengugũgu rũ ngëxma tá nüxũ peyangau i wüxi ya yatũ i wüxi i tũxũ i dexámaã ããcuxcü ngĩxũ ingexũ. ¡Rũ nawe perũxĩ ñuxmatáta napatawa pengugũ!

¹¹ —¡Rũ yima ĩpata ya nagu yaxücune ya yima yatũ, rũ yima ĩãrũ yoramaã nüxũ pixu rũ ñapegũgũ nüxũ:

“Torũ ngüexëëruũ rũ nüxũ nacuáxchaũ na ngëxũrũxũ yĩxũ i ngëma ucapu i norũ

ngúexügümaã tá nawa nachibüxü i Üpetüchigaarü ònacèx”, ñapegügü nüxü!

12 –Rü tá pexü nüxü nadauxêê i wüxi i ucapu i taxü i marü mexêexü i norü daxüchiüwa ngêxmaxü. ¡Rü ngêmawa tá penamexêê i ngêma òna i Üpetüchigacèx ixixü! –ñanagürü nüxü.

13 Rü yéma naxí ga nümagü rü nüxü inayan-gaugü ga guxüma yema Ngechuchu namaã nüxü ixuxürü. Rü yéma nanamexêêgü ga òna ga Üpetüchigacèx ixixü.

14 Rü yexguma nawa nanguxgu ga ora ga na nachibüexü, rü mechawa narüto ga Ngechuchu namaã ga norü ngúexügü.

15 Rü yexguma ga Ngechuchu rü ñanagürü: –Ñuxácü poraacü choxü nangúchaü na pemaã chachibüxü i ñaã Üpetüchigaarü ònawa naxüpa na chayuxü.

16 –Natürü pemaã nüxü chixu rü tãütáma wenaxärü Üpetüchigaarü ònawa chachibü, ñuxmatáta chowa yangu i ngêma Tupana naxwèxexü –ñanagürü.

17 Rü yexguma nanayaxu ga wüxi ga pochiyu ga binumaã ããcuxü. Rü Tupanana moxê naxãxíra, rü ñuxüchi ñanagürü nüxü ga norü ngúexügü: – ¡Peyaxaxü ya daa binu, rü pegümaã pengau!

18 –Erü pemaã nüxü chixu rü tagutáma wena chayaxaxü ya binu ñuxmatáta nawa nangu na pecaduarü útanücèx chayuxü na aixcüma pemaã inacuáxcèx ya Tupana –ñanagürü.

19 Rü nanayaxu ta ga pãü, rü Tupanana moxê naxcèx naxã. Rü ñuxüchi inanabücu, rü norü ngúexügüna nanaxã. Rü ñanagürü nüxü: –Ñaã pãü

rü chaxune i pexcèx yuxüchiga nixĩ. ¡Rü ñaãwena rü ñaãcü tá penaxü na choxna pecuèxãchiexüçèx! —ñanagürü.

20 Rü marü chibüwena rü to ga pochiyu ga binumaã ããcuxü norü ngúexüğüna naxã, rü ñanagürü: —Daa binu rü Tupanaãrü uneta i ngexwacaxüxüãrü cuèxruü nixĩ. Rü chaugü ya pexcèx ibacüwa Tupana pexü nüxü nadauxëẽ na aixcüma yĩxü i ngëma norü uneta.

21 —Natürü ngëma yatü i chauechita ãëxgacüğüna choxü muxchaüxü, rü nuã mechawa tamaã narüto i ñuxmax.

22 —Rü choma i Tupana Nane na duüxüxü chĩxü, rü Chaunatü ixunetaxürü tá chayü. Natürü wüxi i ngechaüxüchi tá nixĩ naxcèx i ngëma yatü i ãëxgacüğüna choxü muxü.

23 Rü yexguma ga norü ngúexüğü rü inanaxüğüe ga nüğüna na nacagüexü, rü ñanagürüğü: —¿Texé tá tixĩ ya yixema naëchita ãëxgacüğüna namuxë? —ñanagürüğü.

Norü ngúexüğü rü nüğüna nacagüe na texé tá tixĩxü ya guxãxü rüyexeraxe i natanüwa

24 Rü yexguma ga yema ngúexüğü rü nüğümaã niporagatanücüü nachiga na texé tá tiixü ya natanüwa guxããrü yexera ixixë.

25 Natürü ga Ngechuchu rü ñanagürü nüxü: —Ñoma i naãnewa rü guxü i nachiüãnegüarü ãëxgacüğü, rü poraãcü norü duüxüğüxü namugü. Rü ñuxüchi nüğü yaxugügu rü norü duüxüğüarü dauruü i mexüğü nixüğü.

26 —¡Natürü pema rü täütáma ngëxgumarüü pixüğü! Rü ngëxguma texé naxwèxegu na guxããrü

yexera tiixũ i petanũwa, rü name nixĩ na tũgũ ítarũxíraxũ i guxũma i tũmamũcũgũtanũwa. Rü texé naxwèxegu na peeru tiixũ i petanũwa, rü name nixĩ i noxri rü guxããrũ ngũxêẽruũ tixĩ.

27 –Rü ñoma i naãnewa rü corigũ rü mechawa narütogũ na nachibũexũcèx, rü norũ duũxũgũ nixĩ i ngẽma naxcèx õna ixũxũ rü nüxũ rüngũxêẽxũ. Natürũ tatanũwa rü tama ngẽmaãcü nixĩ, erũ choma i perũ cori na chiixũ rü perũ ngũxêẽruũ chixĩ.

28 –Rü pemagũ nixĩ ga guxũguma chauxũtawa peyexmagũxũ ga yexguma ngũxũ chingexgu.

29 –Rü ngẽmacèx i choma rü ãẽxgacũgũxũ pexũ chixĩgũxêẽ yema chaunatu ãẽxgacũxũ choxũ ingucuchixêẽxũrũ.

30 –Rü ngẽmaãcü ãẽxgacũ íchixĩxũwa rü chomaã tá pechibũe rü tá pexaxegũ. Rü ãẽxgacũchicawa tá perütogũ na norũ maxũcèx nüxna pecagũxũ i guxũma i Yudíugũ –ñanagürũ.

Ngechuchu nüxũ nixu na Pedru tá nügũ icíxũ na norũ ngũexũ yĩxũ

(Mt 26.31-35; Mr 14.27-31; Cu 13.36-38)

31 Rü Pedruxũ ñanagürũ ta ga Cori ga Ngechuchu: –Pa Pedrux, Chataná rü pexcèx ínaca na chixexũmaã poraãcü pexũ naxũxũcèx.

32 –Natürũ choma rü Chaunatũxũ cuxcèx chacèèxũ na taguma nüxũ curũxoxũcèx na cuyaxõxũ. Rü ngẽmacèx i cumax, Pa Pedru, rü ngẽxguma chauxcèx cutaeguxgu, rü chanaxwèxe i nüxũ curũngũxêẽ i cumũcũgũ na nümagũ rü yaxõgũechaãxũcèx –ñanagürũ.

³³ Rū ñanagürü ga Pedru: —Pa Corix, choma rü marü íchamemare na wüxigu cumaã na chapoxcuxü rü éxna wüxigu cumaã na chayuxü —ñanagürü.

³⁴ Natürü Ngechuchu rü ñanagürü nüxü: —Pa Pedrux, cumaã nüxü chixu rü ñomatama i chütaxügu naxüpa na otá icaxü, rü cuma rü tomaẽxpüxcüna tá nüxü quixu na tama choxü cucuáxü —ñanagürü.

Marü ningaica ga na guxchaxügu nüxü üpetüxü

³⁵ Rü yexguma ga Ngechuchu rü norü ngúexüguna naca, rü ñanagürü: —Yexguma pexü chimugügu ngearü chocaãxgüxemaã rü ngearü dïeruãxgüxemaã rü ngearü chapatuãxgüxemaã, ¿rü tacü pexü taxuxü ga yexguma? —ñanagürü. Rü nümagü nanangãxügu rü ñanagürügu: —Taxuüma —ñanagürügu.

³⁶ Rü yexguma norü ngúexügüxü ñanagürü ga Ngechuchu: —Natürü ñuxma rü texé ya petanüwa ya chocaãxë rü tanaxwëxe na ítayangexü i tümaärü choca rü tümaärü dïeruchixü rü ta. Rü ngëxguma texé ngearü taraãxgu rü tanaxwëxe i namaã tataxe i tümaärü gáuxüchiru na tümaärü poxüruü i taracèx tataxexüçèx.

³⁷ —Erü pemaã nüxü chixu rü chauchiga nixí i ngëma Tupanaärü ore i ümatüxü i ñaxü:

“Wüxi i máètaxürüü tá nanapoxcugü rü tá nayamèxgü”,

ñaxü. Erü guxüma i ngëma chauchiga ümatüxü i Tupanaärü ore i ümatüxüwa rü aixcüma ngëmaäcü tá ningü —ñanagürü.

³⁸ Rü yexguma ga norü ngúexügü rü ñanagürügu: —Pa Corix, nuã nangëxma i taxre i tara —ñanagürügu.

Rü nüma ga Ngechuchu rü nanangãxũ rü ñanagürü: —Marü ningu i ngẽma —ñanagürü.

*Ngechuchu rü Yechemaníwa nayayumüxê
(Mt 26.36-46; Mr 14.32-42)*

³⁹ Rü yexguma ga Ngechuchu rü ínaxũxũ ga guma ñãnewa. Rü Oríbunecüarü Mèxpúnëwa naxũ, yerü woetama nacüma nixĩ ga yéma na naxũxũxũ. Rü norü ngúexũgü rü ta nawe narüxĩ.

⁴⁰ Rü yexguma yema nachicawa nanguxgu, rü norü ngúexũgüxũ ñanagürü: —¡Tupanana naxcèx peça na pexũ nangüxêxücèx na tama Chatanáärü ügagu chixexũgu peyixücèx! —ñanagürü.

⁴¹ Rü yexguma ga Ngechuchu rü yéamaxüra 50 ga metruwa norü ngúexũgüna naxũ. Rü yexma nacaxãpüxü rü nayumüxê.

⁴² Rü ñanagürü: —Pa Chaunatüx, ngëxguma cuma cunaxwëxegu, ¡rü nüxna choxũ ínanguxuchixêê i ñãã ngúxũ i tá choxũ üpetüxũ! Natürü chanaxwèxe i cunaxü i curü ngúchaũ rü tama i choxrü — ñanagürü.

⁴³ Rü yexguma wüxi ga daxücũãx ga Tupanaärü orearü ngeruũ rü naxcèx nangox, rü nanapoxêê.

⁴⁴ Rü poraãcü nanaxixãchiãê ga Ngechuchu, rü yemacèx yexeraãcü nayumüxê. Rü yema na naxixãchiãêxümaã poraãcü nanaxaiyaãchi. Rü guma norü aiyacümaã nichuruxüne. Rü ñoma nagü waixüümüãnewa ichuruxürüũ nixĩ ga norü aiyacü.

⁴⁵ Rü yema ínayumüxêxüwa rü inachi ga Ngechuchu, rü norü ngúexũgütanüwa naxũ.

Rü nüxü inayangau ga na ínapeexü yerü norü ngechaümaã düxwa nayaxtae.

46 Rü yexguma ga Ngechuchu rü ñanagürü nüxü: —¿Tüxcüü ípepee? ¡Íperüdagü rü Tupanana naxcèx peça na pexü nangüxëëxücèx na tama Chatanáãrü ügagu chixexügu peyixücèx! —ñanagürü.

Ngechuchuxü niyauxgü

(Mt 26.47-56; Mr 14.43-50; Cu 18.2-11)

47 Rü yexguma íyadexayane ga Ngechuchu, rü yéma nangügü ga muxüma ga duüxügü. Rü Yuda ga Ngechuchuarü ngúexüchirëx ixixü nixí ga naxüpëxexü. Rü Ngechuchucèx nixü na nüxü nachúxácüma nüxü namoxëxücèx.

48 Rü Ngechuchu rü ñanagürü: —Pa Yudax, ¿tüxcüü wüxi i chúxumaã cuchauechitae? —ñanagürü.

49 Rü yema togü ga Ngechuchuarü ngúexügü ga naxütawa yexmagüxü, rü yexguma nüxü nadaugügu ga yema ngupetüxü rü ñanagürügü nüxü: —Pa Corix, ¿cunaxwëxexü na taramaã tanadèixü? —ñanagürügü.

50 Rü wüxi ga Ngechuchuarü ngúexü rü paigüarü ãëxgacüarü duüxüxü nanapixëë, rü ínanadae ga norü tügünechinü.

51 Natürü Ngechuchu rü ñanagürü: —¡Ngexrüma na pegü namaã pedèixü! —ñanagürü. Rü yexguma ga Ngechuchu rü yema yatü ga ídaechinüxüxü ningögü, rü nanamexëë.

52 Rü Ngechuchu namaã nidexa ga yema ãëxgacügü ga norü yauxwa yéma íxü. Rü yema ãëxgacügütanüwa nayexmagü ga paigüarü ãëxgacügü, rü tupauca ga taxüneãrü

purichíagüarü ãëxgacügü, rü Yudíugüarü ãëxgacügüerügü. Rü Ngechuchu rü ñanagürü nüxü: —¿Tüxcüü taragü rü naixmenèxãgümaã chauxcèx nuã pexĩ ñoma wüxi i ngítexáxü chiixürüü?

⁵³ —Rü guxü ga ngunexügu ga yexguma petanüwa chayexmagu ga tupauca ga taxünewa, rü tama choxü piyauxgü. Natürü marü nawa nangu na pexü natauxchaxü na choxü piyauxgüxü, erü ñoma nixĩ i ora na naporaxü i Chataná —ñanagürü.

Pedru inayacux na Ngechuchuxü nacuáxü

(Mt 26.57-58, 69-75; Mr 14.53-54, 66-72; Cu 18.12-18)

⁵⁴ Rü Ngechuchuxü niyauxgü, rü paigüarü ãëxgacüpatawa nanagagü. Rü Pedru rü nawe narüxü, natürü yaxüguma nüxü nixüchigü.

⁵⁵ Rü yéma paigüarü ãëxgacüpataèxtüarü ngãxüwa, rü purichíagü nanaxügü ga wüxi ga üxü. Rü nüxü ínachomaëguãchi. Rü Pedru rü ta yéma natanüwa narüto.

⁵⁶ Rü yexguma yéma üxücutüwa natoxgu ga Pedru, rü wüxi ga ngecü ga ãëxgacüarü duüxü nüxü idau. Rü meãma nüxü idawenü, rü ngígürügü: —Ñãã yatü rü Ngechuchutanüxü nixĩ —ngígürügü.

⁵⁷ Natürü Pedru rü tama nüxü nacuáxchañ ga yema ore, rü ñanagürü: —Pa Ngecüx, choma rü tama nüxü chacuèx ya yima Ngechuchu —ñanagürü.

⁵⁸ Natürü yixcamaxüra rü to ga duüxü Pedruxü nadau, rü ñanagürü nüxü: —Cuma rü ta

Ngechuchutanüxü quixĩ —ñanagürü. Natürü Pedru nanangãxü rü ñanagürü: —Tama nixĩ, Pa Yatüx. Tama natanüxü chixĩ —ñanagürü.

⁵⁹ Rû wüxi ga ora ngupetüguwena rü to ga duüxü rü nüxĩ ñanagürüama: —Aixcümãxüchi ñãã yatü rü Ngechuchutanüxü nixĩ, erü Gariréaanecüãx nixĩ —ñanagürü.

⁶⁰ Rû yexguma ga Pedru rü ñanagürü: —Pa Yatüx, tama nüxü chacuèx na tacüchigaxü quixuxü —ñanagürü. Rû yexgumatama Pedru ídexayane rü nica ga otá.

⁶¹ Rû yexguma ga Cori ga Ngechuchu rü Pedrucèx nügü ínidau. Rû nüma ga Pedru rü nüxna nacuèãchi ga yema ore ga Cori ga Ngechuchu namaã nüxü ixuxü ga ñaxü:

“Ñomatama i chütaxügu naxüpa na otá içaxü, rü tomaëxpüxcüna taxütáma cugü quixu na chorü duüxü quiixü”, ñaxü.

⁶² Rû yexguma ga Pedru rü ínaxüxü ga yéma. Rû porãcüxüchi naxaxu.

Ngechuchugu nidaux-cüraügü
(Mt 26.67-68; Mr 14.65)

⁶³ Rû yema yatügü ga Ngechuchuna daugüxü, rü nagu nidauxcüraügü, rü nüxna nanaçuaixcagüxü.

⁶⁴ Rû nayadüxétügü, rü nachiwegu nidagügü, rü ñanagürügü: —¡Nüxü nacuèx na texé cuxü na idagüxü! —ñanagürügü.

⁶⁵ Rû muxüma ga to ga ore ga chixexü namaã nixugüe.

Āēxgacügü ga tacügüpēxewa nanagagü ga Ngechuchu

(Mt 26.59-66; Mr 14.55-64; Cu 18.19-24)

⁶⁶ Rū yexguma yangunegu rū nangutaquēxegü ga Yudiugüarü āēxgacügüerugü, rū paigüarü āēxgacügü, rū ngüexēēruügü ga Moičéarü mugüwa nguxēētaegüxü. Rū ñuxüchi norü purichíagüxü namu na napēxewa Ngechuchuxü nagagüxcèx. Rū yéma Ngechuchuna nacagü, rū ñanagürügü:

⁶⁷ —Toma rū nüxü tacuáxchaü rū cuma quiixü i Cristu rū ēxna tama. ¡Tomaã cugü ixu! —ñanagürügü. Rū Ngechuchu nanangāxü rū ñanagürü: —Ngēxguma chi pemaã nüxü chixuxgu na choma chíxü i Cristu, rū tãu chima choxü peyaxögü.

⁶⁸ —Rū ngēxguma chi pexna chacaxgu na tacücèx choxna pecaxü, rū tãu chima choxü pengāxüga, rū tãu chima choxü pingēxgü.

⁶⁹ —Natürü ñuxmawena rū choma i Tupana Nane na duüxüxü chíxü rū Chaunatü ya Tupana ya poracüxütawa tá changēxma —ñanagürü.

⁷⁰ Rū yexguma guxüma ga yema āēxgacügü nüxna nacagü, rū ñanagürügü: —¿Éxna cuma quiixü i Tupana Nane? —ñanagürügü. Rū Ngechuchu nanangāxü, rū ñanagürü: —Ngü. Tupana Nane chixi ngēxgumarüü i pematama nüxü pixuxürüü —ñanagürü.

⁷¹ Rū yexguma nügümaã ñanagürügü ga yema āēxgacügü: —Ñuxma rū marü taxucèxma naxcèx tatau i to i duüxügü i nüxü ixuxü i ñaã yatüchiga. Erü yixematama marü nañxwatama nüxü taxĩnüē

i norü ore na ñuxũ ñaxũ –ñanagürügü.

23

Piratupëxewa nayexma ga Ngechuchu
(Mt 27.1-2,11-14; Mr 15.1-5; Cu 18.28-38)

¹ Rũ guxũma ga yema ãëxgacügü rü inachigü, rü ãëxgacü ga Dumacũãx ga Piratuxütawa Ngechuchuxũ nagagü.

² Rũ yéma Piratupëxewa inanaxügüe ga Ngechuchuxũ na yaxugüexũ. Rũ ñanagürügü: –Ñãã yatü rü nüxũ itayangaugü na cumaã nanuëxëãxũ i duũxügü. Rũ tomaã nüxũ nixu na tama namexũ na ãëxgacü ya Dumawa ngëxmacüaxũ na tanaxütanüxũ. Rũ nügü nixu na nüma na yiĩxũ i torü ãëxgacü i Cristu –ñanagürügü.

³ Rũ yexguma ga Piratu rü Ngechuchuna naca rü ñanagürü: –¿Cuma quiĩxũ i Yudíugüarü ãëxgacü? –ñanagürü. Rũ Ngechuchu nanangãxũ rü ñanagürü: –Ngëmaãcü, ngëma nüxũ quixuxũ chixĩ i chomax –ñanagürü.

⁴ Rũ yexguma ga Piratu rü ñanagürü nüxũ ga paigüarü ãëxgacügü rü togü ga duũxügü: –Chauxcèx rü taxuũma i chixexũ naxü i ñãã yatü –ñanagürü.

⁵ Natürü nümagü rü yexeraãcü Ngechuchuxũ nixugüeama, rü ñanagürügü: –Nüma rü guxũ i Yudéaanewa nanangüexëẽ i duũxügü na cuxchi naxaieüçèx. Rũ Gariréaanewa inanaxügü ga yemaãcü na duũxügüxũ nangüexëẽxũ, rü ngëmaãcü nanaxü ñuxmata nüma Yudéaanewa nangu –ñanagürügü.

Erodepëxewa nayexma ga Ngechuchu

⁶ Rū yexguma yemaxŭ naxĩnũgu ga Piratu, rŭ duũxũgũna naca rŭ ngoxi Gariréaanecũãx yixĩ ga Ngechuchu.

⁷ Rū yexguma Piratu nũxũ ĩnũgu ga aixcũma Gariréaanecũãx na yĩxũ ga Ngechuchu rŭ Gariréaaneãrũ ãẽxgacũ ga Erodexũtawa nanamu, yerũ Yerucharéũwa nayexma ga Erode ga yexguma.

⁸ Rū yexguma Ngechuchuxũ nadèuxgu ga Erode rŭ nataãẽxũchi. Yerũ nuxcũmama poraãcũ nũxũ nadauxchaũ, yerũ ũpaacũ nũxũ naxĩnũ ga nachiga. Rū ĩnananguxẽẽ na Ngechuchuxũ nadauxchaũxũ na napẽxewa naxũãxũ ga wũxi ga mexũ ga taxũ ga Tupanaãrũ poramaã naxũxũ.

⁹ Rū muẽxpũxcũna Ngechuchuna naca ga Erode. Natürũ Ngechuchu rŭ tama nanangãxũ.

¹⁰ Rū yéma nayexmagũ ta ga paigũarũ ãẽxgacũgũ rŭ ngũexẽẽruũgũ ga Moĩchearũ mugũwa nguxẽẽtaegũxũ. Rū nũmagũ rŭ poraãcũ Ngechuchuxũ ĩnaxuaxũgũ.

¹¹ Rū yexguma ga Erode rŭ norũ churaragũ rŭ poraãcũ chixri Ngechuchumaã nachopetũ. Rŭ nagu nidauxcũraũgũ. Rŭ ñuxũchi wũxi ga ãẽxgacũchirugu nayacũxẽẽgũ na yemaãcũ nũxũ nacugũexũcèx. Rŭ yemawena Piratuxũta we-naxãrũ Ngechuchuxũ namu ga Erode.

¹² Rŭ woo ũpaacũ ga Piratu rŭ Erodemaã nũgũchi na naxaixũ, natürũ yema ngunexũgu nixĩ ga nũgũmaã nangũxmũẽxũ.

Piratu rŭ Ngechuchumaã nanaxuegu na nayuxũcèx

(Mt 27.15-26; Mr 15.6-15; Cu 18.39-19.16)

13 Rŭ yexguma ga Piratu rŭ nanangutaquĕxexĕã ga paigŭarŭ ãĕxgacŭgŭ, rŭ togŭ ga Yudŭgŭarŭ ãĕxgacŭgŭ, rŭ guxŭma ga duŭxŭgŭ ga yĕma yexmagŭxŭ.

14 Rŭ Piratu ñanagŭrŭ nŭxŭ: –Pema nuã chauxcĕx penaga i ñaã yatŭ, rŭ nŭxŭ pixu na chomaã nanuĕxĕãxŭ i duŭxŭgŭ. Natŭrŭ pepĕxewa nŭxna chaca i ngĕmachiga rŭ ñuxma rŭ marŭ nŭxŭ pedau na taxuŭma nawa ichayangauxŭ i ngĕma chixexŭ i naxcĕx ípenaxuaxŭxŭ.

15 –Rŭ Erode rŭ ta taxuŭma nawa inayangau i ngĕma chixexŭ, rŭ ngĕmacĕx wenaxârŭ taxcĕx nanamuĕgu. Rŭ dŭcax, taxuŭma i chixexŭ naxŭ na ngĕmagagu nayuxĕcĕx.

16 –Rŭ ngĕmacĕx chorŭ churaragŭxŭ tá chamu na naçuaixgŭãxĕcĕx, rŭ ñuxŭchi tá chayangĕx –ñanagŭrŭ.

17 Rŭ nŭma ga Piratu rŭ guxŭguma ga yexguma yema petawa nanguuŭxgu rŭ duŭxŭgŭxŭ nataãxĕãchaŭ namaã ga na yangĕãxŭ ga wŭxi ga yatŭ ga poxcuxŭ.

18 Natŭrŭ guxŭma ga yema duŭxŭgŭ rŭ wŭxigu inanaxŭgŭe ga aita na naxŭexŭ. Rŭ ñanagŭrŭgŭ: – ¡Napoxcu i ngĕma Ngechuchu! ¡Rŭ Barabáxŭ waxi ínanguxuchixĕã! –ñanagŭrŭgŭ.

19 Rŭ yema Barabá rŭ napoxcu yerŭ ŭpaacŭ Yerucharéŭwa ãĕxgacŭmaã nananuĕxĕã ga duŭxŭgŭ, rŭ ñuxŭchi namáĕta.

20 Natŭrŭ ga Piratu rŭ wenaxârŭ duŭxŭgŭmaã nidexa, yerŭ nŭma rŭ Ngechuchuxŭ ningĕxchaŭ.

21 Natŭrŭ ga duŭxŭgŭ rŭ yexeraãcŭ aita naxŭe

rü ñanagürügü: —¡Curuchawa yapota! ¡Curuchawa yapota! —ñanagürügü.

²² Rü Piratu norü tomaẽxpüxcüna duũxügümaã nidexa, rü ñanagürü: —Düçèx, çtacü rü chixexũ êxna naxü? Choma rü taxuũma i chixexũxü nawa ichayangau na ngẽmacèx chanayuxêẽxũ. Rü chorü churaragüxũ tá chamu na naçuaixgüãxüçèx, rü ñuxũchi tá chayangẽx —ñanagürü.

²³ Natürü nümagü ga duũxügü rü yexeraãcü aita naxüeama, rü naxçèx ínacagü na curuchawa yapotaãxüçèx. Rü yema na nayexeragüamaxü ga yema duũxügü rü düxwa ga Piratu rü duũxügüga naxĩnü.

²⁴ Rü nüma ga Piratu rü norü churaragüxũ namu na naxügüãxüçèx ga yema duũxügü naxwèxegüxũ.

²⁵ Rü Barabáxũ ningẽx, yerü yema nixĩ ga duũxügü naxçèx ícagüxũ. Rü yema Barabá nixĩ ga poxcuxũ naxçèx na duũxügüxũ ãẽxgacümaã nanuẽxêẽxũ rü namáẽtaxũ. Rü yexguma ga Piratu rü duũxügüna Ngechuchuxũ namu na namaã naxügüãxüçèx ga yema nümagü nanaxwèxegüxũ.

*Ngechuchuxũ curuchawa nipotagü
(Mt 27.32-44; Mr 15.21-32; Cu 19.17-27)*

²⁶ Rü yema duũxügü rü Ngechuchuxũ nigagü na curuchawa yanapotagüãxüçèx. Rü yexguma Ngechuchuxũ yagagüyane, rü yexma namagu nüxũ nangaugü ga wüxi ga yatü ga Chirenecũãx ga naãnewa ne ücü. Rü Chimáũ nixĩ ga naega. Rü Chimáũxü niyauxgü ga duũxügü, rü naãtũgu ngĩxũ naxünagügü ga curucha na Ngechuchuwe ngĩxũ nangexüçèx.

27 Rū muxūma ga duūxūgū rü nawe narūxī. Rū yema duūxūgūtanūwa nayexmagū ga muxūma ga ngexūgū ga auxexū rü aita üexū, yerü Ngechuchucèx nangechaūgū.

28 Natürü ga Ngechuchu rü yema ngexūgūxū nadawenü, rü ñanagürü nüxū: —Pa Ngeçügūx, Pa Yerucharéüçüāx jtāxū i chauxcèx pexauxexū, natürü pegüçextama pexauxe rü pexacügüçèx!

29 —Erü nawa tá nangu i ngunexūgū i nagu ñagūxū tá i duūxūgū:

“Tataāēgū ya yīxema ngeāxta ya taxuacūma āxāçügūxe, rü taguma tacharaūgūxe, rü taguma maīxāçügūxe, erü taxucatáma tūmaxāçügüçèx tax-auxe”, ñagūxū.

30 —Rü ngēxguma i duūxūgū rü tá mèxpúnegūxū nacèèxūgū rü ñanagürügū tá:

“¡Toétügu rübuemü!” ñanagürügū tá. Rū tá ngüchitaerugūxūxū nacèèxūgū, rü ñanagürügū tá:

“¡Toxū idüxétügü!” ñanagürügū tá.

31 —¿Erü ñuxācū tá namaā nachopetü i ngēma duūxūgū i aixcūma chixexū ügūxū, ega ñāñ chixexū chomaā naxügügu na woo taxuūma i chixexū chaxüchiréxū? —ñanagürü ga Ngechuchu.

32 Rū yéma nanagagū ta ga taxre ga máētagūxū na Ngechuchurūü curuchawa yanapotagūāxūçèx.

33 Rū yexguma nawa nangugügu ga yema nachica ga Duūxēēruchinèxāgu āegaxū, rü yéma curuchawa Ngechuchuxū nipotagū. Rū yema taxre ga máētagūxū rü ta Ngechuchurūü curuchawa nipotagū, wüxi ga norü tügünecüwawa rü to ga norü foxwecüwawa.

34 Rū yexguma Ngechuchuxŭ curuchawa íyapotagüyane, rü ñanagürü ga Ngechuchu: —Pa Chaunatŭx, ¡nŭxŭ nangechaŭ i ñaã duŭxŭgü, erü tama nŭxŭ nacuèxgü na tacü rü chixexŭ naxüexŭ! —ñanagürü. Rū yema churaragü rü nanade ga Ngechuchuchiru. Rū ñŭxŭchi wŭxi ga dĭëru ngĭxŭ nañanagügü na yemawa nŭxŭ nacuèxgŭxŭcèx na texéarü tá yĭxŭ ga yema Ngechuchuchiru.

35 Rū duŭxŭgü rü yéma inarüdaunü. Natürü yema Yudíugüarü ãëxgacügü rü Ngechuchuxŭ nacugüe, rü ñanagürügü: —Nüma rü togŭxŭ namaxëë. ¡Ĕcŭ, ñŭxma rü nügütama namaxëë ega aixcŭma Cristu ya Tupana nŭxŭ unetacü yixĭgu! —ñanagürügü.

36 Rū yema churaragü rü ta Ngechuchuxŭ nacugüe. Rū naxŭtawa naxĭ, rü nŭxna nanaxã ga binu ga ŭxchiücŭ.

37 Rū ñanagürügü nŭxŭ: —Ega Yudíugüarü ãëxgacü ya tacü quixĭgu, ¡rŭ cugütama rŭngŭxëë i ñŭxmax, na ícunguxuchixŭcèx! —ñanagürügü.

38 Rū norü curuchatapëxewa nipota ga wŭxi ga mürapewaxacü ga äegatachinŭxŭ ga Griégügŭgawa rü Dumacŭãxgŭgawa rü Yudíugŭgawa ũmatŭxŭ ga ñaxŭ: —Daa nixĭ ya Yudíugüarü Äëxgacü ya Tacŭxŭchi —ñaxŭ.

39 Rū wŭxi ga yema máëtaxŭ ga naxrŭŭ curuchawa ipotaxŭ rü Ngechuchumaã naguxchiga, rü ñanagürü: —Ega aixcŭma Cristu quixĭgu, ¡rŭ cugütama rŭngŭxëë na ícunguxuchixŭcèx, rü toxŭ rü ta rŭngŭxëë na ítangŭxŭcèx! —ñanagürü.

40 Natürü ga yema to ga máëtaxŭ rü namücŭxŭ ínangaxŭchiana, rü ñanagürü nŭxŭ: —Cuma rü

naxrũ ũ na curuchawa quipotachiréxũ, ¿rũ ngẽxguma rũ ta tama Tupanaxũ cumuũxũ?

41 –Yixema rũ name nixĩ na ipoxcuexũ erũ tagagutama nixĩ i ngúxũ ingegũxũ erũ ngẽma nixĩ i tórũ natanũ naxcèx ga yema chixexũ ga ixügũxũ. Natürũ daa yatũ rũ taxuũma i chixexũ naxũ – ñanagürũ.

42 Rũ yexguma ga yema máëtaxũ rũ ñanagürũ: –Pa Ngechuchux, ¡choxna nacuëxãchi i ngẽxguma wenaxãrũ núma cuxũxgu rũ ãëxgacũxũ ícunguxgul –ñanagürũ.

43 Rũ Ngechuchu nanangãxũ rũ ñanagürũ: – Aixcũma cumaã nüxũ chixu rũ ñomatátama i ngunexũgu chomaã cungëxma i mexëchixũ i naãnewa –ñanagürũ.

Nayu ga Ngechuchu

(Mt 27.45-56; Mr 15.33-41; Cu 19.28-30)

44 Rũ yexguma tocuchiwa nanguxgu rũ guxũwama naxëãne ñuxmata tomaëxpũxaru orawa nangu ga yáuanecũ.

45 Rũ ga üèxcũ rũ nixo. Rũ tupauca ga taxũneãrũ tüyemachiũxũ rũ ngãxũgu narũgaute.

46 Rũ yexguma ga Ngechuchu rũ poraãcũ aita naxũ rũ ñanagürũ: –Pa Chaunatũx, cuxmëxwa chanangëx i chauãë –ñanagürũ. Rũ yema ñaxguwena rũ nayu.

47 Rũ yexguma yema churaragüaru ãëxgacũ ga Dumacũãx nüxũ dëuxgu ga yema ngupetũxũ, rũ Tupanaxũ nicuëxũũ, rũ ñanagürũ: –Aixcũma ñaã yatũ rũ taxuũma i chixexũ naxũ –ñanagürũ.

48 Rũ guxũma ga yema togũ ga duũxũgũ ga yéma yexmagũxũ rũ nüxũ daugũxũ ga yema ngu-

petüxü, rü poraãcü nangechaüğüãcüma napatacèx nawoegu.

⁴⁹ Natürü guxüma ga yema duüxüğü ga aixcüma Ngechuchuxü cuèxgüxü rü yaxüwa- tama nüxü narüdaunü ga yema ngupetüxü. Rü yema duüxügütanüwa ta iyexmagü ga yema ngecügü ga Ngechuchuwe rüxücü ga yexguma Gariréaanewa ne naxüxgu.

*Ngechuchu rü naxmaügu nayanaxücuchigü
(Mt 27.57-61; Mr 15.42-47; Cu 19.38-42)*

⁵⁰ Rü nayexma ga wüxi ga yatü ga Yudéaanewa yexmane ga ñãne ga Arimatéacüãx, rü Yúche nixi ga naega. Rü nüma rü Yudiügarü ãëxgacügütanüwa naxü, natürü namecüma rü meã namaxü.

⁵¹ Rü nüma rü poraãcü ínananguxêê na ínanguxü ga Tupana na yéma ãëxgacü yixücèx. Rü yemacèx tama norü me nixi ga yema Ngechuchumaã naxügüxü ga yema togü ga namücügü ga ãëxgacügü.

⁵² Rü nüma ga Yúche rü Piratuxütawa naxü, rü Ngechuchuxü necèx ínayaca.

⁵³ Rü curuchawa nayayaxu ga Ngechuchuxüne, rü wüxi ga düxruümaã nananuque. Rü wüxi ga naxmaü ga nutaarü mëxpüxüwa yacaxmaügüxügu nayanaxücuchi. Rü yema naxmaü rü nayexwacaxü, rü taguma texéxü nagu yaxücuchigüxü nixi.

⁵⁴ Rü yema nixi ga ngunexü ga nagu Yudiügü nügü imexêégüxü naxcèx ga ngüxchigaarü ngunexü. Rü marü ningóonechaü ga yema ngüxchigaarü ngunexü.

⁵⁵ Rū yema ngecügü ga Ngechuchumaã Gariréaanewa ne ĩcū, rū Ngechuchuxŭ íyaxücuchigüxŭwa íyadaugü. Rū nüxŭ idaugü ga ñuxâcū na íyaxücuchigüãxŭ ga naxŭne.

⁵⁶ Rū yexguma ngĩpatawa nangugügu, rū inamexēēgü ga pumara rū chixŭ. Rū irüngŭgü ga ngŭxchigaarü ngunexügu, yerü yema nixí ga Tupanaärü mu.

24

Yuwa ínariüda ga Ngechuchu (Mt 28.1-10; Mr 16.1-8; Cu 20.1-10)

¹ Rū pèxmamaxŭchi ga yŭxŭarü ngunexügu, rū yema ngecügü rū wenaxärü naxmaŭwa íyadaugü. Rū yéma inangegü ga yema pumara ga yamexēēgŭxŭ. Rū naĭgü ga ngecügü rū ta ngĩxŭ íyaxümücügü.

² Rū yexguma yéma nangugügu, rū nüxŭ iiyangaugü ga marü na ínaxügachixŭ ga guma nuta ga naxmaŭärü ngŭxtaŭxŭ.

³ Rū yexma nagu ichocu, natürü taxuŭma idaugü ga naxŭne ga Cori ga Ngechuchu.

⁴ Rū yema ngecügü rū poraãcū ĩbaixãchiãēgü, rū tama nüxŭ icuèxgüéga ga tacü na naxügŭxŭ. Rū ngürüãchi nüxŭ idaugü ga taxre ga yatügü ga ngĩxŭtagu chigŭxŭ ga poraãcū iyaurachirutanücüxŭ.

⁵ Rū yema ngecügü rū iyarümaxãchierügü, yerü poraãcū imuŭē. Rū yemacèx ga yema yatügü rū ñanagürügü ngĩxŭ: —¿Tŭxcüŭ nuxã yuetamaŭgu naxcèx peyadau ya yima maxŭcü?

⁶ –Nataxuma i nuã ya Ngechuchu, erü marü wena namaxũ. ¡Rü nüxna pecuèxãchie ga yema ore ga pemaã nüxũ yaxuxũ ga yexguma Gariréanewa nayexmagu!

⁷ –Yerü pemaã nüxũ nixu ga ñuxãcü pecaduãxgüxũ tá na yayauxgüxũ, rü curuchawa na yapotagüãxũ, rü ñuxãcü tomaẽxpüx i ngunexügu tá wena na namaxũxũ –ñanagürügü ga yema yatügü.

⁸ Rü yexguma ga yema ngecügü rü nüxna icuèxãchie ga yema Ngechucharü ore.

⁹ Rü nüxna iwoegu ga yema naxmaũ. Rü yema 11 ga Ngechucharü ngúexügümaã nüxũ iyarüxugüe ga guxüma ga yema nüxũ nadaugüxũ. Rü guxüma ga togü ga yaxögüxũ ga yema yexmagüxümaã rü ta nüxũ iyarüxugüe.

¹⁰ Rü María ga Magadácũãx, rü Cuána, rü María ga Chaũtiágu naẽ, rü naĩgü ga ngecügü iyixĩ ga wüxigu yema Ngechucharü ngúexügüxütawa nangegücü ga yema ore.

¹¹ Natürü yema ngúexügücèx rü ñnucamare nixĩ ga yema ore, rü tama ngĩxũ nayaxögüchaũ.

¹² Natürü ga Pedru rü inañaãchi, rü ínayadau ga naxmaũwa. Rü yexguma nagu yadaucuchigu ga naxmaũ, rü nüxũ nadau ga düxruügü ga wüxicüwagu na nanuxũ. Rü poraãcü nabaixãchiãẽ namaã ga yema ngupetüxũ, rü baixãchiãẽãcuma napatacèx nataegu.

*Emaũãrü namawa nangox ga Ngechuchu
(Mr 16.12-13)*

¹³ Rü yema ngunexügutama rü taxre ga yema Ngechucharü ngúexügü rü wüxi ga ñãne ga

Emañwa naxĩ. Rũ norũ yaxũ ga guma ããne rũ 11 ga kilómetru nixĩ nüxna ga Yerucharéũ.

14 Rũ yexguma namagu naxĩyane, rũ nachigagu nidexatanũ ga guxũma ga yema ngupetũxũ.

15 Rũ yexguma yemachigagu iyadexatanũyane, rũ nümatama ga Ngechuchu rũ ngürũãchi naxcèx yéma nixũ, rũ natanũgu nixũchigũ.

16 Natürũ yema ngúexũgũ rũ woo Ngechuchuxũ nadaugũ, rũ tama nüxũ nacuèxgüéga na Ngechuchu yĩxũ, yerũ Tupana rũ nanatoõëgũ na tama Ngechuchuxũ nacuèxgũxũcèx.

17 Rũ yexguma ga Ngechuchu, rũ yema taxre ga ngúexũgũna naca, rũ ñanagürũ: —¿Tacũchiga nixĩ i pidexatanũxũ na nuxã namagu na pexĩxũ? ¿Rũ tacücèx nixĩ i pengechaũëxũ? —ñanagürũ.

18 Rũ wüxi ga yema ngúexũ ga Creopágu ãegaxũ nanangãxũ, rũ ñanagürũ: —Guxũma i duũxũgũ nixĩ i nüxũ cuáxũ ga yema yexwaca ngupetũxũ ga Yerucharéũwa. Rũ cuma na yexma cunaxũãnechiréxũ rũ maneca cuxicatama nixĩ i tama nüxũ cucuáxũ ga yema ngupetũxũ —ñanagürũ.

19 Rũ yexguma ga nüma ga Ngechuchu rũ ñanagürũ: —¿Tacũ nangupetũ ga Yerucharéũwa? —ñanagürũ. Rũ nanangãxũgũ ga yema ngúexũgũ, rũ ñanagürũgũ: —Poraãcü chixexũ nüxũ naxüpetũ ga Ngechuchu ga Nacharétucũãx. Nüma ga Ngechuchu rũ Tupanaãrũ orearũ uruũ ga mecũ nixĩ. Rũ Tupanapëxewa rũ duũxũgüpëxewa namecũma rũ nanaxü ga taxũ ga cuèxruũgũ ga Tupanaãrũ poramaã naxũxũ, rũ meã duũxũgũxũ nangúexëë.

20 —Natürũ ga paigüarũ ãëxgacügũ rũ tórũ ãëxgacügũ rũ nayayauxgũ. Rũ Dumacũãx

ga ãêxgacügüna nanamugü na curuchawa yapotagüãcüma nayuxêëgüãxücèx. Rü yemaãcü nayamèxgü.

21 —Toma nüxü tacuèxgu rü nüma tá nixĩ i tomaã naporaxü na ínguxuchixücèx i tachiüãne nüxna i Dumacüãxãrü ãêxgacü. Rü ñuxma rü marü tomaèxpüx i ngunexü nawena nixĩ ga na yamèxgüãxü.

22-23 —Natürü tama ngêxĩcatama nixĩ, yerü ñuxre ga ngexügü ga totanüxü rü toxü ínayabaixgügü. Yerü yema ngexügü rü pèxmamaxüchi ínayadaugü ga naxmaüwa, rü tama nüxü inayangaugü ga naxüne ga guma Ngechuchu. Rü yemacèx ga yema ngexügü rü toxcèx nawoegu, rü tomaã nüxü nayarüxugüe ga nüxü na nadaugüxü ga Tupanaãrü orearü ngeruügü ga daxücüãx. Rü yema daxücüãxgü rü namaã nüxü nixugügü ga Ngechuchu rü na namaxüxü —ñanagürügü.

24 Rü yexguma yema ngexügüarü orexü taxĩnüègu, rü ñuxre ga tomücügü rü naxmaüwa ínayadaugü. Rü yema ngexügü nüxü ixugüxürüü nüxü inayangaugü ga naxmaü. Natürü tama Ngechuchuxü nadaugü —ñanagürügü.

25 Rü yexguma ga Ngechuchu rü ñanagürü nüxü: —¿Tüxcüü tama peãeta ipexü i pemax? ¿Rü ñuxgura tá ta ipeyaxögüxü i nuxcümaügüxü ga Tupanaãrü orearü uruügüarü ore?

26 ¿Rü tama êxna nüxü pecuèx ga yema ngüxü tá na yangexü ga Cristu naxüpa na daxüguxü i naãnewa naxüxü, na ngema ãêxgacü yĩxücèx? —ñanagürü.

27 Rü yexguma inanaxügü ga namaã na

nangoxêẽãxŭ ga guxŭma ga Tupanaãrŭ ore ga nachiga ũmatŭxŭ. Rŭ yema Tupanaãrŭ ore ga Moĩché ũmatŭxŭmaã inanaxŭgŭ. Rŭ ñuxŭchi namaã nŭxŭ nixu ga guxŭma ga yema Tupanaãrŭ ore ga nuxcŭmaŭgŭxŭ ga Tupanaãrŭ orearŭ uruŭgŭ ũmatŭgŭxŭ.

²⁸ Rŭ yexguma yema ããne ga Emaŭwa nangugŭgu, rŭ Ngechuchu rŭ nŭmaxŭ toxnamana nŭgŭ naxŭxêẽneta.

²⁹ Natŭrŭ ga yema ngúexŭgŭ rŭ nŭxŭ nacèexŭgŭ na yexma naxãũxŭcèx, rŭ ñanagŭrŭgŭ: —¡Nuxma toxŭtagu nape, erŭ marŭ nayáuane, rŭ paxa tá nachŭta! —ñanagŭrŭgŭ. Rŭ yexguma ga Ngechuchu rŭ nawe yexma narŭxãũx.

³⁰ Rŭ yexguma chibŭcèx wŭxiwa mechawa natogŭgu, rŭ Ngechuchu nanayaxu ga pãũ. Rŭ Tupanana moxê naxcèx naxã. Rŭ ñuxŭchi inanabŭcu, rŭ wŭxichigŭna nanaxã.

³¹ Rŭ yexgumatama naãẽxŭ nicuèxãchitanŭ. Rŭ nŭxŭ nacuèxgŭ na guma yĩxŭ ga Ngechuchu. Natŭrŭ yexgumatama ngŭrŭãchi inayarŭtaxu ga nŭmax.

³² Rŭ yema taxre ga ngúexŭgŭ rŭ nŭgŭmaã ñanagŭrŭgŭ: —¿Tama êxna ga itaãẽgŭxŭ ga tŭrŭ maxŭnewa ga yexguma namawa tamaã yadeaxgu rŭ tamaã nangoxêẽãgu ga Tupanaãrŭ ore i ũmatŭxŭ? —ñanagŭrŭgŭ.

³³ Rŭ yexgumatama ga yema taxre ga ngúexŭgŭ rŭ inaxĩãchi ga Yerucharéŭcèx na nawoeguxŭ. Rŭ yexma nŭxŭ nayangau ga na ínangutaquẽxegŭxŭ ga yema 11 ga Ngechuchuarŭ ngúexŭgŭ rŭ togŭ ga natanŭxŭgŭ.

³⁴ Rŭ yema duŭxŭgŭ ga íngutaquẽxegŭxŭ rŭ

ñanagürügü nüxũ: –Aixcüma nixĩ i marü wena namaxũxũ ya Cori ya Ngechuchu. Rü Chimáũ ga Pedru rü marü nüxũ nadau –ñanagürügü.

³⁵ Rü yexguma ga yema taxre ga ngúexũgü rü ta nüxũ nixugügü ga yema nüxũ ngupetũxũ ga namawa, rü ñuxãcü nüxũ na yacuèxãchitanũxũ ga guma na yĩxũ ga Ngechuchu ga yexguma pãũ inabücũxgu.

*Ngechuchu rü norü ngúexũgücèx nangox
(Mt 28.16-20; Mr 16.14-18; Cu 20.19-23)*

³⁶ Rü yexguma yemaãcü íyadexagüyane, rü ngürüãchi norü ngãxũtanügu nachi ga Ngechuchu. Rü nüxũ narümoxẽ, rü ñanagürü: –Nuxmaẽ Pa Chorü Duũxũgũx –ñanagürü.

³⁷ Natürü nümagü rü nabaixãchiãëgü, rü poraãcü namuũẽ, yerü nagu naxĩnũëgu rü wüxi ga naxchixixũmare nadaugü.

³⁸ Natürü ga Ngechuchu rü ñanagürü nüxũ: –¿Tüxcüũ pebaixãchiãëgü rü tama peyaxõgü na choma chiĩxũ?

³⁹ –¡Dücèx, nüxũ pedèux ya choxmèxgü rü chaucutügü! Rü chomatama chixĩ. ¡Rü choxũ pingõgü rü meã choxũ perüdaunü! Erü wüxi i naxchixi rü tama choxũ pedauxürüũ naxãmachi rü naxãxchinèxã –ñanagürü.

⁴⁰ Rü yema ñaxguwena, rü nüxũ nanawèx ga naxmèx rü nacutü.

⁴¹ Natürü ga yema duũxũgü rü yexguma rü ta tama nüxũ nayaxõgü, yerü nabaixãchiãëgü rü nataãëgü. Rü yemacèx ga Ngechuchu rü nüxna naca rü ñanagürü nüxũ: –¿Pexũ nangèxmaxũ i õna i nuã? –ñanagürü.

⁴² Rū yexguma nūxna nanaxāgū ga wūxi ga choxni ga iguxūchipēxe rū wūxiweū ga berure.

⁴³ Rū nūma ga Ngechuchu rū nanayaxu. Rū yema duūxūgūpēxewa nanangōx.

⁴⁴ Rū ñuxūchi ñanagūrū nūxū: —Rū yema choxū ngupetūxū rū yema nixī ga pemaā nūxū chixuxū ga yexguma tauta chayuxgu rū petanūwa chayexmagu. Yerū yexguma rū pemaā nūxū chixu rū ñacharūgū:

“Rū tá ningu i guxūma i Tupanaārū ore i chauchiga ūmatūxū i Wiyaeguarū poperawa, rū Moīché ūmatūxū i mugūwa, rū ore i nuxcūmaūgūxū ga Tupanaārū orearū uruūgū ūmatūxūwa”, ñacharūgūchirēx pexū.

⁴⁵ Rū yemaācū namaā nanangoxēē ga Tupanaārū ore ga ūmatūxū.

⁴⁶ Rū ñanagūrū nūxū: —Tupanaārū ore i ūmatūxūwa rū nūxū nixu rū choma i Cristu rū tá chayū, rū tomaēxpūx i ngunexūgu rū tá wena chamaxū.

⁴⁷ —Rū yematama ore i ūmatūxūwa nūxū nixu rū tá chauégagu tá nixī i nūxū yaxugūxū i ore i mexū. Rū Yerucharéūwa tá inaxūgū i ngēma ñuxmatáta guxū i naānewa nangu na ngēmaācū duūxūgū nūxū rūxoexūcèx i nacūma i chixexū na Tupana nūxū nūxū ngechaūxūcèx i norū pecadugū.

⁴⁸ —Rū ñuxma rū pematama nixī i chorū orearū uruūgū, rū tá duūxūgūmaā nūxū pixu ga yema chauxūtawa nūxū pedaugūxū rū nūxū pexīnūēxū.

⁴⁹ —Rū dūcax, choma rū pexcèx tá nūma chanamu i Naāē i Ūnuxū ga pexcèx nūxū naxunetaxū ya Chaunatū. Natūrū chanaxwèxe i nūmatátama daa ñāne ya Yerucharéūwa

pengẽxmagü, ñuxmatáta penayauxgü i ngẽma Tupanaãẽ i Üünexü i daxüwa ne üxü i tá pexü poraexẽexü –ñanagürü.

*Ngechuchu rü daxüguxü ga naãnewa naxü
(Mr 16.19-20)*

⁵⁰ Rü yexguma ga Ngechuchu rü Yerucharéüãrü toxnamana norü ngúexügüxü nagagü, ñuxmata Betániããrü ngaicamana nangugü. Rü yéma norü ngúexügüétü nawémẽx, rü Tupanana naxcèx naca na nüxü nangüxẽexüçèx.

⁵¹ Rü yexguma yema ngúexügüçèx nayumüxẽguwena rü nüxna nixügachi. Rü Tupana daxüguxü ga naãnewa nanaga.

⁵² Rü nümagü ga norü ngúexügü rü Ngechuchuxü nicuèxüügü. Rü ñuxüchi taããcüma Yerucharéüçèx nawoegu.

⁵³ Rü guxüguma tupauca ga taxünewa naxüxü, rü yéma Tupanaxü nicuèxüügü. Rü ngẽmaãcü yĩ.

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6